

नमो नमो निम्मलदंसणस्स  
पूज्य आनंद-क्षमा-ललित-सुशील-सुधर्मसागर गुरुभ्यो नमः

# On Line – आगममंजूषा

## [१६] सूरपन्नत्ति

\* संकलन एवं प्रस्तुतकर्ता \*

**मुनि दीपरत्नसागर** [M.Com., M.Ed., Ph.D.]

## ॥ किंचित् प्रास्ताविकम् ॥

ये आगम-मंजूषा का संपादन आजसे ७० वर्ष पूर्व अर्थात् वीर संवत् २४६८, विक्रम संवत्-१९९८, ई.स.1942 के दौरान हुआ था, जिनका संपादन पूज्य आगमोद्धारक आचार्यश्री [आनंदसागरसूरिजी](#) म.सा.ने किया था। आज तक उन्ही के प्रस्थापित-मार्ग की रोशनी में सब अपनी-अपनी दिशाएँ ढूँढते आगे बढ़ रहे हैं।

हम ७० साल के बाद आज ई.स.-2012, विक्रम संवत्-२०६८, वीर संवत्-२५३८ में वो ही आगम-मंजूषा को कुछ उपयोगी परिवर्तनों के साथ इंटरनेट के माध्यम से सर्वथा सर्वप्रथम “**OnLine-आगममंजूषा**” नाम से प्रस्तुत कर रहे हैं।


**\* मूल आगम-मंजूषा के संपादन की किंचित् भिन्नता का स्वीकार \***

- [१] आवश्यक सूत्र-(आगम-४०) में केवल मूल सूत्र नहीं है, मूल सूत्रों के साथ निर्युक्ति भी सामिल की गई है।  
[२] जीतकल्प सूत्र-(आगम-३८) में भी केवल मूल सूत्र नहीं है, मूलसूत्रों के साथ भाष्य भी सामिल किया है।  
[३] जीतकल्प सूत्र-(आगम-३८) का वैकल्पिक सूत्र जो “पंचकल्प” है, उनके भाष्य को यहाँ सामिल किया गया है।

[४] “ओघनिर्युक्ति”-(आगम-४१) के वैकल्पिक आगम “पिंडनिर्युक्ति” को यहाँ समाविष्ट तो किया है, लेकिन उनका मुद्रण-स्थान बदल गया है।

[५] “कल्प(बारसा)सूत्र” को भी मूल आगममंजूषा में सामिल किया गया है।

**-मुनि दीपरत्नसागर**

: Address:- <b>Mnui Deepratnasagar,</b> <b>MangalDeep society, Opp.DholeswarMandir,</b> <b>POST:- THANGADH Dist.surendranagar.</b> <b>Mobile:-9825967397</b> <a href="mailto:jainmunideepratnasagar@gmail.com">jainmunideepratnasagar@gmail.com</a>	<b>मुनि दीपरत्नसागर</b>  <small>जैनमुनिश्री दीपरत्नसागर</small>
---	--

श्रीसूर्यप्रज्ञप्त्युपाङ्गम् । नमो अरिहंताणं ॥ तेणं कालेणं० मिथिला नाम नयरी होत्था रिद्धत्थिमियसमिद्धा पमुइतजणजाणवया जाव पासादीया०, तीसे णं मिहिलाए नयरीए बहिया उत्तरपुरच्छिमे दिसिभाए एत्थ णं माणिभदे णामं चेइए होत्था वण्णओ, तीसे णं मिहिलाए जितसत्तू राया धारिणी देवी वण्णओ, तेणं कालेणं० तंमि माणिभदे चेइए सामी समोसढे परिसा निग्गता धम्मो कहितो पडिगया परिसा जाव राजा जामेव दिसिं पाडुब्भूए तामेव दिसिं पडिगते । १ । तेणं कालेणं० सम- णस्स भगवतो महावीरस्स जेट्ठे अंतेवासी इंदभूती णामे अणगारे गोतमे गोत्तेणं सत्तुस्सेहे समचउरंससंठाणसंठिए वज्जरिसहनारायसंघयणे जाव एवं वयासी । २ । 'कइ मंडलाइं वच्चइ १, तिरिच्छा किं च गच्छइ २ । ओभासइ केवइयं ३, सेयाइ किं ते संठिई ४ ॥ १ ॥ कहिं पडिहया लेसा ५, कहिं ते ओयसंठिई ६ । के सूरियं वरयते ७, कहं ते उदयसंठिई ८ ॥ २ ॥ कइकट्टा पोरिसीच्छाया ९, जोगे किं ते व आहिए १० । किं ते संवच्छराणादी ११, कइ संवच्छराइ य १२ ॥ ३ ॥ कहं चंदमसो वुड्ढी १३, कया ते दोसिणा बहु १४ । के सिग्घगई वुत्ते १५, कहं दोसिणलक्खणं १६ ॥ ४ ॥ चयणोववाय १७ उच्चत्ते १८, सूरिया कइ आहिया १९ । अणुभावे के व संवुत्ते २०, एवमेयाइं वीसई ॥ ५ ॥ ३ । वड्ढोवड्ढी मुहुत्ताणमद्धमं- डलसंठिई । के ते चिन्नं परियरइ, अंतरं किं चरंति य ॥ ६ ॥ उग्गाहइ केवइयं, केवतियं च विकंपइ । मंडलाण य संठाणे, विक्खंभो अट्ट पाहुडा ॥ ७ ॥ ४ । छप्पंच य सत्तेव य अट्ट तिन्नि य हवंति पडिवत्ती । पढमस्स पाहुडस्स उ हवंति एयाउ पडिवत्ती ॥ ८ ॥ ५ । पडिवत्तीओ उदए, तहा अत्थमणेसु य । भियघाए कण्णकला, मुहुत्ताण गतीति य ॥ ९ ॥ निक्खममाणे सिग्घगई पविसंते मंदगई इय । चुलसीइसयं पुरिसाणं, तेसिं च पडिवत्तीओ ॥ १० ॥ उदयम्मि अट्ट भणिया भेदग्घाए दुवे य पडिवत्ती । चत्तारि मुहुत्तगईए हुंति तइयंमि पडिवत्ती ॥ ११ ॥ ६ । आवलिय मुहुत्तग्गे एवंभागा य जोगस्सा । कुलाइं पुन्नमासी य, सन्निवाए य संठिई ॥ १२ ॥ तार (य)ग्गं च नेता य १०, चंदमग्गत्ति यावरे । देवताण य अज्झयणे,

७७८ सूर्यप्रज्ञप्तिः, पाहुड-१

मुनि दीपरत्नसागर

मुहुत्ताणं नामया इय ॥ १३ ॥ दिवसा राइ वुत्ता य, तिहि गोत्ता भोयणाणि य। आइच्चचार मासा य, पंच संवच्छरा इय २० ॥ १४ ॥ जोइसस्स य दाराइं, नक्खत्तविजएऽविय २२।  
 दसमे पाहुडे एए, बावीसं पाहुडपाहुडा ॥ १५ ॥ ७। ता कहं ते वद्धोवद्धी मुहुत्ताणं आहितेति वदेज्जा?, ता अट्ट एकूणवीसे मुहुत्तसते सत्तावीसं च सत्तट्टिभागे मुहुत्तस्स आहितेति  
 वदेज्जा। ८। ता जया णं सूरिए सव्वभंतरातो मंडलातो सव्वबाहिरं मंडलं उवसंकमित्ता चारं चरति सव्वबाहिरातो य मंडलातो सव्वभंतरं मंडलं उवसंकमित्ता चारं चरति एस णं अद्दा  
 केवतियं रातिंदियग्गेणं आहितेति वदेज्जा?, ता तिण्णि छावट्टे रातिंदियसए रातिंदियग्गेणं आहितेति वदेज्जा। ९। ता एताए अद्दाए सूरिए कति मंडलाइं चरति?, ता चुलसीयं मंडल-  
 सतं चरति, बासीति मंडलसतं दुक्खुत्तो चरति, तं०-णिक्खममाणे चैव पवेसमाणे चैव, दुवे य खलु मंडलाइं सइं चरति, तं०-सव्वभंतरं चैव मंडलं सव्वबाहिरं चैव मंडलं। १०। जइ  
 खलु तस्सेव आदिच्चस्स संवच्छरस्स सइं अट्टारसमुहुत्ते दिवसे भवति सइं अट्टारसमुहुत्ता राती भवति सइं दुवालसमुहुत्ते दिवसे भवति सइं दुवालसमुहुत्ता राती भवति, पढमे छम्मासे  
 अत्थि अट्टारसमुहुत्ता राती णत्थि अट्टारसमुहुत्ते दिवसे अत्थि दुवालसमुहुत्ते दिवसे णत्थि दुवालसमुहुत्ता राती भवति, दोच्चे छम्मासे अत्थि अट्टारसमुहुत्ते दिवसे णत्थि अट्टारस-  
 मुहुत्ता राती अत्थि दुवालसमुहुत्ता राती णत्थि दुवालसमुहुत्ते दिवसे भवति, पढमे छम्मासे दोच्चे छम्मासे णत्थि पण्णरसमुहुत्ते दिवसे भवति णत्थि पण्णरसमुहुत्ता राती भवति, तत्थ  
 णं कं हेतुं वदेज्जा?, ता अयण्णं जंबुद्धीवे सव्वदीवसमुद्दाणं सव्वभंतराए जाव परिक्खेवेणं पं०, ता जता णं सूरिए सव्वभंतरमंडलं उवसंकमित्ता चारं चरति तदा णं उत्तमकट्टपत्ते  
 उक्कोसए अट्टारसमुहुत्ते दिवसे भवति जहण्णिया दुवालसमुहुत्ता राती भवति, से निक्खममाणे सूरिए नवं संवच्छरं अयमाणे पढमंसि अहोरत्तंसि अब्भितराणंतरं मंडलं उवसंकमित्ता  
 चारं चरति, ता जया णं सूरिए अब्भितराणंतरं मंडलं उवसंकमित्ता चारं चरति तदा णं अट्टारसमुहुत्ते दिवसे भवति दोहिं एगट्टिभागमुहुत्तेहिं ऊणे दुवालसमुहुत्ता राती भवति दोहिं  
 एगट्टिभागमुहुत्तेहिं अधिया, से णिक्खममाणे सूरिए दोच्चंसि अहोरत्तंसि अब्भंतरं तच्चं मंडलं उवसंकमित्ता चारं चरति, ता जया णं सूरिए अब्भितरं तच्चं मंडलं उवसंकमित्ता चारं  
 चरति तदा णं अट्टारसमुहुत्ते दिवसे भवति चउहिं एगट्टिभागमुहुत्तेहिं ऊणे दुवालसमुहुत्ता राती भवति चउहिं एगट्टिभागमुहुत्तेहिं अहिया, एवं खलु एएणं उवाएणं णिक्खममाणे  
 सूरिए तदाणंतरा अणंतरं मंडलातो मंडलं संकममाणे २ दो.दो एगट्टिभागमुहुत्ते एगमेगे मंडले दिवसखेत्तस्स णिवुड्ढेमाणे २ रतणिक्खेत्तस्स अभिवुड्ढेमाणे २ सव्वबाहिरमंडलं उव-  
 संकमित्ता चारं चरति, ता जया णं सूरिए सव्वभंतरातो मंडलाओ सव्वबाहिरं मंडलं उवसंकमित्ता चारं चरति तदा णं सव्वभंतरमंडलं पणिधाय एगेणं तेसीतेणं राइंदियसतेणं तिण्णि  
 छावट्टे एगट्टिभागमुहुत्तसते दिवसखेत्तस्स णिवुड्ढत्ता रतणिक्खेत्तस्स अभिवुड्ढत्ता चारं चरति तदा णं उत्तमकट्टपत्ता उक्कोसिया अट्टारसमुहुत्ता राती भवति जहण्णए बारसमुहुत्ते  
 दिवसे भवति, एस णं पढमे छम्मासे एस णं पढमछम्मासस्स पज्जवसाणे, से पविसमाणे सूरिए दोच्चं छम्मासं अ(आ)यमाणे पढमंसि अहोरत्तंसि बाहिराणंतरं मंडलं उवसंकमेत्ता चारं  
 चरति, ता जया णं सूरिए बाहिराणंतरं मंडलं उवसंकमित्ता चारं चरति तदा णं अट्टारसमुहुत्ता राती भवति दोहिं एगट्टिभागमुहुत्तेहिं ऊणा दुवालसमुहुत्ते दिवसे भवति दोहिं एगट्टिभा-  
 गमुहुत्तेहिं अहिए, से पविसमाणे सूरिए दोच्चंसि अहोरत्तंसि बाहिरं तच्चं मंडलं उवसंकमित्ता चारं चरति, ता जया णं सूरिए बाहिरं तच्चं मंडलं उवसंकमित्ता चारं चरति तदा णं अट्टा-  
 रसमुहुत्ता राती भवति चउहिं एगट्टिभागमुहुत्तेहिं ऊणा दुवालसमुहुत्ते दिवसे भवति चउहिं एगट्टिभागमुहुत्तेहिं अहिए, एवं खलु एतेणुवाएणं पविसमाणे सूरिए तदाणंतरातो  
 मंडलातो तयाणंतरं मंडलं संकममाणे २ दो दो एगट्टिभागमुहुत्ते एगमेगे मंडले रतणिक्खेत्तस्स णिवुड्ढेमाणे दिवसखेत्तस्स अभिवुड्ढेमाणे २ सव्वभंतरं मंडलं उवसंकमित्ता चारं  
 चरति, ता जया णं सूरिए सव्वबाहिराओ मंडलाओ सव्वभंतरं मंडलं उवसंकमित्ता चारं चरति तदा णं सव्वबाहिरं मंडलं पणिधाय एगेणं तेसीएणं राइंदियसतेणं तिन्नि छावट्टे एगट्टि-  
 भागमुहुत्तसते रयणिक्खेत्तस्स निवुड्ढत्ता दिवसखेत्तस्स अभिवुड्ढत्ता चारं चरति तया णं उत्तमकट्टपत्ते उक्कोसए अट्टारसमुहुत्ते दिवसे भवति जहण्णिया दुवालसमुहुत्ता राती भवति,  
 एस णं दोच्चे छम्मासे एस णं दुच्चस्स छम्मासस्स पज्जवसाणे, एस णं आदिच्चे संवच्छरे एस णं आदिच्चस्स संवच्छरस्स पज्जवसाणे, इति खलु तस्सेवं आदिच्चस्स संवच्छरस्स सइं अट्टा-  
 रसमुहुत्ते दिवसे भवति सइं अट्टारसमुहुत्ता राती भवति सइं दुवालसमुहुत्ते दिवसे भवति सइं दुवालसमुहुत्ता राती भवति, पढमे छम्मासे अत्थि अट्टारसमुहुत्ता राई नत्थि अट्टारसमुहुत्ते  
 दिवसे अत्थि दुवालसमुहुत्ते दिवसे नत्थि दुवालसमुहुत्ता राई, दोच्चे वा छम्मासे अत्थि अट्टारसमुहुत्ते दिवसे भवति णत्थि अट्टारसमुहुत्ता राई अत्थि दुवालसमुहुत्ता राई नत्थि दुवा-  
 लसमुहुत्ते दिवसे भवति, पढमे वा छम्मासे दोच्चे वा छम्मासे णत्थि पण्णरसमुहुत्ते दिवसे भवति णत्थि पण्णरसमुहुत्ता राई भवति, नन्नत्थ रातिंदियाणं वद्धोवद्धीए मुहुत्ताण वा  
 चयोवचएणं णण्णत्थ वा अणुवायगईए, 'पुव्वेण दुन्नि भागा० गाधाओ भाणित्ताओ। ११ ॥ पढमस्स पाहुडस्स पढमं पाहुडपाहुडं १-१ ॥ ता कहं ते अद्धमंडलसंठिती आहिताति

वदेजा ?, तत्थ खलु इमे दुवे अद्धमंडलसंठिती पं० तं०-दाहिणा चेव अद्धमंडलसंठिती उत्तरा चेव अद्धमंडलसंठिती, ता कहं ते दाहिणअद्धमंडलसंठिती आहिताति वदेजा ?, ता अयण्णं जंबुद्दीवे दीवे सव्वदीवसमुहाणं जाव परिकखेवेणं, ता जया णं सूरिए सव्वभंतरं दाहिणं अद्धमंडलसंठितिं उवसंकमित्ता चारं चरति तदा णं उत्तमकट्टपत्ते उक्कोसए अट्टारसमुहुत्ते दिवसे भवति जहणिया दुवालसमुहुत्ता राती भवति, से णिक्खममाणे सूरिए णवं संवच्छरं अयमाणे पढमंसि अहोरत्तंसि दाहिणाए अंतराए भागाते तस्सादिपदेसाते अब्भितराणंतरं उत्तरं अद्धमंडलसंठितिं उवसंकमित्ता चारं चरति, ता जया णं सूरिए अब्भितराणंतरं उत्तरं अद्धमंडलसंठितिं उवसंकमित्ता चारं चरति तदा णं अट्टारसमुहुत्ते दिवसे भवति दोहिं एगट्टिभागमुहुत्तेहिं ऊणे दुवालसमुहुत्ता राती भवइ दोहिं एगट्टिभागमुहुत्तेहिं अधिया, से णिक्खममाणे सूरिए दोच्चंसि अहोरत्तंसि उत्तराए अंतराए भागाते तस्सादियपदेसाए अब्भितरं तच्चं दाहिणं अद्धमंडलसंठितिं उवसंकमित्ता चारं चरति, ता जया णं सूरिए अब्भितरं तच्चं दाहिणं अद्धमंडलसंठितिं उवसंकमित्ता चारं चरति तदा णं अट्टारसमुहुत्ते दिवसे भवति चउहिं एगट्टिभागमुहुत्तेहिं ऊणे दुवालसमुहुत्ता राई भवति चउहिं एगट्टिभागमुहुत्तेहिं अधिया, एवं खलु एएणं उवाएणं णिक्खममाणे सूरिए तदाणंतरातो तदाणंतरं० तंसि २ देसंसि तं तं अद्धमंडलसंठितिं संकममाणे २ दाहिणाए २ अंतराए भागाते तस्सादिपदेसाते सव्वबाहिरं उत्तरं अद्धमंडलसंठितिं उवसंकमित्ता चारं चरति, ता जया णं सूरिए सव्वबाहिरं उत्तरं अद्धमंडलसंठितिं उवसंकमित्ता चारं चरति तदा णं उत्तमकट्टपत्ता उक्को० अट्टारसमुहुत्ता राई भवति जह० दुवालसमुहुत्ते दिवसे, एस णं पढमे छम्मासे एस णं पढमछम्मासस्स पज्जवसाणे, से पविसमाणे सूरिए दोच्चं छम्मासं अयमीणे पढमंसि अहोरत्तंसि उत्तराते अंतरभागाते तस्सादिपदेसाते बाहिराणंतरं दाहिणं अद्धमंडलसंठितिं उवसंकमित्ता चारं चरति, ता जया णं सूरिए बाहिराणंतरं अद्धमंडलसंठितिं उवसंकमित्ता चारं चरति तदा णं अट्टारसमुहुत्ता राई भवति दोहिं एगट्टिभागमुहुत्तेहिं ऊणा दुवालसमुहुत्ते दिवसे भवति दोहिं एगट्टिभागमुहुत्तेहिं अहिए, से पविसमाणे सूरिए दोच्चंसि अहोरत्तंसि दाहिणाते अंतराए भागाते तस्सादिपदेसाए बाहिरं तच्चं उत्तरं अद्धमंडलसंठितिं उवसंकमित्ता चारं चरति, ता जया णं सूरिए बाहिरं तच्चं उत्तरं अद्धमंडलसंठितिं उवसंकमित्ता चारं चरति तदा णं अट्टारसमुहुत्ता राई भवति चउहिं एगट्टिभागमुहुत्तेहिं ऊणा दुवालसमुहुत्ते दिवसे भवति चउहिं एगट्टिभागमुहुत्तेहिं अधिये, एवं खलु एतेणं उवाएणं पविसमाणे सूरिए तदाणंतराउ तदाणंतरं० तंसि २ देसंसि तं २ अद्धमंडलसंठितिं संकममाणे २ उत्तराए तयांतरभागाते तस्सादिपदेसाए सव्वभंतरं दाहिणं अद्धमंडलसंठितिं उवसंकमित्ता चारं चरति, ता जया णं सूरिए सव्वभंतरं दाहिणं अद्धमंडलसंठितिं उवसंकमित्ता चारं चरति तदा णं उत्तमकट्टपत्ते उक्कोसए अट्टारसमुहुत्ते दिवसे भवति जहणिया दुवालसमुहुत्ता राई भवति, एस णं दोच्चे छम्मासे एस णं दोच्चस्स छम्मासस्स पज्जवसाणे एस णं आदिच्चे संवच्छरे एस णं आदिच्चसंवच्छरस्स पज्जवसाणे । १२ । ता कहं ते उत्तरा अद्धमंडलसंठिती आहिताति वदेजा ?, ता अयं णं जंबुद्दीवे दीवे सव्वदीव जाव परिकखेवेणं, ता जया णं सूरिए सव्वभंतरं उत्तरं अद्धमंडलसंठितिं उवसंकमित्ता चारं चरति तदा णं उत्तमकट्टपत्ते उक्कोसए अट्टारसमुहुत्ते दिवसे भवति जहणिया दुवालसमुहुत्ता राई भवति जहा दाहिणा तहा चेव णवरं उत्तरट्टिओ अब्भितराणंतरं दाहिणं उवसंकमइ दाहिणातो अब्भितरं तच्चं उत्तरं उवसंकमति, एवं खलु एएणं उवाएणं जाव सव्वबाहिरं दाहिणं उवसंकमति सव्वबाहिरातो बाहिराणंतरं उत्तरं उवसंकमति उत्तरातो बाहिरं तच्चं दाहिणं तच्चातो दाहिणातो संकममाणे २ जाव सव्वभंतरं उवसंकमति तहेव एस णं दोच्चे छम्मासे एस णं दोच्चस्स छम्मासस्स पज्जवसाणे एस णं आदिच्चे संवच्छरे एस णं आदिच्चस्स संवच्छरस्स पज्जवसाणे, गाहाओ । १३ ॥ पढमे बीयं पाहुडपाहुडं १-२ ॥ ता के ते चिन्नं पडिचरति आहितेति वदेजा ?, तत्थ खलु इमे दुवे सूरिया पं० तं०-भारहे चेव सूरिए एरवए चेव सूरिए, ता एते णं दुवे सूरिया पत्तेयं २ तीसाए २ मुहुत्तेहिं एगमेगं अद्धमंडलं चरति, सट्टीए २ मुहुत्तेहिं एगमेगं मंडलं संघातंति, ता णिक्खममाणे खलु एते दुवे सूरिया णो अण्णमण्णस्स चिण्णं पडिचरति, पविसमाणा खलु एते दुवे सूरिया अण्णमण्णस्स चिण्णं पडिचरति, तं सतमेगं चोतालं, तत्थ को हेऊ वदेज्जा ?, ता अयण्णं जंबुद्दीवे दीवे जाव परिकखेवेणं, तत्थ णं अयं भारहए चेव सूरिए जंबुद्दीवस्स० पाईणपडीणायतउदीणदाहिणायताए जीवाए मंडलं चउवीसएणं सतेणं छेत्ता दाहिणपुरत्थिमिल्लंसि चउभागमंडलंसि बाणउतियसूरियगताइं जाइं सूरिए अप्पणा चेव चिण्णाइं पडिचरति उत्तरपच्चत्थिमिल्लंसि चउभागमंडलंसि एक्काणउतिं सूरियगताइं जाइं सूरिए अप्पणा चेव चिण्णाइं पडिचरति तत्थ अयं भारहे सूरिए एरवतस्स सूरियस्स जंबुद्दीवस्स पाईणपडिणायताए उदीणदाहिणायताए जीवाए मंडलं चउवीसएणं सतेणं छेत्ता उत्तरपुरच्छिमिल्लंसि चउभागमंडलंसि बाणउतिं सूरियगताइं जाइं सूरिए परस्स चिण्णाइं पडिचरति दाहिणपच्चच्छिमिल्लंसि चउभागमंडलंसि एकूणणउतिं सूरियगताइं जाइं सूरिए परस्स चेव चिण्णाइं पडिचरति, तत्थ अयं एरवए सूरिए० जंबुद्दीवस्स पाईणपडीणायताए उदीणदाहिणायताए जीवाए मंडलं चउवीसएणं सतेणं छेत्ता उत्तरपुरत्थिमिल्लंसि चउभागमंडलंसि बाणउतिं सूरियगताइं जाइं सूरिए अप्पणा चेव चिण्णाइं पडिचरति, तत्थ णं एयं एरवतिए सूरिए ( १९५ )

भारहस्स सूरियस्स जंबुदीवस्स पाईणपडीणायताए उदीणदाहिणायताए जीवाए मंडलं चउवीसएणं सतेणं छित्ता दाहिणपच्चत्थिमिहंसि चउभागमंडलंसि बाणउतिं सूरियगताइं जाइं सूरिए परस्स चिण्णाइं पडिचरति उत्तरपुरत्थिमिहंसि चउभागमंडलंसि एक्काणउतिं सूरियगताइं जाइं सूरिए परस्स चैव चिण्णाइं पडिचरति, ता निक्खममाणा खलु एते दुवे सूरिया णो अण्णमण्णस्स चिण्णं पडिचरति, पविसमाणा खलु एते दुवे सूरिया अण्णमण्णस्स चिण्णं पडिचरति, तं० 'सतमेगं चोतालं० गाहाओ । १४ ॥ पढमे तइयं पाहुडपाहुडं १-३ ॥ ता केवइयं एए दुवे सूरिया अण्णमण्णस्स अंतरं कट्टु चारं चरंति आहिताति वदेजा ?, तत्थ खलु इमातो छ पडिवत्तीओ पं०, तत्थ एगे एवमाहंसु-ता एगं जोयणसहस्सं एगं च तेत्तीसं जोयणसतं अण्णमण्णस्स अंतरं कट्टु सूरिया चारं चरंति आहिताति वदेजा एगे एवमाहंसु, एगे पुण एवमाहंसु-ता एगं जोयणसहस्सं एगं चउतीसं जोयणसयं अन्नमन्नस्स अंतरं कट्टु सूरिया चारं चरंति आहियत्ति वइजा एगे एव०, एगे पुण०-ता एगं जोयणसहस्सं एगं च पणतीसं जोयणसयं अण्णमण्णस्स अंतरं कट्टु सूरिया चारं चरंति आहिताति वदेजा एगे एव०, एगे० एगं दीवं एगं समुहं अण्णमण्णस्स अंतरं कट्टु०, एगे० दो दीवे दो समुहे०, एगे० तिण्णि दीवे तिण्णि समुहे०, वयं पुण एवं वयामो-ता पंच २ जोयणाइं पणतीसं च एगट्ठिभागे जोयणस्स अण्णमण्णस्स अंतरं अभिवइडेमाणा वा निवइडेमाणा वा सूरिया चारं चरंति आहि०, तत्थ णं को हेऊ आहिताति वदेजा ?, ता अयण्णं जंबुदीवे जाव परिक्खेवेणं पं०, ता जया णं एते दुवे सूरिया सब्भंतरमंडलं उवसंकमित्ता चारं चरंति तदा णं णवणउतिजोयणसहस्साइं छच्च चत्ताले जोयणसते अण्णमण्णस्स अंतरं कट्टु चारं चरंति आहिताति वदेजा, तता णं उत्तमकट्टपत्ते उक्कोसए अट्टारसमुहुत्ते दिवसे भवति जहण्णिया दुवालसमुहुत्ता राई भवति, ते निक्खममाणा सूरिया णवं संवच्छरं अयमाणा पढमंसि अहोरत्तंसि अब्भितराणंतरं मंडलं उवसंकमित्ता चारं चरंति, ता जता णं एते दुवे सूरिया जाव चारं चरंति तदा णं नवनवतिं जोयणसहस्साइं छच्च पणताले जोयणसते पणतीसं च एगट्ठिभागे जोयणस्स अंतरं कट्टु चारं चरंति आहिताति वदेजा, तता णं अट्टारसमुहुत्ते दिवसे भवति दोहिं एगट्ठिभागमुहुत्तेहिं ऊणे दुवालसमुहुत्ता राती भवति दोहिं एगट्ठिभागमुहुत्तेहिं अधिया, ते णिक्खममाणा सूरिया दोच्चंसि अहोरत्तंसि अब्भितरं तच्चं मंडलं उवसंकमित्ता चारं चरंति, ता जता एते दुवे सूरिया अब्भितरं तच्चं मंडलं जाव चारं चरंति तथा णं नवनवइं जोयणसहस्साइं छच्च इक्कावण्णे जोयणसए नव य एगट्ठिभागे जोयणस्स अण्णमण्णस्स अंतरं कट्टु चारं चरंति०, तदा णं अट्टारसमुहुत्ते दिवसे भवइ चउहिं एगट्ठिभागमुहुत्तेहिं ऊणे दुवालसमुहुत्ता राई भवइ चउहिं एगट्ठिभागमुहुत्तेहिं अधिया, एवं खलु एतेणुवाएणं णिक्खममाणा एते दुवे सूरिया ततोणंतरातो तदाणंतरं मंडलातो मंडलं संकममाणा २ पंच २ जोयणाइं पणतीसं च एगट्ठिभागे जोयणस्स एगमेगे मंडले अण्णमण्णस्स अंतरं अभिवइडेमाणा २ सब्बाहिरं मंडलं उवसंकमित्ता चारं चरंति, ता जया णं एते दुवे सूरिया सब्बाहिरं मंडलं उवसंकमित्ता चारं चरंति तता णं एगं जोयणसतसहस्सं छच्च सट्टे जोयणसते अण्णमण्णस्स अंतरं कट्टु चारं चरंति, तता णं उत्तमकट्टपत्ता जाव राई भवइ जहण्णए दुवाल० जाव दिवसे भवति, एस णं पढमे छम्मासे एस णं पढमस्स छम्मासस्स पज्जवसाणे, ते पविसमाणा सूरिया दोच्चं छम्मासं अयमाणा पढमंसि अहोरत्तंसि बाहिराणंतरं मंडलं उवसंकमित्ता चारं चरंति, ता जया णं एते दुवे सूरिया बाहिराणंतरं मंडलं उवसंकमित्ता चारं चरंति तदा णं एगं जोयणसयसहस्सं छच्च चउप्पण्णे जोयणसते छवीसं च एगट्ठिभागे जोयणस्स अण्णमण्णस्स अंतरं कट्टु चारं चरंति०, तदा णं अट्टारसमुहुत्ता राई भवइ दोहिं एगट्ठिभागमुहुत्तेहिं ऊणा दुवालसमुहुत्ते दिवसे भवति दोहिं एगट्ठिभागमुहुत्तेहिं अहिए, ते पविसमाणा सूरिया दोच्चंसि अहोरत्तंसि बाहिरं तच्चं मंडलं उवसंकमित्ता चारं चरंति, ता जता णं एते दुवे सूरिया बाहिरं तच्चं मंडलं उवसंकमित्ता चारं चरंति तता णं एगं जोयणसयसहस्सं छच्च अडयाले जोयणसते बावण्णं च एगट्ठिभागे जोयणस्स अण्णमण्णस्स अंतरं कट्टु चारं चरंति, तता णं अट्टारसमुहुत्ता राई भवइ चउहिं एग० जाव ऊणा दुवालसमुहुत्ते दिवसे भवति चउहिं० जाव अहिए, एवं खलु एतेणुवाएणं पविसमाणा एते दुवे सूरिया ततोऽणंतरातो तदाणंतरं मंडलाओ मंडलं संकममाणा पंच २ जोयणाइं पणतीसे एगट्ठिभागे जोयणस्स एगमेगे मंडले अण्णमण्णस्संतरं णिवुइडेमाणा २ सब्भंतरं मंडलं उवसंकमित्ता चारं चरंति, जया णं एते दुवे सूरिया सब्भंतरं मंडलं उवसंकमित्ता चारं चरंति तता णं णवणउतिं जोयणसहस्साइं छच्च चत्ताले जोयणसते अण्णमण्णस्स अंतरं कट्टु चारं चरंति तता णं उत्तमकट्टपत्ते जाव दिवसे भवति जहण्णिया दुवालसमुहुत्ता राई भवति, एस णं दोच्चे छम्मासे एस णं दोच्चस्स छम्मासस्स पज्जवसाणे एस णं आइच्चे संवच्छरे एस णं आइच्चसंवच्छरस्स पज्जवसाणे । १५ ॥ १-४ ॥ ता केवतियं ते दीवे समुहे वा ओगाहिता सूरिए चारं चरति आहिता०?, तत्थ खलु इमाओ पंच पडिवत्तीओ पं०, एगे एवमाहंसु ता एगं जोयणसहस्सं एगं च तेत्तीसं जोयणसतं दीवं वा समुहं वा ओगाहिता सूरिए चारं चरति एगे एव०, एगे पुण०-ता एगं जोयणसहस्सं एगं चउत्तीसं जोयणसयं दीवं वा समुहं वा ओगाहिता सूरिए चारं चरति एगे एव०, एगे पुण०-ता एगं जोयणसहस्सं एगं च पणतीसं जोय-

णसतं दीवं वा समुद्रं वा ओगाहिता सूरिए चारं चरति एगे एव०, एगे पुण०-ता अवड्डं दीवं वा समुद्रं वा ओगाहिता सूरिए चारं चरति एगे एव०, एगे पुण०-ता नो किंचि एगं जोयणसहस्सं एगं तेत्तीसं जोयणसतं दीवं वा समुद्रं वा ओगाहिता सूरिए चारं चरति०, तत्थ जे ते एवमाहंसु ता एगं जोयणसहस्सं एगं तेत्तीसं जोयणसतं दीवं वा समुद्रं वा उग्गाहिता सूरिए चारं चरति ते एवमाहंसु-जता णं सूरिए सब्भंतरं मंडलं उवसंकमित्ता चारं चरति तथा णं जंबुद्दीवं एगं जोयणसहस्सं एगं च तेत्तीसं जोयणसतं ओगाहिता सूरिए चारं चरति तता णं उत्तमकट्टपत्ते उक्कोसए अट्टारसमुहुत्ते दिवसे भवति जहणिया दुवालसमुहुत्ता राई भवइ, ता जया णं सूरिए सब्बाहिरं मंडलं उवसंकमित्ता चारं चरइ तथा णं लवणसमुद्रं एगं जोयणसहस्सं एगं च तेत्तीसं जोयणसयं ओगाहिता चारं चरइ तथा णं उत्तमकट्टपत्ता उक्कोसिया अट्टारसमुहुत्ता राई भवति जहणए दुवालसमुहुत्ते दिवसे भवइ, एवं चोत्तीसेऽवि, पणतीसेऽवि एवं चेव भाणियद्वं, तत्थ जे ते एवमाहंसु ता अवड्डं दीवं वा समुद्रं वा ओगाहिता सूरिए चारं चरति ते एवमा०-जता णं सूरिए सब्भंतरं मंडलं उवसंकमित्ता चारं चरति तता णं अवड्डं जंबुद्दीवं ओगाहिता चारं चरति तता णं उत्तमकट्टपत्ते उक्कोसए अट्टारसमुहुत्ते दिवसे भवति जहणिया दुवालसमुहुत्ता राई भवति, एवं सब्बाहिरएवि, णवरं अवड्डं लवणसमुद्रं, तता णं राइंदियं तहेव, तत्थ जे ते एव०-ता णो किञ्चि दीवं वा समुद्रं वा ओगाहिता सूरिए चारं चरति ते एवमाहंसु-ता जता णं सूरिए सब्भंतरं मंडलं उवसंकमित्ता चारं चरति तता णं णो किंचि दीवं वा समुद्रं वा ओगाहिता सूरिए चारं चरति तता णं उत्तमकट्टपत्ते उक्कोसए अट्टारसमुहुत्ते दिवसे भवति तहेव, एवं सब्बाहिरए मंडले, णवरं णो किंचि लवणसमुद्रं ओगाहिता चारं चरति, रातिंदियं तहेव, एगे एव० । १६ । वयं पुण एवं वदामो-ता जया णं सूरिए सब्भंतरं मंडलं उवसंकमित्ता चारं चरति तता णं जंबुद्दीवं असीतं जोयणसतं ओगाहिता चारं चरति तदा णं उत्तमकट्टपत्ते उक्कोसए अट्टारसमुहुत्ते दिवसे भवति जहणिया दुवालसमुहुत्ता राई भवति, एवं सब्बाहिरेवि णवरं लवणसमुद्रं तिण्णि तीसे जोयणसते ओगाहिता चारं चरति, तता णं उत्तमकट्टपत्ता उक्कोसिया अट्टारसमुहुत्ता राई भवइ जहणए दुवालसमुहुत्ते दिवसे भवति, गाथाओ भाणित्वाओ । १७ ॥ १-५ ॥ ता केवतियं ते एगमेगेणं रातिंदिएणं विकंपइत्ता २ सूरिए चारं चरति आहितेति वदेज्जा ?, तत्थ खलु इमाओ सत्त पडिवत्तीओ पं०, तत्थेगे एवमाहंसु-ता दो जोयणाइं अद्धदुचत्तालीसं तेसीतसयभागे जोयणस्स एगमेगेणं रातिंदिएणं विकंपइत्ता २ सूरिए चारं चरति एगे एव०, एगे पुण० ता अड्डातिज्जाइं जोयणाइं एगमेगेणं राइंदिएणं विकंपइत्ता सूरिए चारं चरति एगे एव०, एगे पुण० ता तिभागूणाइं तिञ्चि जोयणाइं एगमेगेणं राइंदिएणं विकंपइत्ता २ सूरिए चारं चरति एगे एव०, एगे पुण०-ता तिण्णि जोयणाइं अद्धसीतालीसं च तेसीतसयभागे जोयणस्स एगमेगेणं राइंदिएणं विकंपइत्ता सूरिए चारं चरति एगे एव०, एगे पुण०-ता अद्धुद्धाइं जोयणाइं एगमेगेणं राइंदिएणं विकंपइत्ता सूरिए चारं चरति एगे एव०, एगे पुण०-ता चउब्भागूणाइं चत्तारि जोयणाइं एगमेगेणं राइंदिएणं विकंपइत्ता सूरिए चारं चरति एगे एव०, एगे पुण०-ता चत्तारि जोयणाइं अद्धबावणं च तेसीतसयभागे जोयणस्स एगमेगेणं राइंदिएणं विकंपइत्ता सूरिए चारं चरति एगे०, वयं पुण एवं वदामो-ता दो जोयणाइं अड्डतालीसं च एगट्टिभागे जोयणस्स एगमेगं मंडलं एगमेगेणं राइंदिएणं विकंपइत्ता सूरिए चारं चरति, तत्थ णं को हेतू इति वदेज्जा ?, ता अयणं जंबुद्दीवे जाव परिक्खेवेणं पं०, ता जता णं सूरिए सब्भंतरं मंडलं उवसंकमित्ता चारं चरति तता णं उत्तमकट्टपत्ते उक्कोसए अट्टारसमुहुत्ते दिवसे भवति जहणिया दुवालसमुहुत्ता राई भवइ, से णिक्खममाणे सूरिए णवं संवच्छरं अयमाणे पढमंसि अहोरत्तंसि अब्भितराणंतरं मंडलं उवसंकमित्ता चारं चरति, ता जया णं सूरिए अब्भितराणंतरं मंडलं उवसंकमित्ता चारं चरति तदा णं दो जोयणाइं अड्डयालीसं च एगट्टिभागे जोयणस्स एगेणं राइंदिएणं विकंपइत्ता चारं चरति तता णं अट्टारसमुहुत्ते दिवसे भवति दोहिं एगट्टिभागमुहुत्तेहिं ऊणे दुवालसमुहुत्ता राई भवति दोहिं एगट्टिभागमुहुत्तेहिं अहिया, से णिक्खममाणे सूरिए दोच्चंसि अहोरत्तंसि अब्भितरं तच्चं मंडलं उवसंकमित्ता चारं चरति, ता जया णं सूरिए अब्भितरं तच्चं मंडलं उवसंकमित्ता चारं चरति तता णं पंच जोयणाइं पणतीसं च एगट्टिभागे जोयणस्स दोहिं राइंदिएहिं विकंपइत्ता चारं चरति तता णं अट्टारसमुहुत्ते दिवसे भवति चउहिं एगट्टिभागमुहुत्तेहिं ऊणे दुवालसमुहुत्ता राई भवति चउहिं एगट्टिभागमुहुत्तेहिं अधिया, एवं खलु एतेणं उवाएणं णिक्खममाणे सूरिए तताणंतराओ तदाणंतरं मंडलातो मंडलं संकममाणे २ दो २ जोयणाइं अड्डतालीसं च एगट्टिभागे जोयणस्स एगमेगं मंडलं एगमेगेणं राइंदिएणं विकम्पमाणे २ सब्बाहिरं मंडलं उवसंकमित्ता चारं चरति, ता जया णं सूरिए सब्भंतरातो मंडलातो सब्बाहिरं मंडलं उवसंकमित्ता चारं चरति तथा णं सब्भंतरं मंडलं पणिहाय एगेणं तेसीतेणं राइंदियसतेणं पंचदसुत्तरजोयणसते विकंपइत्ता चारं चरति तता णं उत्तमकट्टपत्ता उक्कोसिया अट्टारसमुहुत्ता राई भवइ जहणए दुवालसमुहुत्ते दिवसे भवति, एस णं पढमे छम्मासे एस णं पढमछम्मासस्स पज्जवसाणे, से य पविसमाणे सूरिए दोच्चं छम्मासं अयमाणे पढमंसि अहोरत्तंसि बाहिराणंतरं मंडलं उवसंकमित्ता चारं चरति, ता जता णं सूरिए बाहिराणंतरं मंडलं उवसंकमित्ता चारं चरति तथा णं दो दो जोयणाइं अड्डयालीसं च एगट्टिभागे जोयणस्स एगमेगेणं

राइंदिएणं विकम्पइत्ता चारं चरति तता णं अट्टारसमुहुत्ता राई भवति दोहिं एगट्टिभागमुहुत्तेहिं ऊणा दुवालसमुहुत्ते दिवसे भवति दोहिं एगट्टिभागमुहुत्तेहिं अहिए, से पविसमाणे सूरिए दोच्चंसि अहोरत्तंसि बाहिरं तच्चं मंडलं उवसंकमित्ता चारं चरति, ता जया णं सूरिए बाहिरं तच्चं मंडलं उवसंकमित्ता चारं चरति तथा णं पंच जोयणाइं पणतीसं च एगट्टि-भागे जोयणस्स दोहिं राइंदिएहिं विकंपइत्ता चारं चरति, राइंदिए तहेव, एवं खलु एतेणुवाएणं पविसमाणे सूरिए ततोऽणंतरातो तयाणंतरं मंडलाओ मंडलं संकममाणे २ दो २ जोय-णाइं अडयालीसं च एगट्टिभागे जोयणस्स एगमेगेणं राइंदिएणं विकंपमाणे २ सब्भंतंरं मंडलं उवसंकमित्ता चारं चरति, ता जया णं सूरिए सब्बाहिरातो मंडलातो सब्भंतंरं मंडलं उवसंकमित्ता चारं चरति तता णं सब्बाहिरं मंडलं पणिधाय एगेणं तेसीएणं राइंदियसतेणं पंचदसुत्तरे जोयणसते विकंपइत्ता चारं चरति तता णं उत्तमकट्टपत्ते उक्कोसए अट्टारसमुहुत्ते दिवसे भवति जहणिया दुवालसमुहुत्ता राई भवइ, एस णं दोच्चे छम्मासे एस णं दोच्चस्स छम्मासस्स पज्जवसाणे एस णं आदिच्चे संवच्छरे एस णं आदिच्चस्स संवच्छरस्स पज्ज-वसाणे । १८॥ १-६॥ ता कहं ते मंडलसंठिती आहिताति वदेज्जा ?, तत्थ खलु इमातो अट्ट पडिवत्तीओ पं०, तत्थेगे एवमाहंसु-ता सब्बावि मंडलवता समचउरंसंठाणसंठिता पं० एगे एव०, एगे पुण०-ता सब्बावि णं मंडलवता विसमचउरंसंठाणसंठिया पं० एगे एव०, एगे पुण० सब्बावि णं मंडलवया समचतुक्कोणसंठिता पं० एगे ए०, एगे पुण० सब्बावि मंडलवता विसमचउक्कोणसंठिया पं० एगे एव०, एगे पुण० ता सब्बावि मंडल० समचक्कवालसंठिया पं० एगे एव०, एगे पुण०-ता सब्बावि मंडलवता विसमचक्कवालसंठिया पं० एगे एव०, एगे पुण०-ता सब्बावि मंडलवता चक्कद्वचक्कवालसंठिया पं० एगे एव०, एगे पुण०-ता सब्बावि मंडलवता छत्तागारसंठिया पं० एगे एवमाहंसु, तत्थ जे ते एवमाहंसु ता सब्बावि मंडलवता छत्ताकारसंठिता पं० एतेणं णएणं णेयब्वं, णो चेव णं इतरेहिं, पाहुडगाहाओ भाणियब्बाओ । १९॥ १-७॥ ता सब्बावि णं मंडलवया केवतियं बाहल्लेणं केवतियं आयामविकखंभेणं केवतियं परिकखेवेणं आहिताति वदेज्जा ?, तत्थ खलु इमा तिण्णि पडिवत्तीओ पं०, तत्थेगे एवमाहंसु-ता सब्बावि णं मंडलवता जोयणं बाहल्लेणं एगं जोयणसहस्सं एगं तेत्तीसं जोय-णसतं आयामविकखंभेणं तिण्णि जोयणसहस्साइं तिण्णि य नवणउए जोयणसते परिकखेवेणं पं० एगे एव०, एगे पुण०-ता सब्बावि णं मंडलवता जोयणं बाहल्लेणं एगं जोयणसहस्सं एगं च चउत्तीसं जोयणसयं आयामविकखंभेणं तिण्णि जोयणसहस्साइं चत्तारि बिउत्तरे जोयणसते परिकखेवेणं पं० एगे एव०, एगे पुण०-ता जोयणं बाहल्लेणं एगं जोयणसहस्सं एगं च पणतीसं जोयणसतं आयामविकखंभेणं तिन्नि जोयणसहस्साइं चत्तारि पंचुत्तरे जोयणसते परिकखेवेणं पं० एगे एव०, वयं पुण०-ता सब्बावि मंडलवता अडतालीसं एगट्टिभागे जोयणस्स बाहल्लेणं अणियता आयामविकखंभेणं परिकखेवेणं च आहिताति वदेज्जा, तत्थ णं को हेऊत्ति वदेज्जा ?, ता अयणं जंबुहीवे जाव परिकखेवेणं, ता जया णं सूरिए सब्भंतंरं मंडलं उवसंकमित्ता चारं चरति तथा णं सा मंडलवता अडतालीसं एगट्टिभागे जोयणस्स बाहल्लेणं णवणउइजोयणसहस्साइं छच्च चत्ताले जोयणसते आयामविकखंभेणं तिण्णि जो-यणसतसहस्साइं पण्णरसजोयणसहस्साइं एगूणणउतिं जोयणाइं किंचिविसेसाहिए परिकखेवेणं, तता णं उत्तमकट्टपत्ते उक्कोसए अट्टारसमुहुत्ते दिवसे भवति जहणिया दुवालसमुहुत्ता राई भवति, से णिकखममाणे सूरिए णवं संवच्छरं अयमाणे पढमंसि अहोरत्तंसि अब्भितराणंतरं मंडलं उवसंकमित्ता चारं चरति, ता जया णं सूरिए अब्भितराणंतरं मंडलं उवसंकमित्ता चारं चरति तदा णं सा मंडलवता अडयालीसं एगट्टिभागे जोयणस्स बाहल्लेणं णवणवइं जोयणसहस्साइं छच्च पणताले जोयणसते पणतीसं च एगट्टिभागे जोयणस्स आयामविकखं-भेणं तिण्णि जोयणसतसहस्साइं पन्नरसं च सहस्साइं एगं सत्तुत्तरं जोयणसतं किंचिविसेसूणं परिकखेवेणं, तदा णं दिवसरातिप्पमाणं तहेव, से णिकखममाणे सूरिए दोच्चंसि अहोरत्तंसि अब्भितरं तच्चं मंडलं उवसंकमित्ता चारं चरति, ता जया णं सूरिए अब्भितरं तच्चं मंडलं उवसंकमित्ता चारं चरति तथा णं सा मंडलवता अडतालीसं एगट्टिभागे जोयणस्स बाह-ल्लेणं णवणवतिजोयणसहस्साइं छच्च एक्कावण्णे जोयणसते णव य एगट्टिठभागा जोयणस्स आयामविकखंभेणं तिण्णि जोयणसहस्साइं पन्नरस य सहस्साइं एगं च पणवीसं जोयण-सयं परिकखेवेणं पं०, तता णं दिवसराई तहेव, एवं खलु एतेण उवाएणं निक्खममाणे सूरिए तताणंतरातो तदाणंतरं मंडलातो मंडलं उवसंकममाणे २ पंच २ जोयणाइं पणतीसं च एगट्टिभागे जोयणस्स एगमेगे मंडले विकखंभबाहल्लेणं अभिवड्ढेमाणे २ अट्टारस जोयणाइं परिरयवुड्ढिं अभिवड्ढेमाणे २ सब्बाहिरं मंडलं उवसंकमित्ता चारं चरति, ता जया णं सूरिए सब्भ० जाव चारं चरति तता णं सा मंडलवता अडतालीसं एगट्टिभागा जोयणस्स एगं च जोयणसयसहस्सं छच्च सद्धे जोयणसते आयामविकखंभेणं तिन्नि जोयणसयसहस्साइं अट्टारस सहस्साइं तिण्णि य पण्णरसुत्तरे जोयणसते परिकखेवेणं तदा णं उक्कोसिया अट्टारसमुहुत्ता राई भवति जहणिए दुवालसमुहुत्ते दिवसे भवति, एस णं पढमे छम्मासे एस णं पढमस्स छम्मासस्स पज्जवसाणे, से पविसमाणे सूरिए दोच्चं छम्मासं अयमाणे पढमंसि अहोरत्तंसि बाहिराणंतरं मंडलं उवसंकमित्ता चारं चरति, ता जया णं सूरिए बाहिराणंतरं मंडलं उवसं-



कमिन्ना चारं चरति तता णं सा मंडलवता अडतालीसं एगट्टिभागे जोयणस्स बाहल्लेणं एगं जोयणसयसहस्सं छच्च चउपण्णे जोयणसते छवीसं च एगट्टिभागे जोयणस्स आयामवि-  
क्खंभेणं तिण्णि जोयणसतसहस्साइं अट्टारस सहस्साइं दोण्णि य सत्ताणउते जोयणसते परिक्खेवेणं पं०, तता णं राइंदिए तहेव, से पविसमाणे सूरिए दोच्चंसि अहोरत्तंसि बाहिरं तच्चं  
मंडलं उवसंकमिन्ना चारं चरति, ता जया णं सूरिए बाहिरं तच्चं मंडलं उवसंकमिन्ना चारं चरति तता णं सा मंडलवता अडयालीसं एगट्टिभागे जोयणस्स बाहल्लेणं एगं जोयणस-  
तसहस्सं छच्च अडयाले जोयणसए बावण्णं च एगट्टिभागे जोयणस्स आयामविक्खंभेणं तिण्णि जोयणसतसहस्साइं अट्टारस सहस्साइं दोण्णि अउणासीते जोयणसते परिक्खेवेणं  
पं०, दिवसराई तहेव, एवं खलु एतेणुवाएणं पविसमाणे सूरिए तताणंतरातो तदाणंतरं मंडलातो मंडलं संकममाणे २ पंच जोयणाइं पणतीसं च एगट्टिभागे जोयणस्स एगमेगे मंडले  
विक्खंभवुडिंढ णिवुड्ढेमाणे २ अट्टारस जोयणाइं परिरयवुडिंढ णिवुड्ढेमाणे २ सव्वभंतरं मंडलं उवसंकमिन्ना चारं चरति, ता जया णं सूरिए सव्वभंतरं मंडलं उवसंकमिन्ना चारं चरति  
तता णं सा मंडलवया अडयालीसं एगट्टिभागे जोयणस्स बाहल्लेणं णवणउतिं जोयणसहस्साइं छच्च चत्ताले जोयणसए आयामविक्खंभेणं तिण्णि जोयणसयसहस्साइं पण्णरस य  
सहस्साइं अउणाणउतिं च जोयणाइं किंचिविसेसाहियाइं परिक्खेवेणं पं०, तता णं उत्तमकट्ठपत्ते उक्कोसए अट्टारसमुहुत्ते दिवसे भवति जहण्णिया दुवालसमुहुत्ता राई भवति,  
एस णं दोच्चे छम्मासे एस णं दोच्चस्स छम्मासस्स पज्जवसाणे एस णं आदिच्चे संवच्छरे एस णं आदिच्चस्स संवच्छरस्स पज्जवसाणे, ता सव्वावि णं मंडलवता अडतालीसं एगट्टिभागे जोयणस्स  
बाहल्लेणं, सव्वावि णं मंडलंतरिया दो जोयणाइं विक्खंभेणं, एस णं अद्धा तेसीयसतपडुप्पण्णो पंच दसुत्तरे जोयणसते आहि०, ता अब्भितरातो मंडलवताओ बाहिरं मंडलवतं बाहिराओ वा  
मंडलावताओ अब्भितरं मंडलवतं एस णं अद्धा केवतियं आहि०?, ता पंच दसुत्तरजोयणसते आहिताति वदेज्जा, अब्भितराते मंडलवताते बाहिरा मंडलवया बाहिराओ मंडलवतातो अ-  
ब्भितरा मंडलवता एस णं अद्धा केवतियं आहि०?, ता पंच दसुत्तरे जोयणसते अडतालीसं च एगट्टिभागे आहि०, ता अब्भितरातो मंडलवतातो बाहिरमंडलवता बाहिरातो० अब्भितरमं-  
डलवता एस णं अद्धा केवतियं आहि०?, ता पंच णवुत्तरे जोयणसते तेरस य एगट्टिभागे जोयणस्स आहि०, अब्भितराते मंडलवताए बाहिरा मंडलवया बाहिराते मंडलवताते अब्भं-  
तरमंडलवया एस णं अद्धा केवतियं आहिताति वदेज्जा?, ता पंच दसुत्तरे जोयणसए आहियत्ति वदेज्जा । २०॥१-८॥ ता कहां ते तेरिच्छगती आहिताति वदेज्जा?, तत्थ खलु  
इमाओ अट्ट पडिवत्तीओ पं०, तत्थेगे एवमाहुंसु-ता पुरच्छिमातो लोअंतातो पादो मरीची आगासंसि उट्टेति से णं इमं लोयं तिरियं करेइ ता पच्चत्थिमंसि लोयंतंसि सायंमि सूरिए  
आगासंसि विद्धसंसि एगे एवमा०, एगे पुण०-ता पुरच्छिमातो लोअंतातो पातो सूरिए आगासंसि उट्टेइ से णं इमं लोयं तिरियं करेति ता पच्चत्थिमंसि लोयंसि सूरिए आगासंसि  
विद्धंसति, एगे एव०, एगे पुण०-ता पुरत्थिमाओ लोयंतातो पादो सूरिए आगासंसि उत्तिट्ठति से इमं लोयं तिरियं करेति ता पच्चत्थिमंसि लोयंसि सायं सूरिए आगासं अणुपविसति  
त्ता अहे पडियागच्छति ता पुणरवि अवरभूपुरत्थिमातो लोयंतातो पातो सूरिए आगासंसि उत्तिट्ठति एगे एवमा०, एगे पुण०-ता पुरत्थिमाओ लोयंताओ पाओ सूरिए पुढवीओ  
उत्तिट्ठति, से णं इमं लोयं तिरियं करेति ता पच्चत्थिमिल्लंसि लोयंतंसि सायं सूरिए पुढवीकायंसि विद्धंसइ एगे एव०, एगे पुण०-पुरत्थिमाओ लोयंताओ पाओ सूरिए पुढवीओ  
उत्तिट्ठइ से णं इमं लोयं तिरियं करेइ ता पच्चत्थिमंसि लोयंतंसि सायं सूरिए पुढवीकायं अणुपविसइ ता अहे पडियागच्छइ ता पुणरवि अवरभूपुरत्थिमाओ लोयंताओ पाओ सूरिए  
पुढवीओ उत्तिट्ठइ एगे एव०, एगे पुण०-ता पुरत्थिमिल्लाओ लोयंताओ पाओ सूरिए आउकायंसि उत्तिट्ठइ से णं इमं लोयं तिरियं करेइ ता पच्चत्थिमंसि लोयंतंसि सायं सूरिए  
आउकायंसि विद्धंसति एगे एव०, एगे पुण०-ता पुरत्थिमातो लोयंताओ पाओ सूरिए आउओ उत्तिट्ठति, से णं इमं तिरियं लोयं तिरियं करेति ता पच्चत्थिमंसि लोयंतंसि सायं  
सूरिए आउकायंसि पविसइ ता अहे पडियागच्छति ता पुणरवि अवरभूपुरत्थिमातो लोयंताओ पादो सूरिए आउओ उत्तिट्ठति एगे एव०, एगे पुण०-ता पुरत्थिमातो लोयंताओ बहूइं  
जोयणाइं बहूइं जोयणसताइं बहूइं जोयणसहस्साइं उड्ढं दूरं उप्पत्तिता एत्थ णं पातो सूरिए आगासंसि उत्तिट्ठति से णं इमं दाहिणड्ढं लोयं तिरियं करेति ता उत्तरद्धलोयं तमेव  
रातो से णं इमं उत्तरद्धलोयं तिरियं करेइ ता दाहिणद्धलोयं तमेव राओ, से णं इमाइं दाहिणुत्तरद्धलोयाइं तिरियं करेइ ता पुरत्थिमाओ लोयंताओ बहूइं जोयणाइं तं चेव उड्ढं दूरं  
उप्पत्तिता एत्थ णं पातो सूरिए आगासंसि उत्तिट्ठति एगे एव०, वयं पुण एवं वयामो-ता जंबुदीवस्स पाईणपडीणायतउदीणदाहिणायताए जीवाए मंडलं चउव्वीसेणं सतेणं छेत्ता  
दाहिणपुरच्छिमंसि उत्तरपच्चत्थिमंसि य चउव्वभागमंडलंसि इमीसे रयणप्पभाए पुढवीए बहुसमरमणिजातो भूमिभागातो अट्ठ जोयणसताइं उड्ढं उप्पत्तिता एत्थ णं पादो दुवे  
सूरिया आगासाओ उत्तिट्ठति, ते णं इमाइं दाहिणुत्तराइं जंबुदीवभागाइं तिरियं करेति ता पुरत्थिमपच्चत्थिमाइं जंबुदीवभागाइं तामेव रातो ते णं इमाइं पुरच्छिमपच्च- (१९६)

७८४ सूर्यप्रज्ञप्ति: ५१५५-८

मुनि दीपरत्नसागर

त्थिमाइं जंबुदीवभागाइं तिरियं करेति ता दाहिणुत्तराइं जंबुदीवभागाइं तामेव रातो, ते णं इमाइं दाहिणुत्तराइं पुरच्छिमपच्चत्थिमाणि य जंबुदीवभागाइं तिरियं करेति ता जंबुदी-  
 वस्स पाईणपडीणायत० एत्थ णं पादो दुवे सूरिया आगासाओ उत्तिट्ठंति । २१ ॥ २-१ ॥ ता कहं ते मंडलाओ मंडलं संकममाणे २ सूरिए चारं चरति आहि०?, तत्थ खलु इमातो  
 दुवे पडिवत्तीओ पं०, तत्थेगे एवमाहंसु-ता मंडलातो मंडलं संकममाणे २ सूरिए भेयघाएणं संकमइ एगे एव०, एगे पुण०-ता मंडलाओ मंडलं संकममाणे सूरिए कण्णकलं णिव्वे-  
 देति, तत्थ जे ते एवमाहंसु ता मंडलातो मंडलं संकममाणे भेयघाएणं संकमइ तेसिं णं अयं दोसे-ता जेणंतरेणं मंडलातो मंडलं संकममाणे २ सूरिए भेयघाएणं संकमति एवतियं च  
 णं अद्धं पुरतो न गच्छति, पुरतो अगच्छमाणे मंडलकालं परिह्वेति, तेसिं णं अयं दोसे, तत्थ जे ते एवमाहंसु-ता मंडलातो मंडलं संकममाणे सूरिए कण्णकलं णिव्वेदेति तेसिं णं अयं  
 विसेसे-ता जेणंतरेणं मंडलातो मंडलं संकममाणे सूरिए कण्णकलं णिव्वेदेति एवतियं च णं अद्धं पुरतो गच्छति पुरतो गच्छमाणे मंडलकालं ण परिह्वेति तेसिं णं अयं विसेसे, तत्थ  
 जे ते एवमाहंसु-मंडलातो मंडलं संकममाणे सूरिए कण्णकलं णिव्वेदेति एतेणं णएणं णेतव्वं, णो चेव णं इतरेणं । २२ ॥ २-२ ॥ ता केवतियं ते खेत्तं सूरिए एगमेगेणं मुहुत्तेणं गच्छति  
 आहि०?, तत्थ खलु इमातो चत्तारि पडिवत्तीओ पं०, तत्थ एगे०-ता छ छ जोयणसहस्साइं सूरिए एगमेगेणं मुहुत्तेणं गच्छति एगे०, एगे पुण०-ता पंच पंच जोयणसहस्साइं सूरिए  
 एगमेगेणं मुहुत्तेणं गच्छति एगे एव०, एगे पुण०-ता चत्तारि २ जोयणसहस्साइं सूरिए एगमेगेणं मुहुत्तेणं गच्छति एगे०, एगे पुण०-ता छवि पंचवि चत्तारिवि जोयणसहस्साइं  
 सूरिए एगमेगेणं मुहुत्तेणं गच्छति एगे०, तत्थ जे ते एवमाहंसु ता छ छ जोयणसहस्साइं सूरिए एगमेगेणं मुहुत्तेणं गच्छति ते एव०-जता णं सूरिए सब्भंतंरं मंडलं उवसंकमित्ता  
 चारं चरति तथा णं उत्तमकट्टपत्ते उक्कोसे अट्टारसमुहुत्ते दिवसे भवति जहणिया दुवालसमुहुत्ता राई भवति, तंसिं च णं दिवसंसि एगं जोयणसतसहस्सं अट्ट य जोयणसहस्साइं  
 तावक्खेत्ते पं०, ता जया णं सूरिए सब्बाहिरं मंडलं उवसंकमित्ता चारं चरति तथा णं उत्तमकट्टपत्ता उक्कोसिया अट्टारसमुहुत्ता राई भवति जहणिए दुवालसमुहुत्ते दिवसे भवति,  
 तंसिं च णं दिवसंसि बावत्तारिं जोयणसहस्साइं तावक्खेत्ते पं०, तथा णं छ छ जोयणसहस्साइं सूरिए एगमेगेणं मुहुत्तेणं गच्छति, तत्थ जे ते एवमाहंसु ता पंच जोयणसहस्साइं सूरिए  
 एगमेगेणं मुहुत्तेणं गच्छति ते एव०-ता जता णं सूरिए सब्भंतंरं मंडलं उवसंकमित्ता चारं चरति, तहेव दिवसराइप्पमाणं, तंसिं च णं तावक्खेत्तं नउइजोयणसहस्साइं, ता जया णं सूरिए  
 सब्बाहिरं मंडलं उवसंकमित्ता चारं चरति तता णं तं चेव राइंदियप्पमाणं, तंसिं च णं दिवसंसि सट्ठिं जोयणसहस्साइं तावक्खेत्ते पं०, तता णं पंच २ जोयणसहस्साइं सूरिए एगमेगेणं  
 मुहुत्तेणं गच्छति, तत्थ जे ते एव० ता चत्तारि जोयणसहस्साइं सूरिए एगमेगेणं मुहुत्तेणं गच्छति ते एव०-ता जया णं सूरिए सब्भंतंरं मंडलं उवसंकमित्ता चारं चरति तता णं  
 दिवसराइं तहेव, तंसिं च णं दिवसंसि बावत्तारिं जोयणसहस्साइं तावक्खेत्ते पं०, ता जया णं सूरिए सब्बाहिरं मंडलं उवसंकमित्ता चारं चरति तता णं राइंदियं तथेव, तंसिं च णं दिव-  
 वसंसि अडयालीसं जोयणसहस्साइं तावक्खेत्ते पं०, तता णं चत्तारि २ जोयणसहस्साइं सूरिए एगमेगेणं मुहुत्तेणं गच्छति, तत्थ जे ते एवमाहंसु छवि पंचवि चत्तारिवि जोयणसह-  
 स्साइं सूरिए एगमेगेणं मुहुत्तेणं गच्छति ते एव०-ता सूरिए णं उग्गमणमुहुत्तंसि अत्थमणमुहुत्तंसि य सिग्घगती भवति तता णं छ छ जोयणसहस्साइं एगमेगेणं मुहुत्तेणं गच्छति,  
 मज्झिमतावक्खेत्तं समासादेमाणे २ सूरिए मज्झिमगती भवति, तता णं पंच २ जोयणसहस्साइं एगमेगेणं मुहुत्तेणं गच्छति, मज्झिमं तावक्खेत्तं संपत्ते सूरिए मंदगती भवति, तता णं  
 चत्तारि जोयणसहस्साइं एगमेगेणं मुहुत्तेणं गच्छति, तत्थ को हेत्तुत्ति वदेज्जा?, ता अयण्णं जंबुदीवे दीवे जाव परिक्खेवेणं, ता जया णं सूरिए सब्भंतंरं मंडलं उवसंकमित्ता चारं  
 चरति तता णं दिवसराइं तहेव तंसिं च णं दिवसंसि एक्काणउत्तिं जोयणसहस्साइं तावक्खेत्ते पं०, ता जया णं सूरिए सब्बाहिरं मंडलं उवसंकमित्ता चारं चरति तता णं राइंदियं तहेव,  
 तस्सिं च णं दिवसंसि एगट्टिजोयणसहस्साइं तावक्खेत्ते पं०, तता णं छवि पंचवि चत्तारिवि जोयणसहस्साइं सूरिए एगमेगेणं मुहुत्तेणं गच्छति एगे एव०, वयं पुण एवं वदामो-ता सा-  
 तिरेगाइं पंच २ जोयणसहस्साइं सूरिए एगमेगेणं मुहुत्तेणं गच्छति, तत्थ को हेत्तुत्ति वदेज्जा?, ता अयण्णं जंबुदीवे० परिक्खेवेणं, ता जता णं सूरिए सब्भंतंरं मंडलं उवसंकमित्ता  
 चारं चरति तता णं पंच २ जोयणसहस्साइं दोण्णि य एकावण्णे जोयणसए एगूणतीसं च सट्ठिभागे जोयणस्स एगमेगेणं मुहुत्तेणं गच्छति, तता णं इधगतस्स मणूसस्स सीतालीसाए  
 जोयणसहस्सेहिं दोहि य तेवट्ठेहिं जोयणसतेहिं एकवीसाए य सट्ठिभागेहिं जोयणस्स सूरिए चक्खुप्फासं हव्वमागच्छति, तथा णं दिवसराइं तहेव, से णिक्खममाणे सूरिए णवं संवच्छरं  
 अयमाणे पढमंसि अहोरत्तंसि अब्भितराणंतंरं मंडलं उवसंकमित्ता चारं चरति, ता जया णं सूरिए अब्भितराणंतंरं मंडलं उवसंकमित्ता चारं चरति तता णं पंच २ जोयणसहस्साइं  
 दोण्णि य एकावण्णे जोयणसते सीतालीसं च सट्ठिभागे जोयणस्स एगमेगेणं मुहुत्तेणं गच्छति, तता णं इहगयस्स मणूसस्स सीतालीसाए जोयणसहस्सेहिं अउणासीते य जोयणसतेहिं

सत्तावणाए सट्टिभागेहिं जोयणस्स सट्टिभागं च एगसट्टिहा छेत्ता अउणावीसाए चुण्णियाभागेहिं सूरिए चक्खुप्फासं हव्वमागच्छति, तता णं दिवसराई तहेव, (१८-११, १२-११), से णिक्खममाणे सूरिए दोच्चंसि अहोरत्तंसि अब्भितरं तच्चं मंडलं उवसंकमित्ता चारं चरति, ता जया णं सूरिए अब्भितरं तच्चं मंडलं उवसंकमित्ता चारं चरति तता णं पंच २ जोयणस-हस्साइं दोण्णि य बावण्णे जोयणसते पंच य सट्टिभागे जोयणस्स एगमेगेणं मुहुत्तेणं गच्छति, तता णं इहगतस्स मणूसस्स सीतालीसाए जोयणसहस्सेहिं छण्णउतीए य जोयणेहिं तेत्तीसाए य सट्टिभागेहिं जोयणस्स सट्टिभागं च एगट्टिघा छेत्ता दोहिं चुण्णियाभागेहिं सूरिए चक्खुप्फासं हव्वमागच्छति, तता णं दिवसराई तहेव, एवं खलु एतेणं उवाएणं णिक्खम-माणे सूरिए तताणंतराओ तदाणंतरं मंडलातो मंडलं संकममाणे २ अट्टारस २ सट्टिभागे जोयणस्स एगमेगे मंडले मुहुत्तगतिं अभिवुड्ढेमाणे २ चुलसीतिं २ जोयणाइं पुरिसच्छायं णिवुड्ढेमाणे २ सब्बाहिरं मंडलं उवसंकमित्ता चारं चरति, ता जया णं सूरिए सब्बाहिरं मंडलं उवसंकमित्ता चारं चरति तता णं पंच २ जोयणसहस्साइं तिप्पि य पंचुत्तरे जोयणसते पण्णरस य सट्टिभागे जोयणस्स एगमेगेणं मुहुत्तेणं गच्छति, तता णं इहगतस्स मणूसस्स एकतीसाए जोयणसहस्सेहिं अट्टहिं एकतीसेहिं जोयणसतेहिं तीसाए य सट्टिभागेहिं जोय-णस्स सूरिए चक्खुप्फासं हव्वमागच्छति, तता णं उत्तमकट्टपत्ता उक्कोसिया अट्टारसमुहुत्ता राई भवइ जहण्णाए दुवालसमुहुत्ते दिवसे भवति, एस णं पढमे छम्मासे एस णं पढमस्स छम्मासस्स पज्जवसाणे, से पविसमाणे सूरिए दोच्चं छम्मासं अयमाणे पढमंसि अहोरत्तंसि बाहिराणंतरं मंडलं उवसंकमित्ता चारं चरति, ता जता णं सूरिए बाहिराणंतरं मंडलं उवसंक-मित्ता चारं चरति तता णं पंच २ जोयणसहस्साइं तिप्पि य चउरुत्तरे जोयणसते सत्तावण्णं च सट्टिभाए जोयणस्स मुहुत्तेणं गच्छति, तता णं इधगतस्स मणूसस्स एकतीसाए जोयणसहस्सेहिं नवहि य सोलेहिं जोयणसएहिं एगुणतालीसाए सट्टिभागेहिं जोयणस्स सट्टिभागं च एगट्टिहा छेत्ता सट्टीए चुण्णियाभागेहिं सूरिए चक्खुप्फासं हव्वमागच्छति, तता णं राइंदियं तहेव, से पविसमाणे सूरिए दोच्चंसि अहोरत्तंसि बाहिरं तच्चं मंडलं उवसंकमित्ता चारं चरति, ता जया णं सूरिए बाहिरं तच्चं मंडलं उवसंकमित्ता चारं चरति तता णं पंच २ जोयणसहस्साइं तिप्पि य चउरुत्तरे जोयणसते ऊतालीसं च सट्टिभागे जोयणस्स एगमेगेणं मुहुत्तेणं गच्छति, तता णं इहगतस्स मणूसस्स एगाधिगेहिं बत्तीसाए जोयणसहस्सेहिं एका-वण्णाए य सट्टिभागेहिं जोयणस्स सट्टिभागं च एगट्टिघा छेत्ता तेवीसाए चुण्णियाभागेहिं सूरिए चक्खुप्फासं हव्वमागच्छति, राइंदियं तहेव, एवं खलु एतेणुवाएणं पविसमाणे सूरिए तताणंतरातो तताणंतरं मंडलातो मंडलं संकममाणे २ अट्टारस २ सट्टिभागे जोयणस्स एगमेगे मंडले मुहुत्तगइं णिवुड्ढेमाणे २ सातिरेगाइं पंचासीतिं २ जोयणाइं पुरिसच्छायं अभिवुड्ढेमाणे २ सब्बभंतरं मंडलं उवसंकमित्ता चारं चरति, ता जता णं सूरिए सब्बभंतरं मंडलं उवसंकमित्ता चारं चरति तता णं पञ्च २ जोयणसहस्साइं दोण्णि य एक्कावण्णे जो-यणसए अगुणतीसं च सट्टिभागे जोयणस्स एगमेगेणं मुहुत्तेणं गच्छति, तता णं इहगतस्स मणूसस्स सीतालीसाए जोयणसहस्सेहिं दोहि य तेवट्टेहिं जोयणसतेहिं एकवीसाए य सट्टि-भागेहिं जोयणस्स सूरिए चक्खुप्फासं हव्वमागच्छति, तता णं उत्तमकट्टपत्ते उक्कोसए अट्टारसमुहुत्ते दिवसे भवति जहण्णिया दुवालसमुहुत्ता राई भवति, एस णं दोच्चे छम्मासे एस णं दोच्चस्स छम्मासस्स पज्जवसाणे एस णं आदिच्चे संवच्छरे एस णं आदिच्चसंवच्छरस्स पज्जवसाणे । २३ ॥ बितियं पाहुडं २-३ ॥ ता केवतियं खेत्तं चंदिमसूरिया ओभासंति उज्जोवेति तवेति पगासंति आहि०?, तत्थ खलु इमाओ बारस पडिवत्तीओ पं०, तत्थेगे एवमा०-ता एगं दीवं एगं समुहं चंदिमसूरिया ओभासंति० एगे एव०, एगे० ता तिप्पि दीवे तिप्पि समुहे चंदि-मसूरिया ओभासंति० एगे एव०, एगे पुण०-ता अद्धचउत्थे (प्र० आउट्टे) दीवसमुहे चंदिमसूरिया ओभासंति० एगे एव०, एगे पुण०-ता सत्त दीवे सत्त समुहे चंदिमसूरिया ओभा-संति० एगे एव०, एगे पुण०-ता दस दीवे दस समुहे चंदिमसूरिया ओभासंति०, एगे पुण०-ता बारस दीवे बारस समुहे चंदिमसूरिया ओभासंति०, एगे पुण०-बायालीसं दीवे बाया-लीसं समुहे चंदिमसूरिया ओभासंति०, एगे पुण०-बावत्तरिं दीवे बावत्तरिं समुहे चंदिमसूरिया ओभासंति०, एगे पुण०-ता बायालं दीवसतं बायालं समुहसतं चंदिमसूरिया ओभा-संति०, एगे पुण०-ता बावत्तरिं दीवसतं बावत्तरिं समुहसतं चंदिमसूरिया ओभासंति०, एगे पुण०-ता बायालीसं दीवसहस्सं बायालं समुहसहस्सं चंदिमसूरिया ओभासंति०, एगे पुण०-ता बावत्तरं दीवसहस्सं बावत्तरं समुहसहस्सं चंदिमसूरिया ओभासंति० एगे एवमाहंसु, वयं पुण एवं वदामो-अयण्णं जंबुहीवे जाव परिकखेवेणं पं०, से णं एगाए जगतीए सब्बतो समंता संपरिक्खित्ते, सा णं जगती तहेव जहा जंबुहीवपन्नत्तीए जाव एवामेव सपुद्दावरेणं जंबुहीवे २ चोदस सलिलासयसहस्सा छप्पन्नं च सलिलासहस्सा भवन्तीतिमक्खाता, जंबुहीवे णं दीवे पंचचक्रभागसंठिता आहिताति वदेजा, ता कइं ते जंबुहीवे पंचचक्रभागसंठिते आहि०?, ता जता णं एते दुवे सूरिया सब्बभंतरं मंडलं उवसंकमित्ता चारं चरंति तदा णं जंबुही-वस्स तिप्पि पंचचक्रभागे ओभासेति०, तं०-एगेवि एगं दिवड्ढं पंचचक्रभागं ओभासेति० एगेवि एगं दिवड्ढं पंचचक्रभागं ओभासेति, तता णं उत्तमकट्टपत्ते उक्कोसए अट्टारस-

मुहुत्ते दिवसे भवति जहणिया दुवालसमुहुत्ता राई भवइ, ता जता णं एते दुवे सूरिया सब्बाहिरं मंडलं उवसंकमिता चारं चरति तदा णं जंबुद्वीवस्स० दोण्णि चक्रभागे ओभासति०, ता एगेवि एगं पंचचक्रवालभागं ओभासति० एगेवि एकं पंचचक्रवालभागं ओभासइ०, तता णं उत्तमकट्टपत्ता उक्कोसिया अट्टारसमुहुत्ता राई भवइ जहण्णए दुवालसमुहुत्ते दिवसे भवति । २४ ॥ ततियं पाहुडं ३ ॥ ता कंहं ते सेआते संठिई आहिता०?, तत्थ खलु इमा दुविहः संठिती पं० तं०-चंदिमसूरियसंठिती य तावखेत्तसंठिती य, ता कंहं ते चंदिमसूरियसंठिती आहिता०?, तत्थ खलु इमातो सोलस पडिवत्तीओ पं०, तत्थेगे एवमाहंसु-ता समचउरंससंठिता चंदिमसूरियसंठिती एगे एव०, एगे पुण०-ता विसमचउरंससंठिता चंदिमसूरियसंठिती पं०, एवं समचउक्कोणसंठिता विसमचउक्कोणसंठिया समचक्रवालसंठिता विसमचक्रवालसंठिता चक्रद्वचक्रवालसंठिता पं० एगे एव०, एगे पुण०-ता छत्तागारसंठिता चंदिमसूरियसंठिती पं०, गेहसंठिता गेहावणसंठिता पासादसंठिता गोपुरसंठिया पेच्छाघरसंठिता वलभीसंठिता हम्मियतलसंठिता वालग्गपोतियासंठिता चंदिमसूरियसंठिती पं०, तत्थ जे ते एवमा०-ता समचउरंससंठिता चंदिमसूरियसंठिती पं० एतेणं णएणं णेतव्वं, णो चेव णं इतरेहिं, ता कंहं ते तावक्खेत्तसंठिती आहिता०?, तत्थ खलु इमाओ सोलस पडिवत्तीओ पं०, तत्थ णं एगे एवमाहंसु-ता गेहसंठिता तावखेत्तसंठिती पं०, एवं जाव वालग्गपोतियासंठिता तावखेत्तसंठिती, एगे पुण एवमा०-ता जस्संठिते जंबुद्वीवे तस्संठिता तावक्खेत्तसंठिती एगे एव०, एगे पुण०-ता जस्संठिते भारहे वासे तस्सं०, एवं उज्जाणसंठिया निज्जाणसंठिता एगतो णिसहसंठिता दुहतो णिसहसंठिता सेयणगसंठिता एगे एव०, एगे पुण० ता सेणगपट्टसंठिता तावखेत्तसं० एगे एवमाहंसु, वयं पुण एवं वदामो-ता उद्धीमुहकलंबुआपुप्फसंठिता तावखेत्तसंठिती पं० अंतो संकुडा बाहिं वित्थडा अंतो वट्टा बाहिं पिधुला अंतो अंकमुहसंठिता बाहिं सत्थिमुहसंठिता उभतो पासेणं तीसे दुवे बाहाओ अवट्ठिताओ भवंति पणतालीसं २ जोयणसहस्साइं आयामेणं, दुवे य णं तीसे बाहाओ अणवट्ठिताओ भवंति, तं०-सब्वभंतरिया चेव बाहा सब्बाहिरिया चेव बाहा, तत्थ को हेतूत्ति वदेज्जा?, ता अयणं जंबुद्वीवे जाव परिक्खेवेणं, ता जया णं सूरिए सब्बभंतरं मंडलं उवसंकमिता चारं चरति तता णं उद्धीमुहकलंबुआपुप्फसंठिता तावखेत्तसंठिती आहिताति वदेज्जा अंतो संकुडा बाहिं वित्थडा अंतो वट्टा बाहिं पिधुला अंतो अंकमुहसंठिता बाहिं सत्थिमुहसंठिता, दुहतो पासेणं तीसे तथेव जाव सब्बाहिरिया चेव बाहा, तीसे णं सब्बभंतरिया बाहा मंदरपट्टयंतेणं णव जोयणसहस्साइं चत्तारि य छलसीते जोयणसते णव य दसभागे जोयणस्स परिक्खेवेणं आहिता०, ता से णं परिक्खेवविसेसे कतो आहिता०?, ता जे णं मंदरस्स पट्टयस्स परिक्खेवे तं परिक्खेवं तीहिं गुणित्ता दसहिं छित्ता दसहिं भागे हीरमाणे एस णं परिक्खेवविसेसे आहिता०, तीसे णं सब्बाहिरिया बाहा लवणसमुहंतेणं चउणउत्तिं जोयणसहस्साइं अट्ट य अट्टसट्टे जोयणसते चत्तारि य दसभागे जोयणस्स परिक्खेवेणं आहिता०, ता से णं परिक्खेवविसेसे कतो आहिता०?, ता जे णं जंबुद्वीवस्स परिक्खेवे तं परिक्खेवे तीहिं गुणित्ता दसहिं छित्ता दसहिं भागे हीरमाणे एस णं परिक्खेवविसेसे आहिताति वदेज्जा, तीसे णं तावक्खेत्ते केवतियं आयामेणं आहिताति वदेज्जा?, ता अट्टत्तरिं जोयणसहस्साइं तिण्णि य तेत्तीसे जोयणसते जोयणतिभागे य आयामेणं आहितेति वदेज्जा, तया णं किंसंठिया अंधगारसंठिई आहितेति वदेज्जा?, उद्धीमुहकलंबुआपुप्फसंठिता तहेव जाव बाहिरिया चेव बाहा, तीसे णं सब्बभंतरिया बाहा मंदरपट्टयंतेणं छज्जोयणसहस्साइं तिण्णि य चउवीसे जोयणसते छच्च दसभागे जोयणस्स परिक्खेवेणं आहितेतिवदेज्जा, ता से णं परिक्खेवविसेसे कतो आहिते०?, ता जे णं मंदरस्स पट्टयस्स परिक्खेवे तं परिक्खेवं दोहिं गुणित्ता सेसं तहेव, तीसे णं सब्बाहिरिया बाहा लवणसमुहंतेणं तेवट्ठिं जोयणसहस्साइं दोण्णि य पणयाले जोयणसते छच्च दसभागे जोयणस्स परिक्खेवेणं आहिते०, ता से णं परिक्खेवविसेसे कतो आहिते०?, ता जे णं जंबुद्वीवस्स परिक्खेवे तं परिक्खेवं दोहिं गुणित्ता दसहिं छित्ता दसहिं भागे हीरमाणे एस णं परिक्खेवविसेसे आहिते०, ता से णं अंधकारे केवतियं आयामेणं आहिते०?, ता अट्टत्तरिं जोयणसहस्साइं तिण्णि य तेत्तीसे जोयणसते जोयणतिभागं च आयामेणं आहितेति वदेज्जा, तता णं उत्तमकट्टपत्ते अट्टारसमुहुत्ते दिवसे भवति जहण्णिया दुवालसमुहुत्ता राई भवइ, ता जया णं सूरिए सब्बाहिरं मंडलं उवसंकमिता चारं चरति तता णं किंसंठिता तावखेत्तसंठिती आहिता०?, ता उद्धीमुहकलंबुआपुप्फसंठिता तावक्खेत्तसंठिती आहिता०, एवं जं अब्भितरमंडले अंधकारसंठितीए पमाणं तं बाहिरमंडले तावक्खेत्तसंठितीए जं तहिं तावक्खेत्तसंठितीए तं बाहिरमंडले अंधकारसंठितीए भाणियव्वं जाव तता णं उत्तमकट्टपत्ता उक्कोसिया अट्टारसमुहुत्ता राई भवति जहण्णए दुवालसमुहुत्ते दिवसे भवति, ता जंबुद्वीवे सूरिया केवतियं खेत्तं उड्डं तवंति केवतियं खेत्तं अहे तवंति केवतियं खेत्तं तिरियं तवंति?, ता जंबुद्वीवे णं दीवे सूरिया एगं जोयणसतं उड्डं तवंति अट्टारस जोयणसताइं अथे तवंति सीतालीसं जोयणसहस्साइं दुन्नि य तेवट्टे जोयणसते एक्कवीसं च सट्टिभागे जोयणस्स तिरियं तवंति । २५ ॥ चउत्थं पाहुडं ४ ॥ ता कंसि णं सूरियस्स लेस्सा पडिहताति वदेज्जा?, तत्थ खलु इमाओ वीसं पडिवत्तीओ पं०, तत्थेगे एव०-ता मंदरंसि णं पट्टतांसि सूरियस्स लेस्सा पडि-

हता० एगे एव०, एगे पुण एव०-ता मेरुंसि णं पव्वतंसि सूरियस्स लेस्सा पडिहता० एगे एव०, एवं एतेणं अभिलावेणं भाणियच्चं, ता मणोरमंसि णं पव्वयंसि ता सुदंसणंसि णं पव्वयंसि ता सयंपभंसि णं पव्वतंसि ता गिरिरायंसि णं पव्वतंसि ता रतणुच्चयंसि णं पव्वतंसि ता सिलुच्चयंसि णं पव्वयंसि ता लोअमज्झंसि णं पव्वतंसि ता लोयणाभिसि णं पव्वतंसि ता अच्चंसि णं पव्वतंसि ता सूरियावत्तंसि णं पव्वतंसि ता सूरियावरणंसि णं पव्वतंसि ता उत्तमंसि णं पव्वयंसि ता दिसादिसि णं पव्वतंसि ता अवतंसंसि णं पव्वतंसि ता धरणिखीलंसि णं पव्वयंसि ता धर णिसिगंसि णं पव्वयंसि ता पव्वतिदंसि णं पव्वतंसि ता पव्वयरायंसि णं पव्वयंसि सूरियस्स लेसा पडिहता आहिताति वदेज्जा एगे एव०, वयं पुण एवं वदामो-ता मंदरेवि पवुच्चति जाव पव्वयरायावि वुच्चति, ता जे णं पुग्गला सूरियस्स लेसं फुसंति ते णं पुग्गला सूरियस्स लेसं पडिहणंति, अदिट्ठावि णं पोग्गला सूरियस्स लेस्सं पडिहणंति चरिमलेसंतरगतावि णं पोग्गला सूरियस्स लेस्सं पडिहणंति । २६ ॥ पंचमं पाहुडं ५ ॥ ता कहं ते ओयसंठिती आहिताति वदेज्जा ?, तत्थ खलु इमाओ पणवीसं पडिवत्तीओ पं०, तत्थेगे एवमाहंसु-ता अणुसमयमेव सूरियस्स ओया अण्णा उप्पज्जे अण्णा अवेति एगे एवमाहंसु, एगे पुण०-ता अणुमुहुत्तमेव सूरियस्स ओया अण्णा उप्पज्जति अण्णा अवेति, एतेणं अभिलावेणं णेतद्वा, ता अणुराहं-दियमेव ता अणुपक्खमेव ता अणुमासमेव ता अणुउउमेव ता अणुअयणमेव ता अणुसंवच्छरमेव ता अणुजुगमेव ता अणुवाससयमेव ता अणुवाससहस्समेव ता अणुवाससयसहस्समेव ता अणुपुव्वमेव ता अणुपुव्वसयमेव ता अणुपुव्वसहस्समेव ता अणुपुव्वसतसहस्समेव ता अणुपलितोवममेव ता अणुपलितोवमसतमेव ता अणुपलितोवमसहस्समेव ता अणुपलितो-वमसयसहस्समेव ता अणुसागरोवममेव ता अणुसागरोवमसतमेव ता अणुसागरोवमसहस्समेव ता अणुसागरोवमसयसहस्समेव एगे एवमाहंसु ता अणुउस्सप्पिणीओसप्पिणिमेव सूरिय-स्स ओया अण्णा उप्पज्जति अण्णा अवेति एगे एवमाहंसु, वयं पुण एवं वदामो-ता तीसं २ मुहुत्ते सूरियस्स ओया अवट्ठिता भवति, तेण परं सूरियस्स ओया अणवट्ठिता भवति, छम्मासे सूरिए ओयं णिवुड्ढेति छम्मासे सूरिए ओयं अभिवड्ढेति, णिक्खममाणे सूरिए देसं णिवुड्ढेति पविसमाणे सूरिए देसं अभिवुड्ढेइ, तत्थ को हेतूति वदेज्जा ?, ता अयणं जंबुद्वीवे सव्वदीवसमुद्दाणं जाव परिकखेवेणं, ता जया णं सूरिए सव्वभंतरं मंडलं उव० चारं चरति तता णं उत्तमकट्टपत्ते उक्कोसए अट्टारसमुहुत्ते दिवसे भवति जहणिया दुवालस-मुहुत्ता राई भवति, से णिक्खममाणे सूरिए णवं संवच्छरं अयमाणे पढमंसि अहोरत्तंसि अब्भितराणंतरं मंडलं उवसंकमित्ता चारं चरति, ता जया णं सूरिए अब्भितराणंतरं मंडलं उवसंकमित्ता चारं चरति तता णं एगेणं राइंदिएणं एगं भागं ओयाए दिवसखेत्तस्स णिवुड्ढेत्ता रतणिक्खेत्तस्स अभिवड्ढेत्ता चारं चरति मंडलं अट्टारसहिं तीसेहिं सतेहिं छित्ता, तता णं अट्टारसमुहुत्ते दिवसे भवति दोहिं एगट्ठिभागमुहुत्तेहिं ऊणे दुवालसमुहुत्ता राई भवति दोहिं एगट्ठिभागमुहुत्तेहिं अहिया, से णिक्खममाणे सूरिए दोच्चंसि अहोरत्तंसि अब्भि-तरं तच्चं मंडलं उवसंकमित्ता चारं चरति, ता जया णं सूरिए अब्भितरं तच्चं मंडलं उवसंकमित्ता चारं चरति तता णं दोहिं राइंदिएहिं दो भागे-ओयाए दिवसखेत्तस्स णिवुड्ढेत्ता रय-णिखेत्तस्स अभिवड्ढेत्ता चारं चरति मंडलं अट्टारसतीसेहिं सएहिं छेत्ता, तता णं अट्टारसमुहुत्ते दिवसे भवति चउहिं एगट्ठिभागमुहुत्तेहिं ऊणे दुवालसमुहुत्ता राई भवति चउहिं एगट्ठिभागमुहुत्तेहिं अहिया, एवं खलु एतेणुवाएणं निक्खममाणे सूरिए तयाणंतराओ तदाणंतरं मंडलातो मंडलं संकममाणे २ एगमेगे मंडले एगमेगेणं राइंदिएणं एगमेगं भागं ओयाए दिवसखेत्तस्स णिवुड्ढेमाणे २ रयणिखेत्तस्स अभिवड्ढेमाणे २ सव्वबाहिरं मंडलं उवसंकमित्ता चारं चरति, ता जया णं सूरिए सव्वभंतरातो मंडलातो सव्वबाहिरं मंडलं उवसं-कमित्ता चारं चरति तता णं सव्वभंतरं मंडलं पणिधाय एगेणं तेसीतेणं राइंदियसतेणं सगं तेसीतं भागसतं ओयाए दिवसखेत्तस्स णिवुड्ढेत्ता रयणिखेत्तस्स अभिवड्ढेत्ता चारं चरति मंडलं अट्टारसहिं तीसेहिं सयेहिं छेत्ता, तता णं उत्तमकट्टपत्ता उक्को० अट्टारसमुहुत्ता राई भवति जह० दुवालसमुहुत्ते दिवसे भवति, एस णं पढमे छम्मासे एस णं पढमस्स छम्मासस्स पज्जवसाणे, से पविसमाणे सूरिए दोच्चं छम्मासं अयमाणे पढमंसि अहोरत्तंसि बाहिराणंतरं मंडलं उवसंकमित्ता चारं चरति, ता जया णं सूरिए बाहिराणंतरं मंडलं उवसंकमित्ता चारं चरति तता णं एगेणं राइंदिएणं एगं भागं ओयाए रतणिक्खेत्तस्स णिवुड्ढेत्ता दिवसखेत्तस्स अभिवड्ढेत्ता चारं चरति मंडलं अट्टारसहिं तीसेहिं सएहिं छेत्ता, तता णं अट्टारसमुहुत्ता राई भवति दोहिं एगट्ठिभागमुहुत्तेहिं ऊणा दुवालसमुहुत्ते दिवसे भवति दोहिं एगट्ठिभागमुहुत्तेहिं अधिए, से पविसमाणे सूरिए दोच्चंसि अहोरत्तंसि बाहिरं तच्चं मंडलं उवसंकमित्ता चारं चरति, ता जया णं सूरिए बाहिरं तच्चं मंडलं उवसंकमित्ता चारं चरति तता णं दोहिं राइंदिएहिं दो भाए ओयाए रयणिखेत्तस्स णिवुड्ढेत्ता दिवसखेत्तस्स अभिवड्ढेत्ता चारं चरति मंडलं अट्टारसहिं तीसेहिं सएहिं छेत्ता, तया णं अट्टारसमुहुत्ता राई भवति चउहिं एगट्ठिभागमुहुत्तेहिं ऊणा दुवालसमुहुत्ते दिवसे भवति चउहिं एगट्ठिभागमुहुत्तेहिं अधिए, एवं खलु एतेणुवाएणं पविसमाणे सूरिए तयाणंतरातो तदाणंतरं मंडलातो मंडलं संकममाणे २ एगमेगे मंडले एगमेगेणं राइंदिएणं एगमेगं भागं ओयाए रयणिखेत्तस्स णिवुड्ढेमाणे २ दिवसखेत्तस्स अभिवड्ढेमाणे २ सव्वभंतरं मंडलं उवसंकमित्ता चारं चरति ता जया णं सूरिए सव्वबाहिरातो मंडलातो सव्वभंतरं मंडलं उवसंकमित्ता चारं चरति तता णं (१९७)

सब्रबाहिरं मंडलं पणिधाय एगेणं तेसीतेणं राइंदियसएणं एगं तेसीतं भागसतं ओयाए रयणिखित्तस्स णिवुड्ढेत्ता दिवसखेत्तस्स अभिवड्ढेत्ता चारं चरति मंडलं अट्टारसतीसेहिं सएहिं छेत्ता, तता णं उत्तमकट्टपत्ते उक्कोसए अट्टारसमुहुत्ते दिवसे भवति जहणिया दुवालसमुहुत्ता राई भवति, एस णं दोच्चे छम्मासे एस णं दोच्चस्स छम्मासस्स पज्जवसाणे एस णं आदिच्चे संवच्छरे एस णं आदिच्चस्स संवच्छरस्स पज्जवसाणे । २७ । छट्ठं पाहुडं ६ ॥ ता के ते सूरियं वरंति आहिताति वदेज्जा ?, तत्थ खलु इमाओ वीसं पडिवत्तीओ पं०, तत्थेगे एवमाहंसु-ता मंदरे णं पव्वते सूरियं वरयति आहितेति वदेज्जा एगे एवमा०, एगे पुण०-ता मेरू णं पव्वते सूरियं वरति आहि०, एवं एएणं अभिलावेणं णेतवं जाव पव्वतराये णं पव्वते सूरियं वरयति आहिते० तं एगे एवमाहंसु, वयं पुण एवं वदामो-ता मंदरेवि पवुच्चति तहेव जाव पव्वतराएवि पवुच्चति, ता जे णं पोग्गला सूरियस्स लेसं फुसंति ते पोग्गला सूरियं वरयंति अदिट्ठावि णं पोग्गला सूरियं वरयंति, चरमलेसंतरगतावि णं पोग्गला सूरियं वरयति । २८ ॥ सत्तमं पाहुडं ॥ ता कहं ते उदयसंठिती आहितेति वदेज्जा ?, तत्थ खलु इमाओ तिण्णि पडिवत्तीओ पं०, तत्थेगे एवमाहंसु-ता जया णं जंबुदीवे० दाहिणड्ढे अट्टारसमुहुत्ते दिवसे भवति तता णं उत्तरड्ढेवि अट्टारसमुहुत्ते दिवसे भवति जया णं उत्तरड्ढे अट्टारसमुहुत्ते दिवसे भवति तथा णं दाहिणड्ढेऽवि अट्टारसमुहुत्ते दिवसे भवति, जदा णं जंबुदीवे दाहिणड्ढे सत्तरसमुहुत्ते दिवसे भवति तथा णं उत्तरड्ढेवि सत्तरसमुहुत्ते दिवसे भवति, जया णं उत्तरड्ढे सत्तरसमुहुत्ते दिवसे भवति तदा णं दाहिणड्ढेवि सत्तरसमुहुत्ते दिवसे भवति, एवं परिहावेतवं, सोलसमुहुत्ते दिवसे पण्णरस० दिवसे चउदस० दिवसे तेरस० दिवसे जाव ता जया णं जंबुदीवे दाहिणड्ढे बारसमुहुत्ते दिवसे तथा णं उत्तरद्वेवि बारसमुहुत्ते दिवसे भवति, जता णं उत्तरद्वे बारसमुहुत्ते दिवसे भवति तता णं दाहिणद्वेवि बारसमुहुत्ते दिवसे भवति, जता णं दाहिणद्वे बारसमुहुत्ते दिवसे भवति तता णं जंबुदीवे मंदरस्स पव्वयस्स पुरच्छिमपच्चत्थिमेणं सता पण्णरसमुहुत्ते दिवसे भवति सदा पण्णरसमुहुत्ता राई भवति, अवट्ठिता णं तत्थ राइंदिया पं० समणाउसो ! एगे एव०, एगे पुण०-जता णं जंबुदीवे दाहिणद्वे अट्टारसमुहुत्ताणंतरे दिवसे भवति तथा णं उत्तरद्वेवि अट्टारसमुहुत्ताणंतरे दिवसे भवइ, जया णं उत्तरद्वे अट्टारसमुहुत्ताणंतरे दिवसे भवइ तता णं दाहिणड्ढेवि अट्टारसमुहुत्ताणंतरे दिवसे भवइ, एवं परिहावेतवं, सत्तरसमुहुत्ताणंतरे दिवसे भवति सोलसमुहुत्ताणंतरे० पण्णरसमुहुत्ताणंतरे० चोदसमुहुत्ताणंतरे० तेरसमुहुत्ताणंतरे०, जया णं जंबुदीवे दाहिणद्वे बारसमुहुत्ताणंतरे दिवसे भवति तदा णं उत्तरद्वेवि बारसमुहुत्ताणंतरे दिवसे, जता णं उत्तरद्वे बारसमुहुत्ताणंतरे दिवसे भवइ तथा णं दाहिणद्वेवि बारसमुहुत्ताणंतरे दिवसे भवति तदा णं जंबुदीवे २ मंदरस्स पव्वयस्स पुरत्थिमपच्चत्थिमेणं णो सदा पण्णरसमुहुत्ते दिवसे भवति णो सदा पण्णरसमुहुत्ता राई भवति, अणवट्ठिता णं तत्थ राइंदिया पं० समणाउसो ! एगे एव०, एगे पुण०-ता जया णं जंबुदीवे २ दाहिणड्ढे अट्टारसमुहुत्ते दिवसे भवति तदा णं उत्तरद्वे दुवालसमुहुत्ता राई भवति जया णं उत्तरद्वे अट्टारसमुहुत्ते दिवसे भवति तदा णं दाहिणड्ढे बारसमुहुत्ता राई भवइ जया णं दाहिणड्ढे अट्टारसमुहुत्ताणंतरे दिवसे भवति तदा णं उत्तरद्वे बारसमुहुत्ता राई भवइ, जता णं उत्तरद्वे अट्टारसमुहुत्ताणंतरे दिवसे भवति तदा णं दाहिणद्वे बारसमुहुत्ता राई भवति, एवं णेतवं सगलेहि य अणंतरेहि य एक्केके दो दो आलावगा, सब्रहिं दुवालसमुहुत्ता राई भवति, जाव ता जता णं जंबुदीवे दाहिणद्वे बारसमुहुत्ताणंतरे दिवसे भवति तदा णं उत्तरद्वे दुवालसमुहुत्ता राई भवति जया णं उत्तरद्वे दुवालसमुहुत्ताणंतरे दिवसे भवति तदा णं दाहिणद्वे दुवालसमुहुत्ता राई भवति, तता णं जंबुदीवे मन्दरस्स पव्वयस्स पुरत्थिमपच्चत्थिमेणं णेवत्थि पण्णरसमुहुत्ते दिवसे भवति णेवत्थि पण्णरसमुहुत्ता राई भवति, वोच्छिण्णा णं तत्थ राइंदिया पं० समणाउसो ! एगे एवमा०, वयं पुण एवं वदामो-ता जंबुदीवे २ सूरिया उदीणपाईणमुग्गच्छ पाईणदाहिणमागच्छंति, पाईणदाहिणमुग्गच्छ दाहिणपडीणमागच्छंति, दाहिणपडीणमुग्गच्छ पडीणउदीणमागच्छन्ति पडीणउदीणमुग्गच्छ उदीणपाईणमागच्छन्ति, ता जता णं जंबुदीवे दीवे दाहिणद्वे दिवसे भवति तदा णं उत्तरद्वे दिवसे भवति, जदा णं उ० तदा णं जंबुदीवे दीवे मंदरस्स पव्वयस्स पुरच्छिमपच्चत्थिमेणं राई भवति, ता जया णं जंबुदीवे २ मंदरस्स पव्वयस्स पुरत्थिमेणं दिवसे भवति तदा णं पच्चत्थिमेणवि दिवसे भवति, जया णं पच्चत्थिमेणं दिवसे भवति तदा णं जंबुदीवे २ मंदरस्स पव्वयस्स उत्तरदाहिणेणं राई भवति, ता जया णं दाहिणद्वेवि उक्कोसए अट्टारसमुहुत्ते दिवसे भवति तथा णं उत्तरद्वे उक्कोसए अट्टारसमुहुत्ते दिवसे भवति, जदा उत्तरद्वे० तदा णं जंबुदीवे दीवे मंदरस्स पव्वयस्स पुरत्थिमेणं जहणिया दुवालसमुहुत्ता राई भवति, ता जया णं जंबुदीवे दीवे मन्दरस्स पव्वयस्स पुरच्छिमेणं उक्कोसए अट्टारसमुहुत्ते दिवसे भवति तता णं पच्चत्थिमेणवि उक्कोसए अट्टारसमुहुत्ते दिवसे भवति, जता णं पच्चत्थिमेणं उक्कोसए अट्टारसमुहुत्ते दिवसे भवति तता णं जंबुदीवे दीवे मंदरस्स पव्वयस्स उत्तरदाहिणेणं जहणिया दुवालसमुहुत्ता राई भवति, एवं एएणं गमेणं णेतवं, अट्टारसमुहुत्ताणंतरे दिवसे सातिरेगदुवालसमुहुत्ता राई भवति, सत्तरसमुहुत्ते दिवसे तेरसमुहुत्ता राई सत्तरसमुहुत्ताणंतरे दिवसे सातिरेगतेरसमुहुत्ता राई सोलसमुहुत्ते दिवसे चोदसमुहुत्ता राई सोलसमुहुत्ताणंतरे दिवसे सातिरेगचोदसमुहुत्ता राई

पण्णरसमुहुत्ते दिवसे पण्णरसमुहुत्ता राई पण्णरसमुहुत्ताणंतरे दिवसे सातिरेगपण्णरसमुहुत्ता राई भवइ चउदसमुहुत्ते दिवसे सोलसमुहुत्ता राई चोदसमुहुत्ताणंतरे दिवसे सातिरेगसो-  
लसमुहुत्ता राई तेरसमुहुत्ते दिवसे सत्तरसमुहुत्ता राई, तेरसमुहुत्ताणंतरे दिवसे सातिरेगसत्तरसमुहुत्ता राई, जहण्णए दुवालसमुहुत्ते दिवसे भवति उक्कोसिया अट्टारसमुहुत्ता राई भवइ,  
एवं भणितब्रं, ता जया णं जंबुद्दीवे दीवे दाहिणद्धे वासाणं पढमे समए पडिवज्जति तदा णं उत्तरद्धेवि वासाणं पढमे समए पडिवज्जति, जता णं उत्तरद्धे वासाणं पढमे समए पडि-  
वज्जति तदा णं जंबुद्दीवे मंदरस्स पव्वयस्स पुरच्छिमपच्चत्थिमेणं अणंतरपुरक्खडकालसमयंसि वासाणं पढमे समए पडिवज्जइ, ता जया णं जंबुद्दीवे० मंदरस्स पव्वयस्स पुरच्छिमेणं  
वासाणं पढमे समए पडिवज्जइ तदा णं पच्चत्थिमेणवि वासाणं पढमे समए पडिवज्जइ, जया णं पच्चत्थिमेणं वासाणं पढमे समए पडिवज्जइ तदा णं जंबुद्दीवे मंदरदाहिणेणं अणंतर-  
पच्छाकयकालसमयंसि वासाणं पढमे समए पडिवण्णे भवति, जहा समओ एवं आवलिया आणापाणू थोवे लवे मुहुत्ते अहोरत्ते पक्खे मासे उऊ, एवं दस आलावगा जहा वासाणं  
एवं हेमंताणं गिम्हाणं च भाणितद्वा, ता जता णं जंबुद्दीवे दाहिणद्धे पढमे अयणे पडिवज्जति तदा णं उत्तरद्धेवि पढमे अयणे पडिवज्जइ जता णं उत्तरद्धे पढमे अयणे पडिवज्जति तदा  
णं दाहिणद्धेवि पढमे अयणे पडिवज्जइ, जता णं उत्तरद्धे पढमे अयणे पडिवज्जति तदा णं जंबुद्दीवे मंदरस्स पव्वयस्स पुरत्थिमपच्चत्थिमेणं अणंतरपुरक्खडकालसमयंसि पढमे अयणे  
पडिवज्जति, ता जया णं जंबुद्दीवे मंदरस्स पव्वयस्स पुरत्थिमेणं पढमे अयणे पडिवज्जति तदा णं पच्चत्थिमेणवि पढमे अयणे पडिवज्जइ, जया णं पच्चत्थिमेणं पढमे अयणे पडिवज्जइ  
तदा णं जंबुद्दीवे मंदरस्स पव्वयस्स उत्तरदाहिणेणं अणंतरपच्छाकडकालसमयंसि पढमे अयणे पडिवण्णे भवति, जहा अयणे तहा संवच्छरे जुगे वाससते, एवं वाससहस्से वाससयस-  
हस्से पुव्वंगे पुव्वे एवं जाव सीसपहेलिया पलितोवमे सागरोवमे, ता जया णं जंबुद्दीवे दाहिणद्धे ओसप्पिणी पडिवज्जति तदा णं उत्तरद्धेवि ओसप्पिणी पडिवज्जति, जता णं उत्तरद्धे  
ओसप्पिणी पडिवज्जति तदा णं जंबुद्दीवे मंदरस्स पव्वयस्स पुरत्थिमपच्चत्थिमेणं णेवत्थि ओसप्पिणी णेव अत्थि उस्सप्पिणी अवट्टिते णं तत्थ काले पं० समणाउसो !, एवं उस्सप्पिणी-  
वि, ता जया णं लवणे समुद्दे दाहिणद्धे दिवसे भवति तदा णं लवणसमुद्दे उत्तरद्धे दिवसे भवति जता णं उत्तरद्धे दिवसे भवति तदा णं लवणसमुद्दे पुरच्छिमपच्चत्थिमेणं राई भवति,  
जहा जंबुद्दीवे तहेव जाव उस्सप्पिणी तहा धायइसंडे णं दीवे सूरिया ओदीणं० तहेव, ता जता णं धायइसंडे दीवे दाहिणद्धे दिवसे भवति तदा णं उत्तरद्धेवि दिवसे भवति, जता णं उत्तरद्धे  
दिवसे भवति तदा णं धायइसंडे दीवे मंदराणं पव्वताणं पुरत्थिमपच्चत्थिमेणं राई भवति, एवं जंबुद्दीवे जहा तहेव जाव उस्सप्पिणी, कालोए णं जहा लवणे समुद्दे तहेव, ता अब्भंतर-  
पुक्खरद्धे णं सूरिया उदीणपाईणमुग्गच्छ तहेव ता जया णं अब्भंतरपुक्खरद्धेणं दाहिणद्धे दिवसे भवति तदा णं उत्तरद्धेवि दिवसे भवति, जता णं उत्तरद्धे दिवसे भवति तदा णं अत्थि-  
तरपुक्खरद्धे मंदराणं पव्वताणं पुरत्थिमपच्चत्थिमे णं राई भवति, सेसं जहा जंबुद्दीवे तहेव जाव ओस्सप्पिणीउसप्पिणीओ । २९ ॥ अट्टमं पाहुडं ८ ॥ ता कतिकट्टं ते सूरिए पोरिसी-  
च्छायं णिब्वत्तेति आहिते०?, तत्थ खलु इमाओ तिण्णि पडिवत्तीओ पं०, तत्थेगे एवमाहुंसु-जे णं पोग्गला सूरियस्स लेसं फुसंति ते णं पोग्गला संतप्पंति, ते णं पोग्गला संतप्पमाणा  
तदणंतराई बाहिराई पोग्गलाइ संतावेत्तीति एस णं से समिते तावक्खेत्ते एगे०, एगे पुण०-ता जे णं पोग्गला सूरियस्स लेसं फुसंति ते णं पोग्गला नो संतप्पंति, ते णं पोग्गला असंतप्पमाणा  
तदणंतराई बाहिराई पोग्गलाइ णो संतावेत्तीति एस णं से समिते तावक्खेत्ते एगे एव०, एगे पुण०-ता जे णं पोग्गला सूरियस्स लेसं फुसंति ते णं पोग्गला अत्थेगतिया संतप्पंति अत्थे-  
गतिया णो संतप्पंति, तत्थ अत्थेगइआ संतप्पमाणा तदणंतराई बाहिराई पोग्गलाइ अत्थेगतियाइ संतावेत्ति अत्थेगतियाइ णो संतावेत्ति, एस णं से समिते तावक्खेत्ते एगे एव०, वयं पुण  
एवं वदामो-ता जाओ इमाओ चंदिमसूरियाणं देवाणं विमाणेहिंतो लेसाओ बहित्ता उच्छूढा अभिणिसट्टाओ एतावंति, एतासि णं लेसाणं अंतरेसु अण्णतरीओ छिण्णलेसाओ संमु-  
च्छंति, तते णं ताओ छिण्णलेस्साओ समुच्छियाओ समाणीओ तदणंतराई बाहिराई पोग्गलाइ संतावेत्तीति एस णं से समिते तावक्खेत्ते । ३० । ता कतिकट्टे ते सूरिए पोरिसीच्छायं  
णिब्वत्तेति आहितेति वदेज्जा ?, तत्थ खलु इमाओ पणवीसं पडिवत्ताओ पं०, तत्थेगे एवं० ता अणुसमयमेव सूरिए पोरिसिच्छायं णिब्वत्तेइ आहिते० एगे एव०, एगे पुण०-ता अणु-  
मुहुत्तमेव सूरिए पोरिसिच्छायं णिब्वत्तेति आहिते०, एतेणं अभिलावेणं णेतब्रं, ता जाओ चेव ओयसंठितीए पणुवीसं पडिवत्तीओ ताओ चेव णेतद्वाओ जाव अणुउस्सप्पिणीमेव  
सूरिए पोरिसीए च्छायं णिब्वत्तेति आहिता० एगे एवं०, वयं पुण एवं वदामो-ता सूरियस्स णं उच्चत्तं च लेसं च पडुच्च छाउद्देसे उच्चत्तं च छायां च पडुच्च लेसुद्देसे लेसं च छायां च पडुच्च  
उच्चत्तोद्देसे, तत्थ खलु इमाओ दुवे पडिवत्तीओ पं०, तत्थेगे एवं०-ता अत्थि णं से दिवसे जंसि णं दिवसंसि सूरिए चउपोरिसीच्छायं निब्वत्तेइ, अत्थि णं से दिवसे जंसि णं दिवसंसि  
सूरिए दुपोरिसीच्छायं निब्वत्तेइ० एगे०, एगे पुण०-अत्थि णं से दिवसे जंसि णं दिवसंसि सूरिए दुपोरिसीच्छायं णिब्वत्तेति एगे एवं०, एगे पुण०-ता अत्थि णं से दिवसे जंसि णं दिवसंसि

७९० सूर्यप्रज्ञप्ति: ५१७५-०९

मुनि दीपरत्तसागर

सूरिए दुपोरिसीच्छायं णिव्वत्तेति अत्थि णं से दिवसे जंसि णं दिवसंसि सूरिए नो किंचि पोरिसिच्छायं णिव्वत्तेति, तत्थ जे ते एवमाहंसु-ता अत्थि णं से दिवसे जांस णं दिवसंसि सूरिए चउपोरिसियं छायां णिव्वत्तेति अत्थि णं से दिवसे जंसि णं दिवसंसि सूरिए दोपोरिसियं छायां निव्वत्तेइ ते एव०-ता जता णं सूरिए सब्बभंतरं मंडलं उवसंकमित्ता चारं चरति तता णं उत्तमकट्टपत्ते उक्कोसए अट्टारसमुहुत्ते दिवसे भवति जहणिया दुवालसमुहुत्ता राई भवति, तंसि च णं दिवसंसि सूरिए चउपोरिसीयं छायां निव्वत्तेति. ता उग्गमणमुहुत्तंसि य अत्थमणमुहुत्तंसि य लेसं अभिवड्ढेमाणे नो चेव णं णिव्वुड्ढेमाणे, ता जता णं सूरिए सब्बबाहिरं मंडलं उवसंकमित्ता चारं चरति तता णं उत्तमकट्टपत्ता उक्कोसिया अट्टारसमुहुत्ता राई भवति जहणए दुवालसमुहुत्ते दिवसे भवति, तंसि च णं दिवसंसि सूरिए दुपोरिसियं छायां निव्वत्तेइ, तं०-उग्गमणमुहुत्तंसि य अत्थमणमुहुत्तंसि य लेसं अभिवड्ढेमाणे नो चेव णं निव्वुड्ढेमाणे, तत्थ णं जे ते एव०-ता अत्थि णं से दिवसे जंसि णं दिवसंसि सूरिए दुपोरिसियं छायां णिव्वत्तेइ, अत्थि णं से दिवसे जंसि णं दिवसंसि सूरिए णो किंचिपोरिसियं छायां णिव्वत्तेति ते एव०-ता जता णं सूरिए सब्बभंतरं मंडलं उवसंकमित्ता चारं चरति तता णं उत्तमकट्टपत्ते उक्कोसए अट्टारसमुहुत्ते दिवसे भवति जहणिया दुवालसमुहुत्ता राई भवति, तंसि च दिवसंसि सूरिए दुपोरिसियं छायां णिव्वत्तेति तं०-उग्गमणमुहुत्तंसि य अत्थमणमुहुत्तंसि य लेसं अभिवड्ढेमाणे णो चेव णं णिव्वुड्ढेमाणे, ता जया णं सूरिए सब्बबाहिरं मंडलं उवसंकमित्ता चारं चरति तता णं उत्तमकट्टपत्ता उक्कोसिया अट्टारसमुहुत्ता राई भवति जहणए दुवालसमुहुत्ते दिवसे भवति, तंसि च णं दिवसंसि सूरिए णो किंचि पोरिसीच्छायं णिव्वत्तेति तं०-उग्गमणमुहुत्तंसि य अत्थमणमुहुत्तंसि य, नो चेव णं लेसं अभिवड्ढेमाणे वा निव्वुड्ढेमाणे वा, ता कइकट्टं ते सूरिए पोरिसीच्छायं निव्वत्तेइ आहियत्ति वइज्जा ? तत्थ इमाओ छणउई पडिवत्तीओ पं०, तत्थेगे एवमाहंसु-अत्थि णं ते से देसे जंसि णं देसंसि सूरिए एगपोरिसीच्छायं निव्वत्तेइ एगे एव०, एगे पुण०-ता अत्थि णं से देसे जंसि देसंसि सूरिए दुपोरिसियं छायां णिव्वत्तेति, एवं एतेणं अभिलावेणं गेत्तं, जाव छणउत्तिं पोरिसियं छायां णिव्वत्तेति, तत्थ जे ते एवमाहंसु-ता अत्थि णं से देसे जंसि णं देसंसि सूरिए एगपोरिसियं छायां णिव्वत्तेति ते एवमाहंसु-ता सूरियस्स णं सब्बहेट्टिमातो सूरप्पडिहितो बहित्ता अभिणिसट्टाहिं लेसाहिं ताडिज्जमाणीहिं इमीसे रयणप्पभाए पुढवीए बहुसमरमणिज्जाओ भूमिभागाओ जावतियं सूरिए उड्ढं उच्चत्तेणं एवतियाए एगाए अद्दाए एगेणं छायाणुमाणप्पमाणेणं उमाए तत्थ से सूरिए एगपोरिसीयं छायां णिव्वत्तेति, तत्थ जे ते एवमाहंसु-ता अत्थि णं से देसे जंसि णं देसंसि सूरिए दुपोरिसिं छायां णिव्वत्तेति ते एवमाहंसु-ता सूरियस्स णं सब्बहेट्टिमातो सूरियपडिधीतो बहित्ता आभिणिसताहिं लेसाहिं ताडिज्जमाणीहिं इमीसे रयणप्पभाए पुढवीए बहुसमरमणिजातो भूमिभागातो जावतियं सूरिए उड्ढं उच्चत्तेणं एवतियाहिं दोहिं अद्दाहिं दोहिं छायाणुमाणप्पमाणेहिं उमाए एत्थ णं से सूरिए दुपोरिसियं छायां णिव्वत्तेति, एवं णेयत्तं जाव तत्थ जे ते एवमाहंसु-ता अत्थि णं से देसे जंसि णं देसंसि सूरिए छणउत्तिं पोरिसियं छायां णिव्वत्तेति ते एवमाहंसु-ता सूरियस्स णं सब्बहिट्टिमातो सूरप्पडिधीओ बहित्ता अभिणिसट्टाहिं लेसाहिं ताडिज्जमाणीहिं इमीसे रयणप्पभाए पुढवीए बहुसमरमणिजातो भूमिभागातो जावतियं सूरिए उड्ढं उच्चत्तेणं एवतियाहिं छणवतीए अद्दाहिं छणवतीए छायाणुमाणप्पमाणेहिं उमाए एत्थ णं से सूरिए छणउत्तिं पोरिसियं छायां णिव्वत्तेति एगे एव०, वयं पुण एवं वदामो-सातिरेगअउणट्टिपोरिसीणं सूरिए पोरिसी-छायां णिव्वत्तेति, अवद्वपोरिसी णं छाया दिवसस्स किं गते वा सेसे वा ?, ता तिभागे गते वा सेसे वा, ता पोरिसी णं छाया दिवसस्स किं गते वा सेसे वा ?, ता चउब्भागे गते वा सेसे वा, ता दिवद्वपोरिसी णं छाया दिवसस्स किं गते वा सेसे वा ?, ता पंचमभागे गते वा सेसे वा, एवं अद्वपोरिसिं छोढुं पुच्छा, दिवसस्स भागं छोढुं वा करणं जाव ता अद्वअउणासट्टिपोरिसीच्छाया दिवसस्स किं गते वा सेसे वा ?, ता एगुणवीससतभागे गते वा सेसे वा, ता अउणसट्टिपोरिसी णं छाया दिवसस्स किं गते वा सेसे वा ?, बावीससयसहस्सभागे गते वा सेसे वा, ता सातिरेगअउणसट्टिपोरिसी णं छाया दिवसस्स किं गते वा सेसे वा ?, ता णत्थि किंचि गते वा सेसे वा, तत्थ खलु इमा पणवीसनिविट्टा छाया पं० तं०-खंभछाया रज्जुछाया पागारछाया पासायछाया उवग्ग(प्र० तर)छाया उच्चत्तछाया अणुलोमछाया पडिलोमछाया आरुभिता उवहिता (१०) समा पडिहता खीलछाया पक्खच्छाया पुरतोउदग्गा पुरिमकंठ-भाउवगता पच्छिमकंठभाउगता छायाणुवादिणी कट्टाणुवादिणीछाया छायाछाया (२०) छायाविकंप्पो वेहासछाया कडछाया गोलछागा पिट्टओदग्गा, तत्थ णं गोलछाया अट्टविहा पं० तं०-गोलछाया अवद्वगोलछाया गोलगोलछाया अवद्वगोलगोलछाया गोलावलिच्छाया अवद्वगोलावलिछाया गोलपुंजछाया अवद्वगोलपुंजछाया । ३१ ॥ णवमं पाहुडं ९ ॥ ता जोगेति वत्थुस्स आवलियाणिवाते आहिते० ता कहं ने जोगेति वत्थुस्स आवलियाणिवाते आहिते०?, तत्थ खलु इमाओ पंच पडिवत्तीओ पं०, तत्थेगे एव०-ता सब्बेवि णं णक्खत्ता कत्तियादिया भरणिपज्जवसाणा एगे एव०, एगे पुण०-ता सब्बेवि णं णक्खत्ता महादीया अस्सेसपज्जवसाणा पं० एगे एव०, एगे पुण एव०-ता सब्बेवि णं णक्खत्ता धणिट्टादीया सव-



नपज्वसाणा पं० एगे एव०, एगे पुण०- ता सव्वेवि णं णक्खत्ता अस्सिणीआदीया रेवतिपज्वसाणा पं० एगे एव०, एगे पुण०-सव्वेवि णं णक्खत्ता भरणीआदिया अस्सिणीपज्व-  
 साणा पं० एगे एव०, वयं पुण एवं वदामो-सव्वेवि णं णक्खत्ता अभिईआदीया उत्तरासाढापज्वसाणा पं० तं०-अभिई सवणो जाव उत्तरासाढा । ३२ ॥ १०-१ ॥ ता क्हं ते मुहुत्तग्गे  
 आहि०?, ता एतेसिं णं अट्टावीसाए णक्खत्ताणं अत्थि णक्खत्ते जे णं णव मुहुत्ते सत्तावीसं च सत्तट्टिभागे मुहुत्तस्स चंदेणं सद्धिं जोयं जोएति, अत्थि णक्खत्ता जे णं पण्णरस मुहुत्ते  
 चंदेणं सद्धिं जोयं जोएति, अत्थि णक्खत्ता जे णं तीसं०, अत्थि णक्खत्ता जे णं पणतालीसं मुहुत्ते चंदेणं सद्धिं जोयं जोएति, ता एएसिं णं अट्टावीसाए नक्खत्ताणं कयरे नक्खत्ते जे  
 णं नव मुहुत्ते सत्तावीसं च सत्तट्टिभाए मुहुत्तस्स चंदेणं सद्धिं जोएति?, कयरे नक्खत्ता जे णं पण्णरस मुहुत्ते चंदेणं सद्धिं जोगं जोएति?, कतरे नक्खत्ता जे णं तीसं मुहुत्ते चंदेण सद्धिं  
 जोगं जोइति? कतरे नक्खत्ता जे णं पणयालीसं मुहुत्ते चंदेण सद्धिं जोयं जोइति?, ता एएसिं णं अट्टावीसाए णक्खत्ताणं तत्थ जे से णक्खत्ते जे णं णव मुहुत्ते सत्तावीसं च सत्तट्टि-  
 भागे मुहुत्तस्स चंदेण सद्धिं जोयं जोएति से णं एगे अभीयी, तत्थ जे ते णक्खत्ता जे णं पण्णरस मुहुत्ते चंदेणं सद्धिं जोयं जोएति ते णं छ, तं०-सतभिसया भरणी अद्दा अस्सेसा  
 साती जेट्टा, तत्थ जे ते णक्खत्ता जे णं तीसं मुहुत्ते चंदेण सद्धिं जोयं जोयंति ते पण्णरस, तं०-सवणे धणिट्टा पुब्बाभद्वता रेवती अस्सिणी कत्तिया मग्गसिर पुस्सो महा पुब्बाफग्गुणी  
 हत्थो चित्ता अणुराहा मूलो पुब्बाआसाढा, तत्थ जे ते णक्खत्ता जे णं पणतालीसं मुहुत्ते चंदेणं सद्धिं जोगं जोएति ते णं छ, तं०-उत्तराभद्वदा रोहिणी पुण्णसू उत्तराफग्गुणी विसाहा  
 उत्तरासाढा । ३३ । ता एतेसिं णं अट्टावीसाए णक्खत्ताणं अत्थि णक्खत्ते जे णं चत्तारि अहोरत्ते छच्च मुहुत्ते सूरेंण सद्धिं जोयं जोएति, अत्थि णक्खत्ता जे णं छ अहोरत्ते एक्कवीसं च  
 मुहुत्ते सूरेंण सद्धिं जोयं जोएति, अत्थि णक्खत्ता जे णं तेरस अहोरत्ते बारस य मुहुत्ते सूरेंण सद्धिं जोयं जोएति, अत्थि णक्खत्ता जे णं वीसं अहोरत्ते तिण्णि य मुहुत्ते सूरेंण सद्धिं जोयं  
 जोएति, ता एतेसिं णं अट्टावीसाए णक्खत्ताणं कतरे णक्खत्ते जे णं चत्तारि अहोरत्ते छच्च मुहुत्ते सूरेंण सद्धिं जोयं जोएति? कतरे णक्खत्ता जे णं छ अहोरत्ते एक्कवीसं मुहुत्ते सूरेंण सद्धिं  
 जोयं जोएति? कतरे णक्खत्ता जे णं तेरस अहोरत्ते बारस मुहुत्ते सूरेंण सद्धिं जोयं जोएति? कतरे णक्खत्ता जे णं वीसं अहोरत्ते तिण्णि य मुहुत्ते सूरेंण सद्धिं जोयं जोएति?, एतेसिं  
 णं अट्टावीसाए णक्खत्ताणं तत्थ जे से णक्खत्ते जे णं चत्तारि अहोरत्ते छच्च मुहुत्ते सूरेंण सद्धिं जोयं जोएति से णं अभीयी, तत्थ जे ते णक्खत्ता जे णं छ अहोरत्ते एक्कवीसं च मुहुत्ते  
 सूरिण सद्धिं जोयं जोएति ते णं छ, तं०-सतभिसया भरणी अद्दा अस्सेसा साती जेट्टा, तत्थ जे ते तेरस अहोरत्ते दुवालस य मुहुत्ते सूरेंण सद्धिं जोयं जोएति ते णं पण्णरस, तं०-  
 सवणो धणिट्टा पुब्बाभद्वता रेवती अस्सिणी कत्तिया मग्गसिर पूसो महा पुब्बाफग्गुणी हत्थो चित्ता अणुराधा मूलो पुब्बाआसाढा, तत्थ जे ते णक्खत्ता जे णं वीसं अहोरत्ते तिण्णि य  
 मुहुत्ते सूरेंण सद्धिं जोयं जोएति ते णं छ, तं०-उत्तराभद्वदा रोहिणी पुण्णसू उत्तराफग्गुणी विसाहा उत्तरासाढा । ३४ ॥ १०-२ ॥ ता क्हं ते एवंभागा आहि०?, एतेसिं णं अट्टावी-  
 साए णक्खत्ताणं अत्थि णक्खत्ता पुव्वंभागा समखेत्ता तीसतिमुहुत्ता पं०, अत्थि णक्खत्ता पच्छंभागा समखेत्ता तीसतिमुहुत्ता पं०, अत्थि णक्खत्ता णत्तंभागा अवड्ढखेत्ता पण्णर-  
 समुहुत्ता पं०, अत्थि णक्खत्ता उभयंभागा दिवड्ढखेत्ता पणतालीसमुहुत्ता पं०, ता एएसिं णं अट्टावीसाए णक्खत्ताणं कतरे णक्खत्ता पुव्वंभागा समखेत्ता तीसतिमुहुत्ता पं० कतरे  
 णक्खत्ता पच्छंभागा समखेत्ता तीसतिमुहुत्ता पं०? कतरे णक्खत्ता णत्तंभागा अवड्ढखेत्ता पण्णरसमुहुत्ता पं०? कतरे नक्खत्ता उभयंभागा दिवड्ढखेत्ता पणतालीसतिमुहुत्ता पं०?, ता  
 एतेसिं णं अट्टावीसाए णक्खत्ताणं तत्थ जे ते णक्खत्ता पुव्वंभागा समखेत्ता तीसतिमुहुत्ता पं० ते णं छ, तं०-पुब्बापोट्टवता कत्तिया मघा पुब्बाफग्गुणी मूलो पुब्बासाढा, तत्थ जे ते णक्खत्ता  
 पच्छंभागा समखेत्ता तीसतिमुहुत्ता पं० ते णं दस, तं०-अभिई सवणो धणिट्टा रेवती अस्सिणी मिगसिर पूसो हत्थो चित्ता अणुराधा, तत्थ जे ते णक्खत्ता णत्तंभागा अवड्ढखेत्ता  
 पण्णरसमुहुत्ता पं० ते णं छ, तं०-सयभिसया भरणी अद्दा अस्सेसा साती जेट्टा, तत्थ जे ते णक्खत्ता उभयंभागा दिवड्ढखेत्ता पणतालीसं मुहुत्ता पं० ते णं छ, तं०-उत्तरापोट्टवता  
 रोहिणी पुण्णसू उत्तराफग्गुणी विसाहा उत्तरासाढा । ३५ ॥ १०-३ ॥ ता क्हं ते जोगस्स आदी आहिताति वदेज्जा?, ता अभियीसवणा खलु दुवे णक्खत्ता पच्छाभागा समखित्ता  
 सातिरेगउत्तालीसतिमुहुत्ता तप्पढमयाए सायं चंदेण सद्धिं जोयं जोएति ततो पच्छा अवरं सातिरेयं दिवसं, एवं खलु अभिईसवणा दुवे णक्खत्ता एगराई एगं च सातिरेगं दिवसं चंदेण  
 सद्धिं जोगं जोएति ता जोयं अणुपरियट्टंति ता सायं चंदं धणिट्टाणं समप्पंति, ता धणिट्टा खलु णक्खत्ते पच्छंभागे समखेत्ते तीसतिमुहुत्ते तप्पढमयाए सायं चंदेण सद्धिं जोगं  
 जोएति ता ततो पच्छा राइं अवरं च दिवसं, एवं खलु धणिट्टाणक्खत्ते एगं च राइं एगं च दिवसं चंदेण सद्धिं जोयं जोएति ता जोयं अणुपरियट्टंति ता सायं चंदं सतभिसयाणं सम-  
 प्पेति, ता सतभिसया खलु णक्खत्ते णत्तंभागे अवड्ढखेत्ते पण्णरसमुहुत्ते ता पढमताए सायं चंदेण सद्धिं जाव जोएति णो लभति अवरं दिवसं, एवं खलु सयभिसया णक्खत्ते एगं राइं  
 चंदेण सद्धिं जोयं जोएति ता जोयं अणुपरियट्टंति ता तो चंदं पुब्बाणं पोट्टवताणं समप्पेति, ता पुब्बापोट्टवता खलु नक्खत्ते पुव्वंभागे समखेत्ते तीसतिमुहुत्ते तप्पढमताए पातो (१९८)

चंदेणं सद्धिं जोयं जोएति ततो पच्छा अवरराइं, एवं खलु पुत्रापोट्टवता णक्खत्ते एगं च दिवसं एगं च राइं चंदेणं सद्धिं जोयं जोएति ता जोयं अणुपरियट्टेति ता पातो चंदं उत्तरापोट्टवताणं समप्पेति, ता उत्तरापोट्टवता खलु नक्खत्ते उभयंभागे दिवड्ढखेत्ते पणतालीसमुहुत्ते तप्पढमयाए पातो चंदेण सद्धिं जोयं जोएति अवरं च रातिं ततो पच्छा अवरं दिवसं, एवं खलु उत्तरापोट्टवताणक्खत्ते दो दिवसे एगं च राइं चंदेण सद्धिं जोयं जोएति ता जोगं अणुपरियट्टेति ता सायं चंदं रेवतीणं समप्पेति, ता रेवती खलु णक्खत्ते पच्छंभागे समखेत्ते तीसतिमुहुत्ते तप्पढमताए सागं चंदेणं सद्धिं जोयं जोएति ततो पच्छा अवरं दिवसं, एवं खलु रेवतीणक्खत्ते एगं राइं एगं च दिवसं चंदेण सद्धिं जोयं जोएति ता जोयं अणुपरियट्टेति ता सागं चंदं अस्सिणीणं समप्पेति, ता अस्सिणी खलु णक्खत्ते पच्छिमभागे समखेत्ते तीसतिमुहुत्ते तप्पढमताए सागं चंदेण सद्धिं जोयं जोएति ततो पच्छा अवरं दिवसं, एवं खलु अस्सिणी-णक्खत्ते एगं राइं एगं च दिवसं चंदेण सद्धिं जोयं जोएति ता जोगं अणुपरियट्टेति ता सागं चंदं भरणीणं समप्पेति, ता भरणी खलु णक्खत्ते णत्तंभागे अवड्ढखेत्ते पण्णरसमुहुत्ते तप्पढमताए सागं चंदेण सद्धिं जोयं जोएति णो लभति अवरं दिवसं, एवं खलु भरणीणक्खत्ते एगं राइं चंदेणं सद्धिं जोयं जोएति ता जोयं अणुपरियट्टेति ता पादो चंदं कत्तियाणं समप्पेति, ता कत्तिया खलु णक्खत्ते पुत्रंभागे समक्खत्ते तीसइमुहुत्ते तप्पढमताए सागं चंदेणं सद्धिं जोगं जोएति ततो पच्छा राइं, एवं खलु कत्तिया णक्खत्ते एगं दिवसं एगं च राइं चंदेणं सद्धिं जोयं जोएति ता जोयं अणुपरियट्टेति ता पादो चंदं रोहिणीणं समप्पेति, रोहिणी जहा उत्तराभइवता मगसिरं जहा धणिट्टा अदा जहा सतभिसया पुणव्वसू जहा उत्तराभ-इवता पुस्सो जहा धणिट्टा अस्सेसा जहा सतभिसया मघा जहा पुत्राफग्गुणी २ जहा पुत्राभइवया उत्तराफग्गुणी जहा उत्तराभइवता जिट्टा जहा हत्थो चित्ता य जहा धणिट्टा साती जहा सतभिसया विसाहा जहा उत्तराभइवदा अणुराहा जहा धणिट्टा सयभिसया मूला पुत्रासाढा य जहा पुत्रभइपदा उत्तरासाढा जहा उत्तराभइवता । ३६ ॥ १०-४ ॥ ता कंहं ते कुला आहिं ? , तत्थ खलु इमे बारस कुला बारस उवकुला चत्तारि कुलोवकुला पं०, बारस कुला, तं०-धणिट्टाकुलं उत्तराभइ (प्र० पोट्ट)वता० अस्सिणी० कत्तिया० संठाणा० पुस्सा० महा० उत्तराफग्गुणी० चित्ता० विसाहा० मूला० उत्तरासाढाकुलं, बारस उवकुला तं०-सवणोउवकुलं पुत्रापोट्टवता० रेवती० भरणी० रोहिणी० पुणव्वसु० अस्सेसा० पुत्राफग्गुणी० हत्थो० साती० जेट्टा० पुत्रासाढा०, चत्तारि कुलोवकुला तं०-अभीयीकुलोवकुलं सतभिसया० अदा० अणुराधाकुलोवकुलं । ३७ ॥ १०-५ ॥ ता-कंहं ते पुण्णिमासिणी आहिं ? , तत्थ खलु इमाओ बारस पुण्णिमासिणीओ बारस अमावासाओ पं० तं०-साविट्टी पोट्टवती आसोई कत्तिया मगसिरी पोसी माही फग्गुणी चेत्ती विसाही जेट्टामूली आसाढी, ता सावि-ट्टिणं पुण्णिमासिणिं कति णक्खत्ता जोएति ? , ता तिण्णि णक्खत्ता जोइंति, तं०-अभिई सवणो धणिट्टा, ता पुट्टवतीणं पुण्णिमं कति णक्खत्ता जोएति ? , ता तिन्नि नक्खत्ता जोयंति तं०-सतिभिसया पुत्रापोट्टवता उत्तरापुट्टवता, ता आसोदिणं पुण्णिमं कति णक्खत्ता जोएति, ता दोण्णि णक्खत्ता जोएति, तं०-रेवती य अस्सिणी य, कत्तियणं पुण्णिमं कति णक्खत्ता जोएति ? , ता दोण्णि णक्खत्ता जोएति तं०-भरणी कत्तिया य, ता मागसिरीपुत्तिमं कति णक्खत्ता जोएति ? , ता दोण्णि णक्खत्ता जोएति, तं०-रोहिणी मगसिरो य, ता पोसिणं पुण्णिमं कति णक्खत्ता जोएति ? , ता तिण्णि णक्खत्ता जोएति, तं०-अदा पुणव्वसू पुस्सो, ता माहिणं पुण्णिमं कति णक्खत्ता जोएति ? , ता दोण्णि नक्खत्ता जोयंति, तं०-अस्सेसा महा य, ता फग्गुणीणं पुण्णिमं कति णक्खत्ता जोएति ? , ता दुन्नि नक्खत्ता जोएति तं०-पुत्राफग्गुणी उत्तराफग्गुणी य, ता चित्तिणं पुण्णिमं कति णक्खत्ता जोएति ? , ता दोण्णि० तं०-हत्थो चित्ता य, ता विसाहिणं पुण्णिमं कति णक्खत्ता जोएति ? , दोण्णि णक्खत्ता जोएति तं०-साती विसाहा य, ता जेट्टामूलिणं पुण्णिमासिणिं कति णक्खत्ता जोएति ? , ता तिन्नि णक्खत्ता जोयंति, तं०-अणुराहा जेट्टा मूला, आसाढिणं पुण्णिमं कति णक्खत्ता जोएति ? , ता दो णक्खत्ता जोएति, तं०-पुत्रासाढा उत्तरासाढा । ३८ । ता साविट्टिणं पुण्णिमासिं णं किं कुलं जोएति उवकुलं० कुलोवकुलं जोएति ? , ता कुलं वा० उवकुलं वा० कुलोवकुलं वा जोएति, कुलं जोएमाणे धणिट्टा णक्खत्ते० उवकुलं जोएमाणे सवणे णक्खत्ते जोएति, कुलोवकुलं जोएमाणे अभिईणक्खत्ते जोएति, साविट्टिं पुण्णिमं कुलं वा उवकुलं वा कुलोवकुलं वा जोएति, कुलेण वा उवकुलेण वा कुलोवकुलेण वा जुत्ता साविट्टी पुण्णिमा जुत्ताति वत्तं सिया, ता पोट्टवतिणं पुण्णिमं किं कुलं० उवकुलं० कुलोवकुलं वा जोएति ? , ता कुलं वा० उवकुलं वा० कुलोवकुलं वा जोएति, कुलं जोएमाणे उत्तरापोट्टवया णक्खत्ते जोएति, उवकुलं जोएमाणे पुत्रापोट्टवता णक्खत्ते जोएति, कुलोवकुलं जोएमाणे सतभिसया णक्खत्ते जोएति, पोट्टवतिणं पुण्णिमासिणिं कुलं वा उवकुलं वा कुलोवकुलं वा जोएति, कुलेण वा० जुत्ता पुट्टवती पुण्णिमा जुत्ताति वत्तं सिया, ता आसोई णं पुण्णिमासिणिं किं कुलं उवकुलं कुलोवकुलं जोएति ? , णो लभति कुलोवकुलं, कुलं जोएमाणे अस्सिणी णक्खत्ते जोएति, उवकुलं जोएमाणे रेवतीणक्खत्ते जोएति, आसोई णं पुण्णिमं च कुलं वा उवकुलं वा जोएति कुलेण वा जुत्ता उवकुलेण वा जुत्ता अस्सोदिणी

पुणिमा जुत्तत्ति वत्तं सिया, एवं नेतव्वाउ (प्र० जाव आसाढी पुन्नमासिणी जुत्तत्ति वत्तं सिया) पोसं पुणिमं जेट्ठामूलं पुणिमं च कुलोवकुलंपि जोएति, अवसेसाम्पु णत्थि कुलो-  
वकुलं, ता सावट्ठिं णं अमावासं कति णक्खत्ता जोएति?, दुन्नि नक्खत्ता जोएति, तं०-अस्सेसा य महा य, एवं एतेणं अभिलावेणं नेतव्वं, पोट्टवती दोन्नि णक्खत्ता जोएति, तं०-पुव्वा-  
फग्गुणी उत्तराफग्गुणी, अस्सोइं हत्थो चित्ता य, कत्तिइं साती विसाहा य, मगसिरं अणुराधा जेट्ठामूलो, पोसिं पुव्वासाढा उत्तरासाढा, माहिं अभीयी सवणो धणिट्ठा, फग्गुणीं सत-  
भिसया पुव्वापोट्टवता उत्तरापोट्टवता, चेत्तिं रेवती अस्सिणी य, विसाहिं भरणी कत्तिया य, जेट्ठामूलिं रोहिणी मगसिरं च, ता आसाढिं णं अमावासिं कति णक्खत्ता जोएति?, ता तिन्नि  
नक्खत्ता जोएति, तं०-अहा पुणव्वसू पुस्सो, ता साविट्ठिं णं अमावासं किं कुलं वा जोएति उवकुलं वा जोएति कुलोवकुलं वा जोएइ?, कुलं वा जोएइ उवकुलं वा जोएइ नो लब्भइ  
कुलोवकुलं, कुलं जोएमाणे महाणक्खत्ते जोएति, उवकुलं जोएमाणे असिलेसा जोएइ, कुलेण वा जुत्ता उवकुलेण वा जुत्ता साविट्ठी अमावासा जुत्ताति वत्तं सिया, एवं नेतव्वं  
णवरं मग्गसिराए माहीए फग्गुणीए आसाढीए य अमावासाए कुलोवकुलंपि जोएति, सेसाम्पु णत्थि । ३९॥ १०-६॥ ता कहं ते सण्णिवाते आहिं०?, ता जया णं साविट्ठी पुणिमा  
भवति तता णं माही अमावासा भवति जया णं माही पुणिमा भवति तता णं साविट्ठी अमावासा भवति, जता णं पुट्टवती पुणिमा भवति तता णं फग्गुणी अमावासा भवति जया णं  
फग्गुणी पुणिमा भवति तता णं पुट्टवती अमावासा भवति, जया णं आसोई पुणिमा भवति तता णं चेत्ती अमावासा भवति जया णं चित्ती पुणिमा भवति तया णं आसोई अमावासा  
भवति, जया णं कत्तिया पुणिमा भवति तता णं वेसाही अमावासा भवति जता णं वेसाही पुणिमा भवति तता णं कत्तिया अमावासा भवति, जया णं मग्गसिरी पुणिमा भवति तता  
णं जेट्ठामूली अमावासा भवति जता णं जेट्ठामूली पुणिमा भवति तता णं मग्गसिरी अमावासा भवति, जता णं पोसी पुणिमा भवति तता णं आसाढी अमावासा भवति जता णं  
आसाढी पुणिमा भवति तता णं पोसी अमावासा भवति । ४०॥ १०-७॥ ता कहं ते नक्खत्तसंठिती आहिं०?, ता एएसिं णं अट्ठावीसाए णक्खत्ताणं अभीयी णं णक्खत्ते किंसंठिते  
पं०?, गो०! गोसीसावलिसंठिते पं०, सवणे णक्खत्ते किंसंठिते पं०?, काहारसंठिते पं०, धणिट्ठाणक्खत्ते० सउणिपलीणगसंठिते पं०, सयभिसयाणक्खत्ते० पुप्फोवयारसंठिते, पुव्वापो-  
ट्टवताणक्खत्ते० अवड्ढवाविसंठिते, एवं उत्तरावि, रेवतीणक्खत्ते णावासंठिते, अस्सिणीणक्खत्ते आसक्खंधसंठिते, भरणीणक्खत्ते भगसंठिए पं०, कत्तियाणक्खत्ते छुरघरसंठिते पं०,  
रोहिणीणक्खत्ते सगडुड्ढिसंठिते, मिगसिराणक्खत्ते मगसीसावलिसंठिते, अहाणक्खत्ते रुधिरबिंदुसंठिए, पुणव्वसू तुलासंठिए, पुप्फे वद्धमाण०, अस्सेसाण० पडागसंठिए, महा० पागा-  
रसंठिते, पुव्वाफग्गुणी० अद्धपलियंकसंठिते, एवं उत्तरावि, हत्थे हत्थसंठिते, ता चित्ताणक्खत्ते मुहफुल्लसंठिते, साती० खील्लगसंठिते, विसाहा० दामणिसंठिते, अणुराधा० एगावलिसं-  
ठिते, जेट्ठान० गयदंतसंठिते, मूले० विच्छुयलंगोलसंठिते, पुव्वासाढा० गयविक्रमसंठिते, उत्तरासाढाणक्खत्ते किंसंठिए पं०?, सीहनिसाइयसंठिते पं० । ४१॥ १०-८॥ ता कहं ते  
तारग्गे आहिं०?, ता एतेसिं णं अट्ठावीसाए णक्खत्ताणं अभीईणक्खत्ते कतितारे पं०?, तितारे पं०, सवणे णक्खत्ते० तितारे, धनिट्ठा पणतारे, सतभिसया कति०?, सत्ततारे, पुव्वापो-  
ट्टवता कति०?, दुतारे, एवं उत्तरावि, रेवतीण० कति०?, बत्तीसतितारे, अस्सिणी० कति०?, तितारे, एवं सब्बे पुच्छिज्जंति, भरणी तितारे, कत्तिया छतारे, रोहिणी पंचतारे, मगसिरेतितारे,  
अहा एगतारे, पुणव्वसू पंचतारे, पुस्से तितारे, अस्सेसा छतारे, महा सत्ततारे, पुव्वाफग्गुणी दुतारे, एवं उत्तरावि, हत्थे पंचतारे, चित्ता एकतारे, साती एकतारे, विसाहा पंचतारे, अणु-  
राधा चउतारे, जेट्ठा तितारे, मूले एणरतारे, पुव्वासाढा चउतारे, उत्तरासाढाणक्खत्ते चउतारे पं० । ४२॥ १०-९॥ ता कहं ते नेता आहिं०?, ता वासाणं पढमं मासं कति णक्खत्ता  
णेंति?, ता चत्तारि णक्खत्ता णिंति, तं०-उत्तरासाढा अभिई सवणो धणिट्ठा, उत्तरासाढा चोइस अहोरत्ते नेति, अभिई सत्त अहोरत्ते नेति, सवणे अट्ट अहोरत्ते नेति, धणिट्ठा एगं  
अहोरत्तं नेइ, तंसिं णं मासंसि चउरंगुलपोरिसीए छायाए सूरिए अणुपरियट्ठति, तस्स णं मासस्स चरिमे दिवसे दो पादाइं चत्तारि य अंगुलाणि पोरिसी भवति, ता वासाणं दोच्चं मासं  
कति णक्खत्ता णेंति?, ता चत्तारि णक्खत्ता णेंति, तं०-धणिट्ठा सतभिसया पुव्वापुट्टवता उत्तरापोट्टवया, धणिट्ठा चोइस अहोरत्ते नेति, सयभिसया सत्त अहोरत्ते नेति, पुव्वाभद्वया  
अट्ट अहोरत्ते नेइ, उत्तरापोट्टवता एगं अहोरत्तं नेति, तंसिं णं मासंसि अट्टंगुलपोरिसीए छायाए सूरिए अणुपरियट्ठति, तस्स णं मासस्स चरमे दिवसे दो पादाइं अट्ट अंगुलाइं पोरिसी  
भवति, ता वासाणं ततियं मासं कति णक्खत्ता णेंति?, ता तिण्णि णक्खत्ता णिंति, तं०-उत्तरापोट्टवता रेवती अस्सिणी, उत्तरापोट्टवता चोइस अहोरत्ते नेति रेवती पण्णरस० अ-  
स्सिणी एगं अहो०, तंसिं च णं मासंसि दुवालसंगुलपोरिसीछायाए सूरिए अणुपरियट्ठति, तस्स णं मासस्स चरिमदिवसे लेहत्थाइं तिण्णि पदाइं पोरिसी भवति, ता वासाणं चउत्थं  
मासं कति णक्खत्ता णेंति?, ता तिन्नि नक्खत्ता णेंति, तं०-अस्सिणी भरणी कत्तिया, अस्सिणी चउइस अहो० भरणी पन्नरस अहो० कत्तिया एगं अहो०, तंसिं च णं मासंसि सोल्लसं-

गुलपोरिसीछायाए सूरिए अणुपरियट्टइ, तस्स णं मासस्स चरिमे दिवसे तिन्नि पयाइं चत्तारि अंगुलाइं पोरिसी भवइ, ता हेमंताणं पढमं मासं कइ णक्खत्ता णंति?, ता तिण्णि णक्खत्ता णंति, तं०-कत्तिया रोहिणी संठाणा, कत्तिया चोइस अहो० रोहिणी पन्नरस अहो० संठाणा एगं अहो०, तंसि च णं मासंसि वीसंगुलपोरिसीए छायाए सूरिए अणुपरियट्टइ, तस्स णं मासस्स चरिमे दिवसे तिण्णि पदाइं अट्ट अंगुलाइं पोरिसी भवति, ता हेमंताणं दोच्चं मासं कति णक्खत्ता णंति?, चत्तारि णक्खत्ता णंति, तं०-संठाणा अहा पुणवसू पुस्सो, संठाणा चोइस अहोरत्ते णेति अहा सत्त अहो० पुणवसू अट्ट अहो० पुस्से एगं अहोरत्तं णेति, तंसि च णं मासंसि चउवीसंगुलपोरिसीए छायाए सूरिए अणुपरियट्टइ, तस्स णं मासस्स चरिमे दिवसे लेहट्टाणि चत्तारि पदाइं पोरिसी भवति, ता हेमंताणं ततियं मासं कति णक्खत्ता णंति?, ता तिण्णि णक्खत्ता णंति, तं०-पुस्से अस्सेसा महा, पुस्से चोइस अहोरत्ते णेति अस्सेसा पंचदस अहो० महा एगं अहो०, तंसि च णं मासंसि वीसंगुलाइ पोरिसीए छायाए सूरिए अणुपरियट्टइ, तस्स णं मासस्स चरिमे दिवसे तिण्णि पदाइं अट्टंगुलाइं पोरिसी भवति, ता हेमंताणं चउत्थं मासं कति णक्खत्ता णंति?, ता तिण्णि नक्खत्ता णंति, तं०-महा पुवाफग्गुणी उत्तराफग्गुणी, महा चोइस अहो० पुवाफग्गुणी पन्नरस अहो० उत्तराफग्गुणी एगं अहो०, तंसि च णं मासंसि सोलसअंगुलाइ पोरिसीए छायाए सूरिए अणुपरियट्टइ, तस्स णं मासस्स चरिमे दिवसे तिण्णि पदाइं चत्तारि अंगुलाइं पोरिसी भवति, ता गिम्हाणं पढमं मासं कति णक्खत्ता णंति?, ता तिन्नि णक्खत्ता णंति, तं०-उत्तराफग्गुणी हत्थो चित्ता, उत्तराफग्गुणी चोइस अहोरत्ते णेति हत्थो पण्णरस अहो० चित्ता एगं अहोरत्तं णेइ, तंसि च णं मासंसि दुवालसअंगुलपोरिसीए छायाए सूरिए अणुपरियट्टइ, तस्स णं मासस्स चरिमे दिवसे लेहट्टाइ य तिण्णि पदाइं पोरिसी भवति, ता गिम्हाणं वितियं मासं कति णक्खत्ता णंति?, ता तिण्णि णक्खत्ता णंति, तं०-चित्ता साई विसाहा, चित्ता चोइस अहोरत्ते णेति साती पण्णरस अहो० विसाहा एगं अहोरत्तं णेति, तंसि च णं मासंसि अट्टंगुलपोरिसीए छायाए सूरिए अणुपरियट्टइ, तस्स णं मासस्स चरिमे दिवसे दो पदाइं अट्ट अंगुलाइं पोरिसी भवति, गिम्हाणं ततियं मासं कति णक्खत्ता णंति?, ता चत्तारि णक्खत्ता णंति, तं०-विसाहा अणुराधा जेट्टा मूलो, विसाहा चोइस अहो० अणुराधा अट्ट० जेट्टा सत्त० मूलं एगं अहोरत्तं णेति, तंसि च णं मासंसि चउरंगुलपोरिसीए छायाए सूरिए अणुपरियट्टइ, तस्स णं मासस्स चरिमे दिवसे दो पादाणि य चत्तारि अंगुलाणि पोरिसी भवति, ता गिम्हाणं चउत्थं मासं कति णक्खत्ता णंति?, ता तिण्णि णक्खत्ता णंति, तं०-मूलो पुवासाढा उत्तरासाढा, मूलो चोइस अहोरत्ते णेति पुवासाढा पण्णरस अहोरत्ते णेति उत्तरासाढा एगं अहोरत्तं णेइ, तंसि च णं मासंसि वट्टाए सभचउरंससंठिताए णग्गोधपरिमंडलाए सक्कायमणुरंगिणीए छायाए सूरिए अणुपरियट्टइ, तस्स णं मासस्स चरिमे दिवसे लेहट्टाइ दो पदाइं पोरिसी भवति । ४३ ॥ १०-१० ॥ ता कहं ते चंदमग्गा अहि०?, ता एएसि णं अट्टावीसाए णक्खत्ताणं अत्थि णक्खत्ता जे णं सता चंदस्स दाहिणेणं जोअं जोएंति, अत्थि णक्खत्ता जे णं सता चंदस्स उत्तरेणं जोयं जोयंति, अत्थि णक्खत्ता जे णं सदा चंदस्स दाहिणेणवि उत्तरेणवि पमइंपि जोयं जोएंति, अत्थि णक्खत्ता जे णं चंदस्स दाहिणेणवि पमइंपि जोयं जोएंति, अत्थि णक्खत्ता जे णं चंदस्स सदा पमइं जोअं जोएंति, ता एएसि णं अट्टावीसाए नक्खत्ताणं कतरे नक्खत्ता जे णं सता चंदस्स दाहिणेणं जोयं जोएंति?, तहेव जाव कतरे नक्खत्ता जे णं सदा चंदस्स पमइं जोयं जोएंति?, ता एतेसिं णं अट्टावीसाए नक्खत्ताणं तत्थ जे णं नक्खत्ता सया चंदस्स दाहिणेण जोयं जोएंति ते णं छ, तं०-संठाणा अहा पुस्सो अस्सेसा हत्थो मूलो, तत्थ जे ते णक्खत्ता जे णं सदा चंदस्स उत्तरेणं जोयं जोएंति ते णं बारस, तं०-अभिई सवणो धणिट्टा सतभिसया पुवाभइवया उत्तरापोट्टवता रेवती अस्सिणी भरणी पुवाफग्गुणी उत्तराफग्गुणी साती, तत्थ जे ते णक्खत्ता जे णं चंदस्स दाहिणेणवि उत्तरेणवि पमइंपि जोयं जोएंति ते णं सत्त, तं०-कत्तिया रोहिणी पुणवसू महा चित्ता विसाहा अणुराहा, तत्थ जे ते नक्खत्ता जे णं चंदस्स दाहिणेणवि पमइंपि जोयं जोएंति ताओ णं दो आसाढाओ सबबाहिरे मंडले जोयं जोएंसु वा जोएंति वा जोएस्संति वा, तत्थ जे से णक्खत्ते जे णं सदा चंदस्स पमइं जोयं जोएंति सा णं एगा जेट्टा । ४४ । ता कति ते चंदमंडला पं०?, ता पण्णरस चंदमंडला पं०, ता एएसिं णं पण्णरसण्हं चंदमंडलाणं अत्थि चंदमंडला जे णं सया णक्खत्तेहिं अविरहिया, अत्थि चंदमंडला जे णं सया णक्खत्तेहिं विरहिया, अत्थि चंदमंडला जे णं रविसिणक्खत्ताणं सामण्णा भवंति, अत्थि चंदमंडला जे णं सया आदिच्चेहिं विरहिया, ता एतेसिं णं पण्णरसण्हं चंदमंडलाणं कयरे चंदमंडला जे णं सता णक्खत्तेहिं अविरहिया जाव कयरे चंदमंडला जे णं सदा आदिच्चविरहिता?, ता एतेसिं णं पण्णरसण्हं चंदमंडलाणं जे ते चंदमंडला जे णं सदा णक्खत्तेहिं अविरहिता ते णं अट्ट, तं०-पढमे चंदमंडले ततिए० छट्टे० सत्तमे० अट्टमे० दसमे० एकादसे० पण्णरसमे चंदमंडले, तत्थ जे णं सदा णक्खत्तेहिं विरहिया ते णं सत्त, तं०-वितिए चउत्थे पंचमे नवमे बारसमे तेरसमे चउइसमे चंदमंडले, तत्थ जे ते चंदमंडला जे णं ससिरविनक्खत्ताणं सामण्णा भवंति ते णं चत्तारि, तं०-पढमे बीए इक्कारसमे पन्नरसमे चंदमंडले, तत्थ जे ते चंदमंडला

७९५ सूर्यप्रज्ञप्ति: ५१५-१०

मुनि दीपरत्तसागर

जे णं सदा आदिच्चविरहिता ते णं पंच, तं०-छट्टे सत्तमे अट्टमे नवमे दसमे चंदमंडले । ४५ ॥ १०-११ ॥ ता कंहं ते देवताणं अज्झयणा आहि०?, ता एएणं अट्टावीसाए नक्खत्ताणं अभिई णक्खत्ते किंदेवताए पं०?, बंभदेवयाए पं०, सवणे विण्हुदेवयाए पं०, धणिट्टा वसुदेवयाए पं०, सयभिसया वरुणदेवयाए पं०, पुव्वापोट्ट० अजदे० उत्तरापोट्टवया अहिवड्ढि-देवताए पं०, एवं सब्बेवि पुच्छिज्जंति, रेवती पुस्सदेवता अस्सिणी अस्स० भरणी जम० कत्तिया अग्गि० रोहिणी पयावइ० संठाणा सोम० अहा रुह० पुणव्वसू अदिति० पुस्सो बह-स्सइ० अस्सेसा सप्प० महा पिति० पुव्वाफग्गुणी भग० उत्तराफग्गुणी अजम० हत्थे सविया० चित्ता तट्ठ० साती वायु० विसाहा इंदग्गी० अणुराहा मित्त० जेट्ठा इंद० मूले णिरिति० पुव्वासाढा आउ० उत्तरासाढा विस्सदेवयाए पं० । ४६ ॥ १०-१२ ॥ ता कंहं ते मुहुत्ताणं नामधेज्जा आहि०?, ता एगमेगस्स णं अहोरत्तस्स तीसं मुहुत्ता पं० तं०-‘रोदे सेते मित्ते वायु सुपीए तहेव अभिचंदे । माहिंद बलव बंभो बहुसच्चे १० चेव ईसाणे ॥ १६ ॥ तट्टे य भावियप्पा वेसमणे वारुणे य आणंदे । विजए य वीससेणे पायावच्चे उवसमे य २० ॥ १७ ॥ गंधव्व अग्गिवेसे सयरिसहे आयवं च अममे य । अणवं च भोम रिसहे सब्बट्टे रक्खसे चेव ३० ॥ १८ ॥ ४७ ॥ १०-१३ ॥ ता कंहं ते दिवसा आहिय०?, ता एगमेगस्स णं पक्खस्स पन्नरस २ दिवसा पं० तं०-पडिवा दिवसे बितिया जाव पण्णरसीदिवसे, ता एतेसिं णं पण्णरसण्हं दिवसाणं पन्नरस नामधेज्जा पं० तं०-‘पुव्वंगे सिद्धमणोरमे य तत्तो मणोहरो चेव । जस-भदे य जसोधर सब्बकामसमिद्धेति य ॥ १९ ॥ इंदे मुद्धाभिसित्ते सोमणस्स धणंजए य बोद्धव्वे । अत्थसिद्धे अभिजाते अच्चासणे य सतंजए ॥ २० ॥ अग्गिवेसे उवसमे दिवसाणं नामधे-ज्जाइं । ता कंहं ते रातीओ आहि०?, ता एगमेगस्स णं पक्खस्स पण्णरस राईओ पं० तं०-पडिवा राई बिदिया राई जाव पण्णरसी राई, ता एतासिं णं पण्णरसण्हं राईणं पण्णरस नामधेज्जा पं० तं०-‘उत्तमा य सुणक्खत्ता, एलावच्चा जसोधरा । सोमणसा चेव तवा, सिरिसंभूता य बोद्धव्वा ॥ २१ ॥ विजया य वेजयंती जयंति अपराजिया य इच्छा य । समाहारा चेव तथा तेया य तथा य अतितेया ॥ २२ ॥ देवाणंदा निरती रयणीणं णामधेज्जाइं । ४८ ॥ १०-१४ ॥ ता कंहं ते तिही आहि०?, तत्थ खलु इमा दुविहा तिही पं० तं०-दिवसतिही राइतिही य, ता कंहं ते दिवसतिही आहितेति वदेज्जा?, ता एगमेगस्स णं पक्खस्स पण्णरस २ दिवसतिही पं० तं०-णंदे भदे जए तुच्छे पुण्णे पक्खस्स पंचमी, पुणरवि णंदे भदे जए तुच्छे पुण्णे पक्खस्स दसमी, पुणरवि णंदे भदे जये तुच्छे पुण्णे पक्खस्स पण्णरसी, एवं ते तिगुणा तिहीओ सब्बेसिं दिवसाणं, कंहं ते राइतिथी आहि०?, एगमेगस्स णं पक्खस्स पण्णरस राति-तिथी पं० तं०-उग्गवती भोगवती जसवती सब्बसिद्धा सुहणामा पुणरवि उग्गवती भोगवती जसवती सब्बसिद्धा सुहणामा पुणरवि उग्गवती भोगवती जसवती सब्बसिद्धा सुहणामा, एते तिगुणा तिहीओ सब्बासिं रातीणं । ४९ ॥ १०-१५ ॥ ता कंहं ते गोत्ता आहि०?, ता एतेसिं णं अट्टावीसाए णक्खत्ताणं अभियी णक्खत्ते किंगोत्ते पं०?, ता मोग्गल्लायणसगोत्ते पं०, सवणे णक्खत्ते किंगोत्ते०?, संखायणसगोत्ते पं०, धणिट्टाणक्खत्ते अग्गितावसगोत्ते पं०, सतभिसयाणक्खत्ते कण्णलो(प्र० कल्लो)यणसगोत्ते पं०, पुव्वापोट्टवताणक्खत्ते जोउकण्णिय-सगोत्ते पं०, उत्तरापोट्टवताणक्खत्ते धणंजयसगोत्ते पं०, रेवतीणक्खत्ते पुस्सायणसगोत्ते पं०, अस्सिणीणक्खत्ते अस्सादणसगोत्ते पं०, भरणीणक्खत्ते भग्गवेससगोत्ते पं०, कत्तियाण-क्खत्ते अग्गिवेससगोत्ते पं०, रोहिणीणक्खत्ते गोतमसगोत्ते पं०, संठाणाणक्खत्ते भारदायसगोत्ते पं०, अहाणक्खत्ते लोहिच्चायणसगोत्ते पं०, पुणव्वसुणक्खत्ते वासिट्टसगोत्ते पं०, पुस्से उमज्जायणसगोत्ते पं०, अस्सेसा मंडव्वायणसगोत्ते पं०, महाण० पिंगायणसगोत्ते पं०, पुव्वाफग्गुणी० गोवल्लायणसगोत्ते पं०, उत्तराफग्गुणी० कासवसगोत्ते पं०, हत्थे० कोसि-यगोत्ते पं०, चित्ता० दब्भियायणसगोत्ते पं०, साई० वामरछगोत्ते पं०, विसाहा० सुंगायणसगोत्ते पं०, अणुराधा० गोलव्वायणसगोत्ते पं०, जेट्ठा० तिगिच्छायणसगोत्ते पं०, मूले० कच्चायणसगोत्ते पं०, पुव्वासाढा० वज्झियायणसगोत्ते पं०, उत्तरासाढाणक्खत्ते किंगोत्ते पं०?, वग्घावच्चसगोत्ते पं० । ५० ॥ १०-१६ ॥ ता कंहं ते भोयणा आहि०?, ता एएसिं णं अट्टावीसाए णक्खत्ताणं कत्तियाहिं दधिणा भोच्चा कज्जं सार्धंति, रोहिणीहिं वसभमंसं भोच्चा कज्जं सार्धंति, संठाणाहिं मिगमंसं० अहाहिं णवणीतेण भोच्चा० पुणव्वसुणा घतेण० पुस्सेणं खीरेण० अस्सेसाए दीवगमंसं० महाहिं कसरिं० पुव्वाहिं फग्गुणीहिं मढकमंसं० उत्तराहिं फग्गुणीहिं णक्खी(प्र० भी)मंसं० हत्थेण वत्थाणीपण्णं० चित्ताहिं मुग्गसूवेणं० सादिणा फलाइं० विसाहाहिं आसित्ति(प्र० न्नि)याओ० अणुराहाहिं मिस्सकूरं० जेट्ठाहिं ओलट्ठिणं० मूलेणं मूलापन्नेणं० पुव्वाहिं आसाढाहिं आमलग(प्र० मालवे)सरीरे० उत्तराहिं आसा-ढाहिं विलेविं० अभीयिणा पुप्फेहिं० सवणेणं खीरेणं० धणिट्टाहिं जूसेण० सयभिसाए तुवरीओ० पुव्वाहिं पुट्ठवयाहिं कारिल्लएहिं० उत्तराहिं पुट्ठवताहिं वराहमंसं० रेवतीहिं जलय-रमंसं० अस्सिणीहिं तित्तिरमंसं वट्टकमंसं वा० भरणीहिं तिलतंदुलकं भोच्चा कज्जं सार्धंति । ५१ । १०-१७ ॥ ता कंहं ते चारा आहि०?, तत्थ खलु इमा दुविहा चारा पं० तं०-आदि-च्चचारा य चन्दचारा य, ता कंहं ते चंदचारा आहि०?, ता पंचसंवच्छरिए णं जुगे अभीइणक्खत्ते सत्तसट्ठिचारे चंदेण सद्धिं जोयं जोएति, सवणे णं णक्खत्ते सत्तट्ठिचारे चंदेण सद्धिं जोयं जोएति एवं जाव उत्तरासाढाणक्खत्ते सत्तट्ठिचारे चंदेण सद्धिं जोयं जोएति, ता कंहं ते आइच्चचारा आहितेति वदेज्जा?, ता पंचसंवच्छरिए णं जुगे अभीयीणक्खत्ते (१९९)

पंचचा(वा)रे सुरेण सद्धिं जोयं जोएति, एवं जाव उत्तरासाढाणक्खत्ते पंचचा(वा)रे सुरेण सद्धिं जोयं जोएति । ५२ ॥ १०-१८ ॥ ता कहं ते मासा आहि०?, ता एगमेगस्स णं संवच्छरस्स बारस मासा पं०, तेसिं च दुविहा नामधेजा पं० तं०-लोइया लोउत्तरिया य, तत्थ लोइया णामा-सावणे भइवते आसोए जाव आसाढे, लोउत्तरिया णामा-अभिणंदे सुपइट्टे य, विजये पीतिवद्धणे । सेज्जंसे सिवे यावि, सिसिरे य सहेमवं ॥ २३ ॥ नवमे वसंतमासे, दसमे कुसुमसंभवे । एकादसमे णिदाहो, वणविरोही य बारसे ॥ २४ ॥ ५३ ॥ १०-१९ ॥ ता कति णं भंते ! संवच्छरा आहि०?, ता पंच संवच्छरा आहि०, तं०-णक्खत्तसंवच्छरे जुग० पमाण० लक्खण० सणिच्छरसंवच्छरे । ५४ । ता णक्खत्तसंवच्छरे णं दुवालसविहे पं० तं०-सावणे भइवए जाव आसाढे, जं वा बहस्सती महग्गहे दुवालसहिं संवच्छरेहिं सद्धं णक्खत्तमंडलं समाणेति । ५५ । ता जुगसंवच्छरे णं पंचविहे पं० तं०-चंदे चंदे अभिवड्ढिए चंदे अभिवड्ढिए चव, ता पढमस्स णं चंदसंवच्छरस्स चउवीसं पद्दा पं० दोच्चस्स णं चंदसंवच्छरस्स चउवीसं पद्दा पं० तच्चस्स णं अभिवड्ढितसंवच्छरस्स छवीसं पद्दा पं० चउत्थस्स णं चंदसंवच्छरस्स चउवीसं पद्दा पं० पंचमस्स णं अभिवड्ढियसंवच्छरस्स छवीसं पद्दा पं०, एवामेव सपुव्वावरेणं पंचसंवच्छरिए जुगे एगे चउवीसे पव्वसते भवतीतिमक्खातं । ५६ । ता पमाणसंवच्छरे पंच-विहे पं० तं०-नक्खत्ते चंदे उडू आइच्चे अभिवड्ढिए । ५७ । ता लक्खणसंवच्छरे पंचविहे पं० तं०-नक्खत्ते चंदे उडू आइच्चे अभिवड्ढिए, ता णक्खत्ते णं संवच्छरे णं पंचविहे पं०-समगं णक्खत्ता जोयं जोएति समगं उडू परिणमंति । नच्चुण्हं नाइसीए बहुउदए होइ नक्खत्ते ॥ २५ ॥ ससिसमगपुच्चिमासिं जोइंता विसमचारिनक्खत्ता । कडुओ बहुउदवओ य तमाहु संवच्छरं चंदं ॥ २६ ॥ विसमं पवाल्लिणो परिणमंति अणुऊसु दिति पुप्फफलं । वासं न सम्म वासइ तमाहु संवच्छरं कम्मं ॥ २७ ॥ पुढवीदगाणं च रसं पुप्फफलाणं च देइ आइच्चे । अप्पेणवि वासेणं संमं निप्फज्जए सस्सं ॥ २८ ॥ आइच्चतेयतविया खणलवदिवसा उऊ परिणमन्ति । पूरेति निण्णथलये तमाहु अभिवड्ढितं जाण ॥ २९ ॥ ता सणिच्छरसंवच्छरे णं अट्टावीसतिविहे पं० तं०-अभियी सवणे जाव उत्तरासाढा, जं वा सणिच्छरे महग्गहे तीसाए संवच्छरेहिं सद्धं णक्खत्तमंडलं समाणेति । ५८ ॥ १०-२० ॥ ता कहं ते जोतिसस्स दारा आहि०?, तत्थ खलु इमाओ पंच पडिवत्तीओ पं०, तत्थेगे एवमाहंसु ता कत्तियादी णं सत्त नक्खत्ता पुव्वदारिया पं० एगे एव०, एगे पुण०-ता महादीया सत्त पुव्व० पं० एगे एव०, एगे पुण०-अणुराहाइया सत्त पुव्व० पं० एगे०, एगे पुण०-धणिट्टादीया सत्त पुव्व० पं० एगे०, एगे पुण०-अस्सिणीयादीया णं सत्त पुव्व० पं० एगे०, एगे पुण०-भरणीयादीया णं सत्त णक्खत्ता पुव्व० पं०, तत्थ जे ते एवमाहंसु ता कत्तियादी णं सत्त पुव्व० पं० ते एव० तं०-कत्तिया रोहिणी संठाणा अद्दा पुणव्वसू पुस्सो अस्सिलेसा, सत्त णक्खत्ता दाहिणदारिया पं० तं०-महा पुव्वाफग्गुणी उत्तराफग्गुणी हत्थो चित्ता साई विसाहा, अणुराधादीया सत्त णक्खत्ता पच्छिमदारिया पं० तं०-अणुराधा जेट्ठा मूलो पुव्वासाढा उत्तरासाढा अभियी सवणो, धणिट्टादीया सत्त णक्खत्ता उत्तरदारिया पं० तं०-धणिट्टा सतभिसया पुव्वापोट्ठवता उत्तरापोट्ठवता रेवती अस्सिणी भरणी, तत्थ जे ते एवमाहंसु ता महादीया सत्त पुव्व० पं० ते एव० तं०-महा पुव्वाफग्गुणी उत्तराफग्गुणी हत्थो चित्ता साती विसाहा, अणुराधादीया सत्त दाहिण० पं० तं०-अणुराधा जेट्ठा मूलो पुव्वासाढा उत्तरासाढा अभियी सवणे, धणिट्टा-दीया सत्त पच्छिम० पं० तं०-धणिट्टा सतभिसया पुव्वापोट्ठवता उत्तरापोट्ठवता रेवती अस्सिणी भरणी, कत्तियादीया सत्त उत्तर० पं० तं०-कत्तिया रोहिणी संठाणा अद्दा पुणव्वसू पुस्सो अस्सेसा, तत्थ णं जे ते एव० ता धणिट्टादीया सत्त पुव्व० पं० ते एव० तं०-धणिट्टा सत्तभिसया पुव्वाभइवया उत्तराभइवया रेवती अस्सिणी भरणी, कत्तियादीया सत्त दाहिण० पं० तं०-कत्तिया रोहिणी संठाणा अद्दा पुणव्वसू पुस्सो अस्सेसा, महादीया सत्त पच्छिम० पं० तं०-महा पुव्वाफग्गुणी उत्तराफग्गुणी हत्थो चित्ता साती विसाहा, अणुराधादीया सत्त उत्तर० पं० तं०-अणुराधा जेट्ठा मूलो पुव्वासाढा उत्तरासाढा अभियी सवणो, तत्थ जे ते एव० ता अस्सिणीआदीया सत्त पुव्व० पं० ते एव० तं०-अस्सिणी भरणी कत्तिया रोहिणी संठाणा अद्दा पुणव्वसू, पुस्सादीया सत्त दाहिण० पं० तं०-पुस्सो अस्सेसा महा पुव्वाफग्गुणी उत्तराफग्गुणी हत्थो चित्ता, सादीयादीया सत्त पच्छिम० पं० तं०-साती विसाहा अणुराहा जेट्ठा मूलो पुव्वासाढा उत्तरासाढा, अभियीआदीया सत्त उत्तर० पं० तं०-अभिई सवणो धणिट्टा सतभिसया पुव्वाभइवया उत्तराभइवया रेवती, तत्थ जे ते एव० ता भरणीआदीया सत्त पुव्व० पं० ते एव० तं०-भरणी कत्तिया रोहिणी संठाणा अद्दा पुणव्वसू पुस्सो, अस्सेसादीया सत्त दाहिण० पं० तं०-अस्सेसा महा पुव्वाफग्गुणी उत्तराफग्गुणी हत्थो चित्ता साई, विसाहादीया सत्त पच्छिम० पं० तं०-विसाहा अणुराहा जेट्ठा मूलो पुव्वासाढा उत्तरासाढा अभिई, सवणादीया सत्त उत्तर० पं० तं०-सवणो धणिट्टा सतभिसया पुव्वापोट्ठवया उत्तरापोट्ठवया रेवती अस्सिणी एगे एव०, वयं पुण एवं वदामो ता अभिईयादीया सत्त पुव्वदा० पं० तं०-अभियी सवणो धणिट्टा सतभिसया पुव्वापोट्ठवता उत्तरापोट्ठवया रेवती, अस्सिणी-आदीया सत्त दाहिण० पं० तं०-अस्सिणी भरणी कत्तिया रोहिणी संठाणा अद्दा पुणव्वसू, पुस्सादीया सत्त पच्छिम० पं० तं०-पुस्सो अस्सेसा महा पुव्वाफग्गुणी उत्तराफग्गुणी हत्थो

चित्ता, सातिआदीया सत्त णक्खत्ता उत्तरदारिया पं० तं०-साती विसाहा अणुराहा जेट्टा मूले पुत्रासाढा उत्तरासाढा । ५९ ॥ १०-२१ ॥ ता कहं ते णक्खत्तविजये आहि०?, ता अयण्णं जंबुहीवे जाव परिक्खेवेणं, ता जंबुहीवे दो चंदा पभासेंसु वा पभासेंति वा पभासिस्संति वा दो सूरिया तविसु वा तवेति वा तविस्संति वा छप्पण्णं णक्खत्ता जोयं जोएंसु वा० तं०-दो अभीयी दो सवणा दो धणिट्ठा दो सतभिसया दो पुत्रापोट्ठवता दो उत्तरापोट्ठवता दो रेवती दो अस्सिणी दो भरणी दो कत्तिया दो रोहिणी दो संठाणा दो अहा दो पुण्णसू दो पुस्सा दो अस्सेसा दो महा दो पुत्राफग्गुणी दो उत्तराफग्गुणी दो हत्था दो चित्ता दो साई दो विसाहा दो अणुराधा दो जेट्टा दो मूला दो पुत्रासाढा दो उत्तरासाढा, ता एएसिं णं छप्पण्णाए णक्खत्ताणं अत्थि णक्खत्ता जे णं णव मुहुत्ते सत्तावीसं च सत्तट्ठिभागे मुहुत्तस्स चंदेण सद्धिं जोयं जोएंति अत्थि णक्खत्ता जे णं पण्णरस मुहुत्ते चंदेण० अत्थि णक्खत्ता जे णं ती-सइमुहुत्ते० अत्थि णक्खत्ता जे णं पणयालीसं मुहुत्ते चंदेण०, ता एतेसिं णं छप्पण्णाए णक्खत्ताणं कतरे णक्खत्ते जे णं णव मुहुत्ते सत्तावीसं च सत्तट्ठिभागे मुहुत्तस्स चंदेण० कतरे णक्खत्ता जे णं पन्नरस मुहुत्ते० कतरे णक्खत्ता जे णं तीसं मुहुत्ते० कतरे णक्खत्ता जे णं पणतालीसं मुहुत्ते चंदेण सद्धिं जोयं जोएंति?, ता एतेसिं णं छप्पण्णाए णक्खत्ताणं तत्थ जे ते णक्खत्ता जे णं णव मुहुत्ते सत्तावीसं च सत्तट्ठिभागे मुहुत्तस्स चंदेण० ते णं दो अभीयी, तत्थ जे ते णक्खत्ता जे णं पण्णरस मुहुत्ते चंदेण० ते णं बारस तं०-दो सतभिसया दो भरणी दो अहा दो अस्सेसा दो साती दो जेट्टा, तत्थ जे० णं तीसं मुहुत्ते चंदेण० ते णं तीसं तं०-दो सवणा दो धणिट्ठा दो पुत्रभद्वता दो रेवती दो अस्सिणी दो कत्तिया दो संठाणा दो पुस्सा दो महा दो पुत्राफग्गुणी दो हत्था दो चित्ता दो अणुराधा दो मूला दो पुत्रासाढा, तत्थ जे ते णक्खत्ता पणतालीसं मुहुत्ते० ते णं बारस तं०-दो उत्तरापोट्ठवता दो रोहिणी दो पुण्णसू दो उत्तराफग्गुणी दो विसाहा दो उत्तरासाढा, ता एएसिं णं छप्पण्णाए णक्खत्ताणं अत्थि णक्खत्ते जे णं चत्तारि अहोरत्ते छच्च मुहुत्ते सूरिएण सद्धिं जोयं जोएंति अत्थि णक्खत्ता जे णं छ अहोरत्ते एक्कवीसं च मुहुत्ते सूरेंण० अत्थि णक्खत्ता जे णं तेरस अहोरत्ते बारस मुहुत्ते सूरेंण० अत्थि णक्खत्ता जे णं वीसं अहोरत्ते तिण्णि य मुहुत्ते सूरेंण०, एएसिं णं छप्पण्णाए णक्खत्ताणं कयरे णक्खत्ता जे णं तं चव उच्चारेयच्चं, ता एतेसिं णं छप्पण्णाए णक्खत्ताणं तत्थ जे ते णक्खत्ता जे णं चत्तारि अहोरत्ते छच्च मुहुत्ते सूरेंण० ते णं दो अभीयी, तत्थ जे ते णक्खत्ता जे णं छ अहोरत्ते एक्कवीसं च मुहुत्ते सूरेंण० ते णं बारस तं०-दो सतभिसया दो भरणी दो अहा दो अस्सेसा दो साती दो जेट्टा, तत्थ जे ते णक्खत्ता जे णं तेरस अहोरत्ते बारस मुहुत्ते सूरेंण० ते णं तीसं तं०-दो सवणा जाव दो पुत्रासाढा, तत्थ जे ते णक्खत्ता जे णं वीसं अहोरत्ते तिण्णि य मुहुत्ते सूरेंण सद्धिं जोयं जोएंति ते णं बारस तं०-दो उत्तरापोट्ठवता जाव उत्तरासाढा । ६० । ता कहं ते सीमाविकखंभे आहितेति वदेजा?, ता एतेसिं णं छप्पण्णाए णक्खत्ताणं अत्थि णक्खत्ता जेसिं णं छ सया तीसा सत्तट्ठिभागतीसति-भागणं सीमाविकखंभो अत्थि णक्खत्ता जेसिं णं सहस्सं पंचोत्तरं सत्तट्ठिभागतीसतिभागणं सीमाविकखंभो अत्थि णक्खत्ता जेसिं णं दो सहस्सा दसुत्तरा सत्तट्ठिभागतीसतिभागणं सीमाविकखंभो अत्थि णक्खत्ता जेसिं णं ति सहस्सं पंचदसुत्तरं सत्तट्ठिभागतीसतिभागणं सीमाविकखंभो, ता एतेसिं णं छप्पण्णाए णक्खत्ताणं कतरे णक्खत्ता जेसिं णं छ सया तीसा तं चव उच्चारेयच्चं जाव तिसहस्सं पंचदसुत्तरं सत्तट्ठिभागतीसइभागणं सीमाविकखंभो?, ता एतेसिं णं छप्पण्णाए णक्खत्ताणं तत्थ जे ते णक्खत्ता जेसिं णं छ सया तीसा सत्तट्ठि-भागतीसतिभागणं सीमाविकखंभो ते णं दो अभीयी, तत्थ जे ते णक्खत्ता जेसिं णं सहस्सं पंचोत्तरं सत्तट्ठिभागतीसतिभागणं सीमाविकखंभो ते णं बारस तं०-दो सतभिसया जाव दो जेट्टा, तत्थ जे ते णक्खत्ता जेसिं णं दो सहस्सा दसुत्तरा सत्तट्ठिभागतीसतिभागणं सीमाविकखंभो ते णं तीसं, तं०-दो सवणा जाव दो पुत्रासाढा, तत्थ जे ते णक्खत्ता जेसिं णं तिण्णि सहस्सा पण्णरसुत्तरा सत्तट्ठिभागतीसतिभागणं सीमाविकखंभो ते णं बारस, तं०-दो उत्तरापोट्ठवता जाव उत्तरासाढा । ६१ । एतेसिं णं छप्पण्णाए णक्खत्ताणं किं सया पादो चंदेण सद्धिं जोयं जोएंति ता एतेसिं णं छप्पण्णाए णक्खत्ताणं किं सया सायं चंदेण० एतेसिं णं छप्पण्णाए णक्खत्ताणं किं सया दुहा पविसिय २ चंदेण०?, ता एएसिं णं छप्पण्णाए णक्ख-त्ताणं न किंपि तं जं सया पादो चंदेण० नो सया सागं चंदेण० नो सया दुहओ पविसित्ता २ चंदेण०, णण्णत्थ दोहिं अभीयीहिं, ता एतेणं दो अभीयी पायंचिय २ चोत्तालीसं २ अमावासं जोएंति णो चव णं पुण्णिमासिणिं । ६२ । तत्थ खलु इमाओ बावट्ठी पुण्णमासिणीओ बावट्ठी अमावासाओ पं०, ता एएसिं णं पंचण्हं संवच्छराणं पढमं पुण्णमासिणिं चंदे कंसि देसंसि जोएइ?, ता जसि णं देसंसि चंदे चरिमं बावट्ठी पुण्णमासिणिं जोएति ताए पुण्णमासिणिट्ठाणातो मंडलं चउवीसेणं सतेणं छेत्ता बत्तीसं भागे उवातिणावित्ता एत्थ णं से चंदे पढमं पुण्णमासिणिं जोएति, ता एएसिं णं पंचण्हं संवच्छराणं दोच्चं पुण्णमासिणिं चंदे कंसि देसंसि जोएति?, ता जंसि णं देसंसि चंदे पढमं पुण्णमासिणिं जोएति ताए पुण्ण-मासिणिट्ठाणातो मंडलं चउवीसेणं सतेणं छेत्ता बत्तीसं भागे उवाइणावेत्ता एत्थ णं से चंदे दोच्चं पुण्णमासिणिं जोएति, ता एएसिं णं पंचण्हं संवच्छराणं तच्चं पुण्णमासिणिं चंदे कंसि

७९८ सूर्यप्रज्ञप्ति: ५१८५-१०

मुनि दीपरत्रसागर

देसंसि जोएति?, ता जंसि णं देसंसि चंदे दोच्चं पुण्णमासिणिं जोएति ताते पुण्णमासिणीठाणातो मंडलं चउवीसेणं सतेणं छेत्ता बत्तीसं भागे उवाइणावेत्ता एत्थ णं तच्चं चंदे पुण्णमा-  
 सिणिं जोएति, ता एतेसिं पंचण्हं संवच्छराणं दुवालसमं पुण्णमासिणिं चंदे कंसि देसंसि जोएति?, ता जंसि णं देसंसि चंदे तच्चं पुण्णमासिणिं जोएति ताते पुण्णमासिणिट्ठाणाते  
 मंडलं चउवीसेणं सतेणं छेत्ता दोणिण अट्ठासीने भागसते उवायणावेत्ता एत्थ णं से चंदे दुवालसमं पुण्णमासिणिं जोएति, एवं खलु एतेणुवाएणं ताते २ पुण्णमासिणिट्ठाणातो मंडलं  
 चउवीसेणं सतेणं छेत्ता बत्तीसभागं उवातिणावेत्ता तंसि २ देसंसि तं तं पुण्णमासिणिं चंदे जोएति, ता एतेसिं णं पंचण्हं संवच्छराणं चरमं बावट्ठिं पुण्णमासिणिं चंदे कंसि देसंसि जो-  
 एति?, ता जंबुद्दीवस्स णं पाईणपटीणायताए उदीणदाहिणायताए जीवाए मंडलं चउवीसेणं सतेणं छेत्ता दाहिणिल्लंसि चउभागमंडलंसि सत्तावीसं भागे उवायणावेत्ता अट्ठावीस-  
 तिभागं वीसहा छेत्ता अट्ठारसभागे उवातिणावेत्ता तीहिं भागेहिं दोहि य कलाहिं पच्चत्थिमिल्लं चउभागमंडलं असंपत्ते एत्थ णं चंदे चरिमं बावट्ठिं पुण्णमासिणिं जोएति । ६३ ।  
 ता एएसिं णं पंचण्हं संवच्छराणं पढमं पुण्णमासिणिं सूरं कंसि देसंसि जोएति?, ता जंसि णं देसंसि सूरं चरिमं बावट्ठिं० पुण्णमासिणिट्ठाणातो मंडलं चउवीसेणं सतेणं छेत्ता चउण-  
 वतिं भागे उवातिणावेत्ता एत्थ णं से सूरिण पढमं पुण्णमासिणिं जोएइ, ता एएसिं णं पंचण्हं संवच्छराणं दोच्चं पुण्णमासिणिं सूरं कंसि देसंसि जोएति?, ता जंसि णं देसंसि सूरं पढमं  
 पुण्णमासिणिं जोएइ ताए पुण्णमासिणीठाणाओ मंडलं चउवीसेण सएणं छेत्ता चउणवइभागे उवाइणावेत्ता एत्थ णं से सूरं दोच्चं पुण्णमासिणिं जोएइ, ता एएसिं णं पंचण्हं संवच्छराणं  
 तच्चं पुण्णमासिणिं सूरं कंसि देसंसि जोएइ?, ता जंसि णं देसंसि सूरं दोच्चं पुण्णमासिणिं जोएति ताते पुण्णमासिणिट्ठाणाते मंडलं चउवीसेण सतेणं छेत्ता चउणउतिभागे उवातिणावेत्ता  
 एत्थ णं से सूरं तच्चं पुण्णमासिणिं जोएति, ता एतेसिं णं पंचण्हं संवच्छराणं दुवालसं पुण्णमासिणिं० जोएति?, ताते पुण्णमासिणिट्ठाणातो मंडलं चउवीसेणं सतेणं छेत्ता अट्ठत्ताले  
 भागसते उवाइणावेत्ता एत्थ णं से सूरं दुवालसमं पुण्णमासिणिं जोएति, एवं खलु एतेणुवाएणं ताते २ पुण्णमासिणिट्ठाणातो मंडलं चउवीसेणं सतेणं छेत्ता चउणउतिं २ भागे उवा-  
 तिणावेत्ता तंसि णं २ देसंसि तं तं पुण्णमासिणिं सूरं जोएति, ता एतेसिं णं पंचण्हं संवच्छराणं चरिमं बावट्ठिं पुण्णमासिणिं सूरं कंसि देसंसि जोएति?, ता जंबुद्दीवस्स णं पाईणपटी-  
 णायताए उदीणदाहिणायताए जीवाए मंडलं चउवीसेणं सएणं छेत्ता पुरच्छिमिल्लंसि चउभागमंडलंसि सत्तावीसं भागे उवातिणावेत्ता अट्ठावीसतिभागं वीसधा छेत्ता अट्ठारसभागे  
 उवादिणावेत्ता तीहिं भागेहिं दोहि य कलाहिं दाहिणिल्लं चउभागमंडलं असंपत्ते एत्थ णं सूरं चरिमं बावट्ठिं पुण्णमासिणिं जोएति । ६४ । ता एएसिं णं पंचण्हं संवच्छराणं पढमं अमावासं  
 चंदे कंसि देसंसि जोएति?, ता जंसि णं देसंसि चंदे चरिमं बावट्ठिं अमावासं जोएति ताते अमावासट्ठाणातो मंडलं चउवीसेणं सतेणं छेत्ता बत्तीसं भागे उवादिणावेत्ता एत्थ णं से  
 चंदे पढमं अमावासं जोएति, एवं जेणेव अभिलावेणं चंदस्स पुण्णमासिणीओ भणिताओ तेणेव अभिलावेणं अमावासाओ भणित्वाओ, बिइया ततिया दुवालसमी, एवं खलु एतेणु-  
 वाएणं ताते २ अमावासट्ठाणाते मंडलं चउवीसेणं सतेणं छेत्ता दुतीसं २ भागे उवादिणावेत्ता तंसि २ देसंसि तं तं अमावासं चंदेण जोएति, ता एतेसिं णं पंचण्हं संवच्छराणं चरमं बावट्ठिं  
 अमावासं चंदे कंसि देसंसि जोएति?, ता जंसि णं देसंसि चंदे चरिमं बावट्ठिं पुण्णमासिणिं जोएति ताते पुण्णमासिणिट्ठाणाए मंडलं चउवीसेणं सतेणं छेत्ता सोलसभागे ओसक्काव-  
 इत्ता एत्थ णं से चंदे चरिमं बावट्ठिं अमावासं जोएति । ६५ । ता एतेसिं णं पंचण्हं संवच्छराणं पढमं अमावासं सूरं कंसि देसंसि जोएति?, ता जंसि णं देसंसि सूरं चरिमं बावट्ठिं  
 अमावासं जोएति ताते अमावासट्ठाणाते मंडलं चउवीसेणं सतेणं छेत्ता चउणउतिभागे उवायणावेत्ता एत्थ णं से सूरं पढमं अमावासं जोएति, एवं जेणेव अभिलावेणं सूरियस्स पुण्ण-  
 मासिणीओ तेणेव अमावासाओवि, तं०-बिदिया तइया दुवालसमी, एवं खलु एतेणुवाएणं ताते २ अमावासट्ठाणाते मंडलं चउवीसेणं सतेणं छेत्ता चउणउतिं २ भागे उवायणावेत्ता  
 ता तंसि २ देसंसि तं तं अमावासं सूरिण जोएति, ता एतेसिं णं पंचण्हं संवच्छराणं चरिमं बावट्ठिं अमावासं सूरं कंसि देसंसि जोएइ?, ता जंसि णं देसंसि सूरं चरिमं बावट्ठिं पुण्णमासिं  
 जोएति ताते पुण्णमासिणिट्ठाणाते मंडलं चउवीसेणं सतेणं छेत्ता सत्तालीसं भागे ओसक्कावइत्ता एत्थ णं से सूरं चरिमं बावट्ठिं अमावासं जोएति । ६६ । ता एएसिं णं पंचण्हं संवच्छ-  
 राणं पढमं पुण्णमासिणिं चंदे केणं णक्खत्तेणं जोएति?, ता धणिट्ठाहिं, धणिट्ठाणं तिणिण मुहुत्ता एकूणवीसं च बावट्ठिभागा मुहुत्तस्स बावट्ठिभागं च सत्तट्ठिधा छेत्ता पण्णट्ठी चुणिण-  
 या भागा सेसा, तंसमयं च णं सूरिण केणं णक्खत्तेणं जोएति?, ता पुद्वाफग्गुणीहिं, ता पुद्वाफग्गुणीणं अट्ठावीसं मुहुत्ता अट्ठतीसं च बावट्ठिभागा मुहुत्तस्स बावट्ठिभागं च सत्त-  
 ट्ठिधा छेत्ता बत्तीसं चुणिण्या भागा सेसा, ता एएसिं णं पंचण्हं संवच्छराणं दोच्चं पुण्णमासिणिं चंदे केणं णक्खत्तेणं जोएति?, ता उत्तराहिं पोट्ठवताहिं, उत्तराणं पोट्ठवताणं सत्ता-  
 वीसं मुहुत्ता चोइस य बावट्ठिभागे मुहुत्तस्स बावट्ठिभागं च सत्तट्ठिधा छेत्ता बावट्ठी चुणिण्या भागा सेसा, तंसमयं च णं सूरं केणं णक्खत्तेणं जोएति?, ता उत्तराहिं फग्गुणीहिं,



उत्तराफग्गुणीणं सत्त मुहुत्ता तेत्तीसं च बावट्ठिभागा मुहुत्तस्स बावट्ठिभागं च सत्तट्ठिधा छेत्ता एकतीसं चुण्णिया भागा सेसा, ता एतेसिं णं पंचहं संवच्छराणं तच्चं पुण्णमासिणिं चंदे केणं णक्खत्तेणं जोएति?, ता अस्सिणीहिं, अस्सिणीणं एकवीसं मुहुत्ता णव य एगट्ठिभागा मुहुत्तस्स बावट्ठिभागं च सत्तट्ठिधा छेत्ता तेवट्ठी चुण्णिया भागा सेसा, तंसमयं च णं सूरे केणं णक्खत्तेणं जोएति?, ता चित्ताहिं, चित्ताणं एको मुहुत्तो अट्ठावीसं च बावट्ठी भागा मुहुत्तस्स बावट्ठिभागं च सत्तट्ठिधा छेत्ता तीसं चुण्णिया भागा सेसा, ता एतेसिं णं पंचहं संवच्छराणं दुवालसमं पुण्णमासिणिं चंदे केणं णक्खत्तेणं जोएति?, ता उत्तराहिं आसाढाहिं, उत्तराणं च आसाढाणं छवीसं मुहुत्ता छवीसं च बावट्ठिभागा मुहुत्तस्स बावट्ठिभागं च सत्तट्ठिधा छेत्ता चउपण्णं चुण्णिया भागा, तंसमयं च णं सूरे केणं णक्खत्तेणं जोएति?, ता पुण्णसुणा, पुण्णसुस्स सोलस मुहुत्ता अट्ठ य बावट्ठी भागा मुहुत्तस्स बावट्ठिभागं च सत्तट्ठिधा छेत्ता वीसं चुण्णिया भागा सेसा, ता एतेसिं णं पंचहं संवच्छराणं चरमं बावट्ठि पुण्णमासिणिं चंदे केणं णक्खत्तेणं जोएति?, ता उत्तराहिं आसाढाहिं, उत्तराणं आसाढाणं चरमसमए, तंसमयं च णं सूरे केणं णक्खत्तेणं जोएति?, ता पुस्सेणं, पुस्सस्स एकूणवीसं मुहुत्ता तेतालीसं च बावट्ठिभागा मुहुत्तस्स बावट्ठिभागं च सत्तट्ठिधा छेत्ता तेत्तीसं चुण्णिया भागा सेसा । ६७। एतेसिं णं पंचहं संवच्छराणं पढमं अमावासं चंदे केणं णक्खत्तेणं जोएति?, ता अस्सेसाहिं, अस्सेसाणं एके मुहुत्ते चत्तालीसं च बावट्ठिभागा मुहुत्तस्स बावट्ठिभागं च सत्तट्ठिधा छेत्ता छावट्ठी चुण्णिया भागा सेसा, तंसमयं च णं सूरे केणं णक्खत्तेणं जोएति?, ता अस्सेसाहिं चैव, अस्सेसाणं एको मुहुत्तो चत्तालीसं च बावट्ठिभागा मुहुत्तस्स बावट्ठिभागं च सत्तट्ठिधा छेत्ता छावट्ठि चुण्णिया भागा सेसा, ता एएसिं णं पंचहं संवच्छराणं दोच्चं अमावासं चंदे केणं णक्खत्तेणं जोएति?, ता उत्तराहिं फग्गुणीहिं, उत्तराणं फग्गुणीणं चत्तालीसं मुहुत्ता पणतीसं बावट्ठिभागा मुहुत्तस्स बावट्ठिभागं च सत्तट्ठिधा छेत्ता पण्णट्ठि चुण्णिया भागा सेसा, तंसमयं च णं सूरे केणं णक्खत्तेणं जोएति?, ता उत्तराहिं चैव फग्गुणीहिं, उत्तराणं फग्गुणीणं तथेव जथा चंदस्स, ता एतेसिं णं पंचहं संवच्छराणं तच्चं अमावासं चंदे केणं णक्खत्तेणं जोएति?, ता हत्थेणं, हत्थस्स चत्तारि मुहुत्ता तीसं च बावट्ठिभागा मुहुत्तस्स बावट्ठिभागं च सत्तट्ठिधा छेत्ता बावट्ठी चुण्णिया भागा सेसा, तंसमयं च णं सूरे केणं णक्खत्तेणं जोएति?, ता हत्थेणं चैव, हत्थस्स जहा चंदस्स, ता एएसिं णं पंचहं संवच्छराणं दुवालसमं अमावासं चंदे केणं णक्खत्तेणं जोएति?, ता अदाहिं, अदाणं चत्तारि मुहुत्ता दस य बावट्ठिभागा मुहुत्तस्स बावट्ठिभागं च सत्तट्ठिधा छेत्ता चउपण्णं चुण्णिया भागा सेसा, तंसमयं च णं सूरे केणं णक्खत्तेणं जोएति?, ता अदाहिं चैव, अदाणं जहा चंदस्स, ता एएसिं णं पंचहं संवच्छराणं चरिमं बावट्ठि अमावासं चंदे केणं णक्खत्तेणं जोएति?, ता पुण्णसुणा, पुण्णसुस्स बावीसं मुहुत्ता बायालीसं च बावट्ठिभागा मुहुत्तस्स सेसा, तंसमयं च णं सूरे केणं णक्खत्तेणं जोएति?, ता पुण्णसुणा चैव, पुण्णसुस्स णं जहा चंदस्स । ६८। ता जेणं अज्ज णक्खत्तेणं चंदे जोयं जोएति जंसि देसंसि से णं इमाणि अट्ठ एकूणवीसाणि मुहुत्तसताइं चउवीसं च बावट्ठिभागं मुहुत्तस्स बावट्ठिभागं च सत्तट्ठिधा छेत्ता बावट्ठि चुण्णियाभागे उवायिणावेत्ता पुणरवि से चंदे अण्णेणं तरिसएणं चैव णक्खत्तेणं जोयं जोएति अण्णंसि देसंसि, ता जेणं अज्ज णक्खत्तेणं चंदे जोयं जोएति जंसि देसंसि से णं इमाइं सोलस अट्ठतीस मुहुत्तसताइं अउणापण्णं च बावट्ठिभागे मुहुत्तस्स बावट्ठिभागं च सत्तट्ठिधा छेत्ता पण्णट्ठि चुण्णियाभागे उवायिणावेत्ता पुणरवि से णं चंदे तेणं चैव णक्खत्तेणं जोयं जोएति अण्णंसि देसंसि, ता जेणं अज्ज णक्खत्तेणं चंदे जोयं जोएति जंसि देसंसि से णं इमाइं चउपण्णं मुहुत्तसहस्साइं णव य मुहुत्तसताइं उवादिणावित्ता पुणरवि से चंदे अण्णेणं तारिसएणं णक्खत्तेणं जोयं जोएति तंसि देसंसि, ता जेणं अज्ज णक्खत्तेणं चंदे जोयं जोएति जंसि देसंसि से णं इमं एगं मुहुत्तसयसहस्सं अट्ठाणउतिं च मुहुत्तसताइं उवायिणावित्ता पुणरवि से चंदे तेणं चैव णक्खत्तेणं जोयं जोएइ तंसि देसंसि, ता जेणं अज्ज णक्खत्तेणं सूरे जोयं जोएति जंसि देसंसि से णं इमाइं तिण्णि छावट्ठाइं राइंदियसताइं उवादिणावेत्ता पुणरवि से सूरिए अण्णेणं तारिसएणं चैव णक्खत्तेणं जोयं जोएति तंसि देसंसि, ता जेणं अज्ज णक्खत्तेणं सूरे जोयं जोएति जंसि देसंसि से णं इमाइं सत्तदुतीसं राइंदियसताइं उवाइणावेत्ता पुणरवि से सूरे तेणं चैव णक्खत्तेणं जोयं जोएति तंसि देसंसि, ता जेणं अज्ज णक्खत्तेणं सूरे जोयं जोएति जंसि देसंसि तेणं इमाइं छत्तीसं सट्ठाइं राइंदियसयाइं उवाइणावित्ता पुणरवि से सूरे तेणं चैव णक्खत्तेणं जोयं जोएति तंसि देसंसि । ६९। ता जया णं इमे चंदे गतिसमावण्णए भवति तता णं इतरेवि चंदे गतिसमावण्णए भवति जता णं इतरे चंदे गतिसमावण्णए भवति तता णं इमेवि चंदे गतिसमावण्णए भवति, ता जया णं इमे सूरिए गइसमावण्णे भवति तथा णं इतरेवि सूरिए गइसमावण्णे भवति जता णं इतरे सूरिए गतिसमावण्णे भवति तथा णं इमेवि सूरिए गइसमावण्णे भवति, एवं गहेवि णक्खत्तेवि, ता जया णं इमे चंदे जुत्ते जोगेणं भवति तता णं इतरेवि चंदे जुत्ते जोगेणं भवति जया णं इतरे चंदे जुत्ते जोगेणं भवइ तता णं इमेवि चंदे जुत्ते जोगेणं भवति, एवं सूरेवि गहेवि णक्खत्तेवि, सतावि णं चंदा जुत्ता जोएहिं सतावि णं सूरा जुत्ता जोगेहिं सयावि (२००)

८०० सूर्यप्रज्ञप्ति: ५१६५-१०

मुनि दीपरत्नसागर

णं गहा जुत्ता जोगेहिं सयावि णं नक्खत्ता जुत्ता जोगेहिं दुहतोवि णं चंदा जुत्ता जोगेहिं दुहतोवि णं सूरा जुत्ता जोगेहिं दुहतोवि णं गहा जुत्ता जोगेहिं दुहतोवि णं णक्खत्ता जुत्ता जोगेहिं  
 मंडलं सतसहस्सेणं अट्टाणउतीए सतेहिं छेत्ता, इच्चेस णक्खत्तखेत्तपरिभागे णक्खत्तविजए पाहुडेति आहितेत्तिवेमि । ७० ॥ १०-२२ दसमं पाहुडं ॥ ता कहां ते संवच्छराणादी आहि०?,  
 तत्थ खलु इमे पंच संवच्छरा पं० तं०-चंदे चंदे अभिवड्ढिते चंदे अभिवड्ढिते, ता एतेसिं णं पंचण्हं संवच्छराणं पढमस्स चंदस्स संवच्छरस्स के आदी आहितेति वदेज्जा?, ता जे णं  
 पंचमस्स अभिवड्ढितसंवच्छरस्स पज्जवसाणे से णं पढमस्स चंदस्स संवच्छरस्स आदी अणंतरपुरक्खडे समए, ता से णं किंपज्जवसिते आहि०?, ता जे णं दोच्चस्स चंदसंवच्छरस्स  
 आदी से णं पढमस्स चंदसंवच्छरस्स पज्जवसाणे अणंतरपच्छाकडे समये, तंसमयं च णं चंदे केणं णक्खत्तेणं जोएति?, ता उत्तराहिं आसाढाहिं, उत्तराणं आसाढाणं छवीसं मुहुत्ता  
 छवीसं च बावट्टीभागा मुहुत्तस्स बावट्टीभागं च सत्तट्टिधा छित्ता चउप्पणं चुण्णिया भागा सेसा, तंसमयं सूरे केणं णक्खत्तेणं जोएति?, ता पुणबसुणा, पुणबसुस्स सोलस मुहुत्ता  
 अट्ट य बावट्टीभागा मुहुत्तस्स बावट्टीभागं च सत्तट्टिधा छेत्ता वीसं चुण्णिया भागा सेसा, ता एएसिं णं पंचण्हं संवच्छराणं दोच्चस्स चंदसंवच्छरस्स के आदी आहि०?, ता जे णं पढ-  
 मस्स चंदसंवच्छरस्स पज्जवसाणे से णं दोच्चस्स णं चंदसंवच्छरस्स आदी अणंतरपुरक्खडे समये, ता से णं किंपज्जवसिते आहि०?, ता जे णं तच्चस्स अभिवड्ढितसंवच्छरस्स आदी से  
 णं दोच्चस्स चंदसंवच्छरस्स पज्जवसाणे अणंतरपच्छाकडे समये, तंसमयं च णं चंदे केणं णक्खत्तेणं जोएति?, ता पुढाहिं आसाढाहिं, पुढाणं आसाढाणं सत्त मुहुत्ता तेवणं च बाव-  
 ट्टीभागा मुहुत्तस्स बावट्टीभागं च सत्तट्टिधा छेत्ता इगतालीसं चुण्णिया भागा सेसा, तंसमयं च णं सूरे केणं णक्खत्तेणं जोएति?, ता पुणबसुणा, पुणबसुस्स णं बायालीसं मुहुत्ता पण-  
 तीसं च बावट्टीभागा मुहुत्तस्स बावट्टीभागं च सत्तट्टिधा छेत्ता सत्त चुण्णिया भागा सेसा, ता एतेसिं णं पंचण्हं संवच्छराणं तच्चस्स अभिवड्ढितसंवच्छरस्स के आदी आहि०?, ता जे  
 णं दोच्चस्स चंदसंवच्छरस्स पज्जवसाणे से णं तच्चस्स अभिवड्ढितसंवच्छरस्स आदी अणंतरपुरक्खडे समए, ता से णं किंपज्जवसिते आहि०?, ता जे णं चउत्थरस चंदसंवच्छरस्स आदी  
 से णं तच्चस्स अभिवड्ढितसंवच्छरस्स पज्जवसाणे अणंतरपच्छाकडे समए, तंसमयं च णं चंदे केणं णक्खत्तेणं जोएति?, ता उत्तराहिं आसाढाहिं, उत्तराणं आसाढाणं तेरस मुहुत्ता  
 तेरस य बावट्टीभागा मुहुत्तस्स बावट्टीभागं च सत्तट्टिधा छेत्ता सत्तावीसं चुण्णिया भागा सेसा, तंसमयं च णं सूरे केणं णक्खत्तेणं जोएति?, ता पुणबसुणा, पुणबसुस्स दो मुहुत्ता  
 छप्पणं बावट्टीभागा मुहुत्तस्स बावट्टीभागं च सत्तट्टिधा छेत्ता सट्टी चुण्णिया भागा सेसा, ता एएसिं णं पंचण्हं संवच्छराणं चउत्थस्स चंदसंवच्छरस्स के आदी आहि०?, ता जे णं  
 तच्चस्स अभिवड्ढितसंवच्छरस्स पज्जवसाणे से णं चउत्थस्स चंदसंवच्छरस्स आदी अणंतरपुरक्खडे समये, ता से णं किंपज्जवसिते आहि०?, ता जे णं चरिमस्स अभिवड्ढितसंवच्छरस्स  
 आदी से णं चउत्थस्स चंदसंवच्छरस्स पज्जवसाणे अणंतरपच्छाकडे समये, तंसमयं च णं चंदे केणं णक्खत्तेणं जोएति?, ता उत्तराहिं आसाढाहिं, उत्तराणं आसाढाणं चत्तालीसं मुहुत्ता  
 चत्तालीसं च बावट्टीभागा मुहुत्तस्स बावट्टीभागं च सत्तट्टिधा छेत्ता चउदस चुण्णिया भागा सेसा, तंसमयं च णं सूरे केणं णक्खत्तेणं जोएति?, ता पुणबसुणा, पुणबसुस्स अउणतीसं  
 मुहुत्ता एकवीसं बावट्टीभागा मुहुत्तस्स बावट्टीभागं च सत्तट्टिधा छेत्ता सीतालीसं चुण्णिया भागा सेसा, ता एतेसिं णं पंचण्हं संवच्छराणं पंचमस्स अभिवड्ढितसंवच्छरस्स के आदी  
 आहिताति वदेज्जा?, ता जे णं चउत्थस्स चंदसंवच्छरस्स पज्जवसाणे से णं पंचमस्स अभिवड्ढितसंवच्छरस्स आदी अणंतरपुरक्खडे समये, ता से णं किंपज्जवसिते आहिताति वदेज्जा?,  
 ता जे णं पढमस्स चंदसंवच्छरस्स आदी से णं पंचमस्स अभिवड्ढितसंवच्छरस्स पज्जवसाणे अणंतरपच्छाकडे समये, तंसमयं च णं चंदे केणं णक्खत्तेणं जोएति?, ता उत्तराहिं आसा-  
 ढाहिं, उत्तराणं आसाढाणं चरमसमये, तंसमयं च णं सूरे केणं णक्खत्तेणं जोएति?, ता पुस्सेणं, पुस्सस्स णं एकवीसं मुहुत्ता तेतालीसं च बावट्टीभागा मुहुत्तस्स बावट्टीभागं च सत्तट्टिधा  
 छेत्ता तेत्तीसं चुण्णिया भागा सेसा । ७१ । एक्कारसमं पाहुडं ११ ॥ ता कति णं संवच्छरा आहि०?, तत्थ खलु इमे पंच संवच्छरा पं० तं०-णक्खत्ते चंदे उडू आदिच्चे अभिवड्ढिते, ता  
 एतेसिं णं पंचण्हं संवच्छराणं पढमस्स नक्खत्तसंवच्छरस्स णक्खत्तमासे तीसतिमुहुत्तेणं २ अहोरत्तेणं मिज्जमाणे केवतिए राइंदियग्गेणं आहि०?, ता सत्तावीसं राइंदियाइं एकवीसं  
 च सत्तट्टिभागा राइंदियस्स राइंदियग्गेणं आहितेति वदेज्जा, ता से णं केवतिए मुहुत्तग्गेणं आहितेति वदेज्जा?, ता अट्टसए एकूणवीसे मुहुत्ताणं सत्तावीसं च सत्तट्टिभागे मुहुत्तस्स  
 मुहुत्तग्गेणं आहितेति वदेज्जा, ता एएसिं णं अट्टा दुवालसक्खुत्तकडा णक्खत्ते संवच्छरे, ता से णं केवतिए राइंदियग्गेणं आहि०?, ता तिण्णि सत्तावीसे राइंदियसते एक्कावन्नं च  
 सत्तट्टिभागा राइंदियग्गेणं आहितेति वदेज्जा, ता से णं केवतिए मुहुत्तग्गेणं आहितेति वदेज्जा?, ता णव मुहुत्तसहस्सा अट्ट य बत्तीसे मुहुत्तसए छप्पन्नं च सत्तट्टिभागे मुहुत्तस्स मुहु-  
 त्तग्गेण आहि०, ता एएसिं णं पंचण्हं संवच्छराणं दोच्चस्स चंदसंवच्छरस्स चंदे मासे तीसतिमुहुत्तेणं अहोरत्तेणं गणिज्जमाणे केवतिए राइंदियग्गेणं आहितेति वदेज्जा?, ता एगूणतीसं

८०? सूर्यप्रज्ञप्तिः ५१५-११

मुनि दीपरत्नसागर

राइंदियाइं बत्तीसं बावट्टिभागा राइंदियस्स राइंदियग्गेणं आहि०, ता से णं केवतिए मुहुत्तग्गेणं आहि०?, ता अट्टपंचासए मुहुत्ते तीसं च बावट्टिभागे मुहुत्तग्गेणं आहिते०, ता एस णं अद्दा दुवालसखुत्तकडा चंदे संवच्छरे, ता से णं केवतिए राइंदियग्गेणं आहितेति वदेजा?, ता तिन्नि चउप्पन्ने राइंदियसते दुवालस य बावट्टिभागा राइंदियग्गेणं आहि०?, तीसे णं० केवतिए मुहुत्तग्गेणं आहि०, ता दस मुहुत्तसहस्साइं छच्च पणुवीसे मुहुत्तसए पण्णासं च बावट्टिभागे मुहुत्तेणं आहि०, ता एएसिं णं पंचण्हं संवच्छराणं तच्चस्स उडुसंवच्छरस्स उडुमासे तीसतिमुहुत्तेणं गणिज्जमाणे केवतिए राइंदियग्गेणं आहि०?, ता तीसं राइंदियाणं राइंदियग्गेणं आहि०, ता से णं केवतिए मुहुत्तग्गेणं आहि०?, ता णव मुहुत्तसताइं मुहुत्तग्गेणं आहितेति वदेजा, ता एस णं अद्दा दुवालसखुत्तकडा उडुसंवच्छरे, ता से णं केवतिए राइंदियग्गेणं आहि०?, ता तिण्णि सट्ठे राइंदियसते राइंदियग्गेणं आहि०, ता से णं केवतिए मुहुत्तग्गेणं आहि०?, ता दस मुहुत्तसहस्साइं अट्ट य सयाइं मुहुत्तग्गेणं आहि०, ता एएसिं णं पंचण्हं संवच्छराणं चउत्थस्स आदिच्चसंवच्छरस्स आइच्चे मासे तीसतिमुहुत्तेणं अहोरत्तेणं गणिज्जमाणे केवइए राइंदियग्गेणं आहि०?, ता तीसं राइंदियाइं अवद्धभागं च राइंदियस्स राइंदियग्गेणं आहि०, ता से णं केवतिए मुहुत्तग्गेणं आहि०?, ता णवपण्णरस मुहुत्तसए मुहुत्तग्गेणं आहि०, ता एस णं अद्दा दुवालसखुत्तकडा आदिच्चे संवच्छरे, ता से णं केवतिए राइंदियग्गेणं आहि०?, ता तिन्नि छावट्टे राइंदियसए राइंदियग्गेणं आहि०, ता से णं केवतिए मुहुत्तग्गेणं आहि०?, ता दस मुहुत्तसहस्साइं णव असीते मुहुत्तसते मुहुत्तग्गेणं आहिते०, ता एएसिं णं पंचण्हं संवच्छराणं पंचमस्स अभिवड्ढियसंवच्छरस्स अभिवड्ढिते मासे तीसतिमुहुत्तेणं अहोरत्तेणं गणिज्जमाणे केवतिए राइंदियग्गेणं आहि०? ता एकतीसं राइंदियाइं एगुणतीसं च मुहुत्ता सत्तरस य बावट्टिभागे मुहुत्तस्स राइंदियग्गेणं आहि०, ता से णं केवतिए मुहुत्तग्गेणं आहि०? ता णव एगुणसट्ठे मुहुत्तसते सत्तरस य बावट्टिभागे मुहुत्तस्स मुहुत्तग्गेणं आहि०, ता एस णं अद्दा दुवालसखुत्तकडा अभिवड्ढितसंवच्छरे, ता से णं केवतिए राइंदियग्गेणं आहि०?, तिण्णि तेसीते राइंदियसते एकवीसं च मुहुत्ता अट्टारस बावट्टिभागे मुहुत्तस्स राइंदियग्गेणं आहि०, ता से णं केवतिए मुहुत्तग्गेणं आहि०?, ता एक्कारस मुहुत्तसहस्साइं पंच य एक्कारस मुहुत्तसते अट्टारस बावट्टिभागे मुहुत्तस्स मुहुत्तग्गेणं आहिते० । ७२ । ता केवतियं ते नोजुगे राइंदियग्गेणं आहि०?, ता सत्तरस एकाणउते राइंदियसते एगुणवीसं च मुहुत्तं च सत्तावण्णे बावट्टिभागे मुहुत्तस्स बावट्टिभागं च सत्तट्ठिधा छेत्ता पणपण्णं चुण्णियाभागे राइंदियग्गेणं आहि०, ता से णं केवतिए मुहुत्तग्गेणं आहि०?, ता तेपण्णमुहुत्तसहस्साइं सत्त य उणापन्ने मुहुत्तसते सत्तावण्णं बावट्टिभागे मुहुत्तस्स बावट्टिभागं च सत्तट्ठिधा छेत्ता पणपण्णं चुण्णिया भागा मुहुत्तग्गेणं आहि०, ता केवतिए णं ते जुगप्पत्ते राइंदियग्गेणं आहि०?, ता अट्ठतीसं राइंदियाइं दस य मुहुत्ता चत्तारि य बावट्टिभागे मुहुत्तस्स बावट्टिभागं च सत्तट्ठिधा छेत्ता दुवालस चुण्णिया भागा राइंदियग्गेणं आहि०, ता से णं केवतिए मुहुत्तग्गेणं आहि०?, ता एक्कारस पण्णासे मुहुत्तसए चत्तारि य बावट्टिभागे बावट्टिभागं च सत्तट्ठिधा छेत्ता दुवालस चुण्णिया भागा मुहुत्तग्गेणं आहि०, ता केवतियं णं जुगे राइंदियग्गेणं आहि०?, ता अट्टारसतीसे राइंदियसते राइंदियग्गेणं आहि०, ता से णं केवतिए मुहुत्तग्गेणं आहि०?, ता चउप्पण्णं मुहुत्तसहस्साइं णव य मुहुत्तसताइं मुहुत्तग्गेणं आहि०, ता से णं केवतिए बावट्टिभागमुहुत्तग्गेणं आहि०?, ता चउत्तीसं सतसहस्साइं अट्टतीसं च बावट्टिभागा मुहुत्तग्गेणं आहि० । ७३ । ता कता णं एते आदिच्चचंदसंवच्छरा समादीया समपज्जवसिया आहि०?, ता सट्ठिं एए आदिच्चमासा बावट्टिं एते चंदमासा एस णं अद्दा छखुत्तकडा दुवालसभयिता तीसं एते आदिच्चसंवच्छरा एकतीसं एते चंदसंवच्छरा तता णं एते आदिच्चचंदसंवच्छरा समादीया समपज्जवसिया आहि०, ता कता णं एते आदिच्चउडुचंदणक्खत्तसंवच्छरा समादीया समपज्जवसिया आहि०?, ता सट्ठिं एते आदिच्चा मासा एगट्ठिं एते उडुमासा बावट्टिं एते चंदमासा सत्तट्ठिं एते नक्खत्ता मासा, एस णं अद्दा दुवालसखुत्तकडा दुवालसभयिता सट्ठिं एते आदिच्चा संवच्छरा एगट्ठिं एते उडू संवच्छरा बावट्टिं एते चंदा संवच्छरा सत्तट्ठिं एते नक्खत्ता संवच्छरा, तता णं एते आदिच्चउडुचंदणक्खत्ता संवच्छरा समादीया समपज्जवसिया आहि०, ता कता णं एते अभिवड्ढियआदिच्चउडुचंदणक्खत्ता संवच्छरा समादीया समपज्जवसिया आहि०?, ता सत्तावण्णं मासा सत्त य अहोरत्ता एक्कारस य मुहुत्ता तेवीसं बावट्टिभागा मुहुत्तस्स एते णं अभिवड्ढिता मासा सट्ठिं एते आदिच्चा मासा एगट्ठिं एते उडुमासा बावट्टी एते चंदमासा सत्तट्ठी एते नक्खत्तमासा एस णं अद्दा छप्पण्णसत्तखुत्तकडा दुवालसभयिता सत्त सया चोत्ताला एते णं अभिवड्ढिता संवच्छरा, सत्त सता असीता एते णं आदिच्चा संवच्छरा, सत्त सता तेणउता एते णं उडुसंवच्छरा, अट्ट सता छलुत्तरा एते णं चंदा संवच्छरा, एकसत्तरी अट्ट सया एए णं नक्खत्ता संवच्छरा, तता णं एते अभिवड्ढितआदिच्चउडुचंदनक्खत्ता संवच्छरा समादीया समपज्जवसिया आहि०, ता णयट्ठताए णं चंदे संवच्छरे तिण्णि चउप्पण्णे राइंदियसते दुवालस य बावट्टिभागे राइंदियस्स आहि०, ता अहातच्चेणं चंदे संवच्छरे तिण्णि चउप्पण्णे राइंदियसते पंच मुहुत्ते पण्णासं च बावट्टिभागे मुहुत्तस्स आहि० । ७४ ।

तत्थ खलु इमे छ उडू पं० तं०-पाउसे वरिसारत्ते सरते हेमंते वसंते गिम्हे, ता सवेवि णं एते चंदउडू दुवे २ मासाति चउप्पण्णेणं आदाणेणं गणिज्जमाणा सातिरेगाइं एगुणसट्ठी २ राईदियाइं राईदियग्गेणं आहि०, तत्थ खलु इमे छ ओमरत्ता पं० तं०-ततीये पवे सत्तमे एक्कारसमे पन्नरसमे एगुणवीसतिमे तेवीसतिमे पवे, तत्थ खलु इमे छ अतिरत्ता पं० तं०-चउत्थे पवे अट्ठमे वारसमे सोलसमे वीसतिमे चउवीसतिमे पवे, 'छवेव य अइरत्ता आइच्चाओ हवंति माणाइं। छवेव ओमरत्ता चंदाहि हवंति माणाहि ॥ ३० ॥ ७५। तत्थ खलु इमाओ पंच वासिक्कीओ पंच हेमंतीओ आउट्ठीओ पं०, ता एएसिं णं पंचण्हं संवच्छराणं पढमं वासिक्कीं आउट्ठिं चंदे केणं नक्खत्तेणं जोएति?, ता अभीयिणा, अभीयिस्स पढमसमएणं, तंसमयं च णं सूरु केणं णक्खत्तेणं जोएति?, ता पूसेणं, पूसस्स एगुणवीसं मुहुत्ता तेत्तालीसं च वावट्ठिभागा मुहुत्तस्स वावट्ठिभागं च सत्तट्ठिधा छेत्ता तेत्तीसं चुण्णिया भागा सेसा, ता एएसिं णं पंचण्हं संवच्छराणं दोच्चं वासिक्किं आउट्ठिं चंदे केणं०?, ता संठाणाहिं, संठाणाणं एक्कारस मुहुत्ता ऊतालीसं च वावट्ठिभागा मुहुत्तस्स वावट्ठिभागं च सत्तट्ठिधा छेत्ता तेपण्णं चुण्णिया भागा सेसा, तंसमयं सूरु केणं०?, ता पूसेणं, पूसस्स णं तं चेव जं पढमाए, एतेसिं णं पंचण्हं संवच्छराणं तच्चं वासिक्किं आउट्ठिं चंदे केणं०?, ता विसाहाहिं, विसाहाणं तेरस मुहुत्ता चउप्पण्णं च वावट्ठिभागा मुहुत्तस्स वावट्ठिभागं च सत्तट्ठिधा छेत्ता चत्तालीसं चुण्णिया भागा सेसा, तंसमयं च णं सूरु केणं०?, ता पूसेणं, पूसस्स तं चेव, ता एतेसिं णं पंचण्हं संवच्छराणं चउत्थिं वासिक्किं आउट्ठिं चंदे केणं०?, ता रेवतीहिं, रेवतीणं पणवीसं मुहुत्ता वत्तीसं च वावट्ठिभागा मुहुत्तस्स वावट्ठिभागं च सत्तट्ठिधा छेत्ता छत्तीसं चुण्णिया भागा सेसा, तंसमयं च णं सूरु केणं०?, ता पूसेणं, पूसस्स तं चेव, ता एतेसिं णं पंचण्हं संवच्छराणं पंचमिं वासिक्किं आउट्ठिं चंदे केणं०?, ता पुत्राहिं फग्गुणीहिं, पुत्राफग्गुणीणं वारस मुहुत्ता सत्तालीसं च वावट्ठिभागा मुहुत्तस्स वावट्ठिभागं च सत्तट्ठिधा छेत्ता तेरस चुण्णिया भागा सेसा, तंसमयं च णं सूरु केणं०?, ता पूसेणं, पूसस्स तं चेव। ७६। ता एएसिं णं पंचण्हं संवच्छराणं पढमं हेमंतिं आउट्ठिं चंदे केणं०?, ता हत्थेणं, हत्थस्स णं पंच मुहुत्ता पण्णासं च वावट्ठिभागा मुहुत्तस्स वावट्ठिभागं च सत्तट्ठिधा छेत्ता सट्ठी चुण्णिया भागा सेसा, तंसमयं च णं सूरु केणं०?, उत्तराहिं आसाढाहिं, उत्तराणं आसाढाणं चरिमसमए, ता एएसिं णं पंचण्हं संवच्छराणं दोच्चं हेमंतिं आउट्ठिं चंदे केणं०?, ता सनभिसयाहिं, सनभिसयाणं दुन्नि मुहुत्ता अट्ठावीसं च वावट्ठिभागा मुहुत्तस्स वावट्ठिभागं च सत्तट्ठिधा छेत्ता छत्तालीसं चुण्णिया भागा सेसा, तंसमयं च णं सूरु केणं०?, ता उत्तराहिं आसाढाहिं, उत्तराणं आसाढाणं चरिमसमए, एतेसिं णं पंचण्हं संवच्छराणं तच्चं हेमंतिं आउट्ठिं चंदे केणं०?, ता पूसेणं, पूसस्स एकूणवीसं मुहुत्ता तेतालीसं च वावट्ठिभागा मुहुत्तस्स वावट्ठिभागं च सत्तट्ठिधा छेत्ता तेत्तीसं चुण्णिया भागा सेसा, तंसमयं च णं सूरु केणं०?, ता उत्तराहिं आसाढाहिं, उत्तराणं आसाढाणं चरिमसमए, ता एतेसिं णं पंचण्हं संवच्छराणं चउत्थिं हेमंतिं आउट्ठिं चंदे केणं०?, ता मूलेणं, मूलस्स छ मुहुत्ता अट्ठावन्नं च वावट्ठिभागा मुहुत्तस्स वावट्ठिभागं च सत्तट्ठिधा छेत्ता वीसं चुण्णिया भागा सेसा, तंसमयं च णं सूरु केणं०?, ता उत्तराहिं आसाढाहिं, उत्तराणं आसाढाणं चरिमसमए, ता एतेसिं णं पंचण्हं संवच्छराणं पंचमिं हेमंतिं आउट्ठिं चंदे केणं०?, कत्तियाहिं, कत्तियाणं अट्ठारस मुहुत्ता छत्तीसं च वावट्ठिभागा मुहुत्तस्स वावट्ठिभागं च सत्तट्ठिधा छेत्ता छ चुण्णिया भागा सेसा, तंसमयं च णं सूरु केणं०?, ता उत्तराहिं आसाढाहिं, उत्तराणं आसाढाणं चरिमसमए। ७७। तत्थ खलु इमे दसविधे जोए पं० तं०-वसभाणुजोए वेणुयाणुजोते मंचे मंचाइमंचे छत्ते छत्तातिच्छत्ते जुअणद्धे घणसंमदे पीणिते मंडकप्पुते णामं दसमे, एतेसिं णं पंचण्हं संवच्छराणं छत्तातिच्छत्तं जोयं चंदे कंसि देसंसि जोएति?, ता जंबुहीवस्स पाईणपडीणायताए उदीणदाहिणायताए जीवाए मंडलं चउत्तीसेणं सतेणं छित्ता दाहिणपुरच्छिमिहंसि चउभागमंडलंसि सत्तावीसं भागे उवादिणावेत्ता अट्ठावीसतिभागं वीसधा छेत्ता अट्ठारसभागे उवादिणावेत्ता तीहिं भागेहिं दोहि य कलाहिं दाहिणपुरच्छिमिहंसि चउभागमंडलं असंपत्ते एत्थ णं से चंदे छत्तातिच्छत्तं जोयं जोएति, तं०-उप्पि चंदो मज्झे णक्खत्ते हेट्ठा आदिच्चे, तंसमयं च णं चंदे केणं०?, ता चित्ताणं चरिमसमए। ७८॥ वारसमं पाहुडं ? २॥ ता कहं ते चंद-मसो वड्ढोवड्ढी आहि०?, ता अट्ठपंचासीते मुहुत्तसते तीसं च वावट्ठिभागे मुहुत्तस्स, ता दोसिणापक्खाओ अन्धगारपक्खमयमाणे चंदे चत्तारि बायालसते छत्तालीसं च वावट्ठिभागे मुहुत्तस्स जाइं चंदे रज्जति तं०-पढमाए पढमं भागं बितियाए बितियं भागं जाव पण्णरसीए पण्णरसमं भागं, चरिमसमए चंदे रत्ते भवति, अवसेसे समए चंदे रत्ते विरत्ते य भवति, इयण्णं अमावासा, एत्थ णं पढमे पवे अमावासा, ता अंधारपक्खो, ता णं दोसिणापक्खं अयमाणे चंदे चत्तारि बायाले मुहुत्तसते छातालीसं च वावट्ठिभागा मुहुत्तस्स जाइं चंदे विरज्जति, तं०-पढमाए पढमं भागं बितियाए बितियं भागं जाव पण्णरसीए पण्णरसमं भागं, चरिमे समये चंदे विरत्ते भवति, अवसेससमए चंदे रत्ते य विरत्ते य भवति, इयण्णं पुण्णमासिणी, एत्थ णं दोच्चे पवे पुण्णमासिणी। ७९। तत्थ खलु इमाओ वावट्ठिं पुण्णमासिणीओ वावट्ठिं अमावासाओ पं०, वावट्ठिं एते कसिणा रागा वावट्ठिं एते कसिणा

विरागा, एते चउब्बीसे पव्वसते एते चउब्बीसे कसिणरागविरागसते, जावतियाणं पंचण्हं संवच्छराणं समया एगेणं चउब्बीसेणं समयसतेणूणका एवतिया परित्ता असंखेजा देसरागवि-  
रागसता भवंतीतिमकुखाता, अमावासातो णं पुण्णमासिणी चत्तारि वाताले मुहुत्तसते छत्तालीसं बावट्ठिभागे मुहुत्तस्स आहि०, ता पुण्णमासिणीतो णं अमावासा चत्तारि बायाले  
मुहुत्तसते छत्तालीसं बावट्ठिभागे मुहुत्तस्स आहि०, ता अमावासातो णं अमावासा अट्ठपंचासीते मुहुत्तसते तीसं च बावट्ठिभागे मुहुत्तस्स आहि०, ता पुण्णमासिणीतो णं  
पुण्णमासिणी अट्ठपंचासीते मुहुत्तसते तीसं बावट्ठिभागे मुहुत्तस्स आहि०, एस णं एवतिए चंदे मासे एस णं एवतिए सगले जुगे । ८० । ता चंदेणं अद्धमासेणं चंदे कति मंडलाइं  
चरति?, ता चोइस चउब्भागमंडलाइं चरति एगं च चउब्बीसयसतभागं मंडलस्स, ता आइच्चेणं अद्धमासेणं चंदे कति मंडलाइं चरति?, ता सोलस मंडलाइं चरति, सोलसमंडलचारी तदा  
अवराइं खलु दुवे अट्ठकाइं जाइं चंदे केणइ असामण्णगाइं सयमेव पविट्ठित्ता २ चारं चरति, कतराइं खलु ते दुवे अट्ठकाइं०?, इमाइं खलु ते वे अट्ठगाइं० तं०- निक्खममाणे चव  
अमावासतेणं पविसमाणे चव पुण्णमासितेणं, एताइं खलु दुवे अट्ठगाइं जाइं चंदे केणइ असामण्णगाइं सयमेव पविट्ठित्ता २ चारं चरइ, ता पढमायणगते चंदे दाहिणाते भागाते पवि-  
समाणे सत्त अद्धमंडलाइं जाइं चंदे दाहिणाते भागाए- पविसमाणे चारं चरति, कतराइं खलु ताइं०?, इमाइं खलु ताइं०?, तं०- विदिए अद्धमंडले चउत्थे० छट्ठे० अट्ठमे० दसमे० शारसमे०  
चउदसमे०, एताइं खलु ताइं सत्त अद्धमंडलाइं जाइं चंदे दाहिणाते भागाते पविसमाणे चारं चरति, ता पढमायणगते चंदे उत्तराते भागाते पविसमाणे छ अद्धमंडलाइं तेरस य सत्तट्ठि-  
भागाइं अद्धमंडलस्स जाइं चंदे उत्तराते भागाए पविसमाणे चारं चरति, कतराइं खलु ताइं छ०?, इमाइं खलु ताइं छ० तं०- तईए अद्धमंडले पंचमे० सत्तमे० नवमे० एक्कारसमे०  
तेरसमे० पन्नसमद्धमंडलस्स तेरस सत्तट्ठिभागाइं, एताइं खलु ताइं छ अद्धमंडलाइं तेरस य सत्तट्ठिभागाइं अद्धमंडलस्स जाइं चंदे उत्तराते भागाते पविसमाणे चारं चरति, एतावयाव  
पढमे चंदायणे समत्ते भवति, ता णक्खत्ते अद्धमासे नो चंदे अद्धमासे चन्दे अद्धमासे नो णक्खत्ते अद्धमासे, ता नक्खत्ताओ अद्धमासातो ते चंदेणं अद्धमासेणं किमधियं चरति?,  
एगं अद्धमंडलं चरति चत्तारि य सत्तट्ठिभागाइं अद्धमंडलस्स सत्तट्ठिभागं च एकतीसाए छेत्ता णव भागाइं, ता दोच्चायणगते चंदे पुरच्छिमाए भागाते णिक्खममाणे सत्त चउप्प-  
ण्णाइं जाइं चंदे परस्स चिन्नं पडिचरति सत्त तेरसकाइं जाइं चंदे अप्पणा चिण्णं चरति, ता दोच्चायणगते चंदे पच्चत्थिमाए भागाए निक्खममाणे छ चउप्पण्णाइं जाइं चंदे परस्स  
चिण्णं पडिचरति छ तेरसगाइं जाइं चंदे अप्पणो चिण्णं पडिचरति, अवरगाइं खलु दुवे तेरसगाइं जाइं चंदे केणइ असामण्णगाइं सयमेव पविट्ठित्ता २ चारं चरति, कतराइं खलु ताइं  
दुवे०?, इमाइं खलु ताइं दुवे० सब्बभंतरे चव मंडले सब्बबाहिरे चव मंडले, एयाणि खलु ताणि दुवे तेरसगाइं जाइं चंदे केणइ जाव चारं चरइ, एतावता दोच्चे चंदायणे समत्ते भवति,  
ता णक्खत्ते मासे नो चंदे मासे चंदे मासे णो णक्खत्ते मासे, ता णक्खत्ताते मासाए चंदेणं मासेणं किमधियं चरति?, ता दो अद्धमंडलाइं चरति अट्ठ य सत्तट्ठिभागाइं अद्धमंडलस्स  
सत्तट्ठिभागं च एकतीसधा छेत्ता अट्ठारस भागाइं, ता तच्चायणगते चंदे पच्चत्थिमाते भागाए पविसमाणे बाहिराणंतरस्स पच्चत्थिमिल्लस्स अद्धमंडलस्स ईतालीसं सत्तट्ठिभागाइं जाइं  
चंदे अप्पणो परस्स य चिण्णं पडिचरति, तेरस सत्तट्ठिभागाइं जाइं चंदे परस्स चिण्णाइं पडिचरति, तेरस सत्तट्ठिभागाइं जाइं चंदे अप्पणो परस्स य चिण्णं पडिचरति, एतावयाव बाहिराणं-  
तरे पच्चत्थिमिल्ले अद्धमंडले समत्ते भवति, तच्चायणगते चंदे पुरच्छिमाए भागाए पविसमाणे बाहिरतच्चस्स पुरच्छिमिल्लस्स अद्धमंडलस्स ईतालीसं सत्तट्ठिभागाइं जाइं चंदे अप्पणो  
परस्स य चिण्णाइं पडियरति तेरस सत्तट्ठिभागाइं जाइं चंदे परस्स चिण्णं पडियरति तेरस सत्तट्ठिभागाइं जाइं चंदे अप्पणो परस्स य चिण्णं पडिचरति, एतावताव बाहिरतच्चे पुरच्छिमिल्ले  
अद्धमंडले समत्ते भवति, ता तच्चायणगते चंदे पच्चत्थिमाते भागाते पविसमाणे बाहिरचउत्थस्स पच्चत्थिमिल्लस्स अद्धमंडलस्स अट्ठ सत्तट्ठिभागाइं सत्तट्ठिभागं च एकतीसधा छेत्ता अ-  
ट्ठारस भागाइं जाइं चंदे अप्पणो परस्स य चिण्णाइं पडियरति, एतावताव बाहिरचउत्थपच्चत्थिमिल्ले अद्धमंडले समत्ते भवइ, एवं खलु चंदेणं मासेणं चंदे तेरस चउप्पण्णगाइं दुवे  
तेरसगाइं जाइं चंदे परस्स चिण्णाइं पडिचरति, तेरस तेरसगाइं जाइं चंदे अप्पणो चिण्णाइं पडियरति, दुवे ईतालीसगाइं दुवे तेरसगाइं अट्ठ सत्तट्ठिभागं च एकतीसधा छेत्ता अट्ठार-  
स भागाइं जाइं चंदे अप्पणो परस्स य चिण्णाइं पडिचरति, अवरगाइं खलु दुवे तेरसगाइं जाइं चंदे केणइ असामण्णगाइं सयमेव पविट्ठित्ता २ चारं चरति, इच्चेसो चंदमासो, अभिग-  
मण्णिक्खमणवुड्ढिणिवुड्ढिणिवुड्ढिणवट्ठित्तसंठाणसंठितीविउव्वणगिड्ढिपत्ते रूवी चंदे देवे २ आहितेतिवदेजा । ८१ ॥ तेरसमं पाहुडं १३ ॥ ता कता ते दोसिणा बहू आहि०?, ता दोसिणाप-  
क्खेणं दोसिणा बहू आहि०, ता कंहं ते दोसिणापक्खे दोसिणा बहू आहि०?, ता अंधकारपक्खाओ णं दोसिणा बहू आहि०, ता कंहं ते अंधकारपक्खातो दोसिणापक्खे दोसिणा बहू आहि०?,  
ता अंधकारपक्खातो णं दोसिणापक्खं अयमाणे चंदे चत्तारि बायाले मुहुत्तसते छत्तालीसं च बावट्ठिभागे मुहुत्तस्स जाइं चंदे विरज्जति, तं०- पढमाए पढमं भागं विदियाए जाव पण्ण-  
रसीए पण्णरसं भागं, एवं खलु अंधकारपक्खातो दोसिणापक्खे दोसिणा बहू आहि०, ता केवतिया णं दोसिणापक्खे दोसिणा बहू आहि०?, ता परित्ता असंखेजा भागा, ता (२०१)

८०४ सूर्यप्रज्ञप्ति: ५१५-१४

कता ते अंधकारे बहू आहि०?, ता अंधयारपक्खे णं बहू अंधकारे आहि०, ता कंहं ते अंधकारपक्खे अंधकारे बहू आहि०?, ता दोसिणापक्खातो अंधकारपक्खे अंधकारे बहू आहि०, ता कंहं ते दोसिणापक्खातो अंधकारपक्खे अंधकारे बहू आहि०?, ता दोसिणापक्खातो णं अंधकारपक्खं अयमाणे चंदे चत्तारि बाताले मुहुत्तसते छायालीसं च बावट्ठिभागे मुहुत्तस्स जाइं चंदे रज्जति तं०-पढमाए पढमं भागं बिदियाए बिदियं जाव पण्णरसीए पण्णरसमं भागं, एवं खलु दोसिणापक्खातो अंधकारपक्खे अंधकारे बहू आहि०, ता केवतिए णं अंधकारपक्खे अंधकारे बहू आहि०?, परित्ता असंखेज्जा भागा । ८२ ॥ चोइसमं पाहुडं १४ ॥ ता कंहं ते सिग्घगती वत्थू आहि०?, ता एतेसिं णं चंदिमसूरियगहगणनक्खत्तारारूवाणं चंदेहिंतो सूरु सिग्घगती सूरुहिंतो गहा सिग्घगती गहेहिंतो णक्खत्ता सिग्घगती णक्खत्तेहिंतो तारा सिग्घगती, सब्बप्पगती चंदा सब्बसिग्घगती तारा, ता एगमेगेणं मुहुत्तेणं चंदे केवतियाइं भागसताइं गच्छति?, ता जं जं मंडलं उवसंकमित्ता चारं चरति तस्स २ मंडलपरिक्खेवस्स सत्तरस अडसट्ठिं भागसते गच्छति मंडलं सतसहस्सेणं अट्ठाणउतीसतेहिं छेत्ता, ता एगमेगेणं मुहुत्तेणं सूरिए केवतियाइं भागसयाइं गच्छति?, ता जं जं मंडलं उवसंकमित्ता चारं चरति तस्स २ मंडलपरिक्खेवस्स अट्ठारस तीसे भागसते गच्छति मंडलं सतसहस्सेणं अट्ठाणउतीसतेहिं छेत्ता, ता एगमेगेणं मुहुत्तेणं णक्खत्ते केवतियाइं भागसताइं गच्छति?, ता जं जं मंडलं उवसंकमित्ता चारं चरति तस्स २ मंडलपरिक्खेवस्स अट्ठारस पण्णतीसे भागसते गच्छति मंडलं सतसहस्सेणं अट्ठाणउतीसतेहिं छेत्ता । ८३ । ता जया णं चंदं गतिसमावण्णं सूरु गतिसमावण्णे भवति से णं गतिमाताए केवतियं विसेसेति?, बावट्ठिभागे विसेसेति, ता जया णं चंदं गतिसमावण्णं णक्खत्ते गतिसमावण्णे भवइ से णं गतिमाताए केवतियं विसेसेइ?, ता सत्तट्ठिभागे विसेसेति, ता जता णं सूरु गतिसमावण्णं णक्खत्ते गतिसमावण्णे भवति से णं गतिमाताए केवतियं विसेसेति?, ता पंच भागे विसेसेति, ता जता णं चंदं गतिसमावण्णं अभीयीणक्खत्ते णं गतिसमावण्णे पुरच्छिमाते भागाते समासादेति, पुरच्छिमाते भागाते समासादेत्ता णव मुहुत्ते सत्तावीसं च सत्तट्ठिभागे मुहुत्तस्स चंदेण सद्धिं जोयं जोएति ता जोयं अणुपरियट्ठति ता विप्पजहाति ता विगतजोई यावि भवति, ता जता णं चंदं गतिसमावण्णं सवणे णक्खत्ते गतिसमावण्णे पुरच्छिमाए भागादे समासादेति ता तीसं मुहुत्ते चंदेण सद्धिं जोअं जोएति ता जोयं अणुपरियट्ठति ता विप्पजहाति ता विगतजोई यावि भवइ, एवं एएणं अभिलावेणं नेतव्वं, पण्णरसमुहुत्ताइं तीसतिमुहुत्ताइं पणयालीसमुहुत्ताइं भाणितव्वाइं जाव उत्तरासाढा, ता जता णं चंदं गतिसमावण्णं गहे गतिसमावण्णे पुरच्छिमाते भागाते समासादेति ता चंदेणं सद्धिं जोगं जुंजति ता जोगं अणुपरियट्ठति ता विप्पजहति विगतजोई यावि भवति, ता जया णं सूरु गतिसमावण्णं अभीयीणक्खत्ते गतिसमावण्णे पुरच्छिमाते भागाते समासादेति ता चत्तारि अहोरत्ते छच्च मुहुत्ते सूरुणं सद्धिं जोयं जोएति ता जोयं अणुपरियट्ठति ता विप्पजहति ता विगतजोगी यावि भवति, एवं छ अहोरत्ता एक्कवीसं मुहुत्ता य तेरस अहोरत्ता बारस मुहुत्ता य वीसं अहोरत्ता तिण्णि मुहुत्ता य सब्बे भणितव्वा जाव जता णं सूरु गतिसमावण्णं उत्तरासाढाणक्खत्ते गतिसमावण्णे पुरच्छिमाते भागाते समासादेति ता वीसं अहोरत्ते तिण्णि य मुहुत्ते सूरुणं सद्धिं जोयं जोएति ता जोयं अणुपरियट्ठति ता विप्पजहति ता विगतजोगी यावि भवति, ता जता णं सूरु गतिसमावण्णं गहे गतिसमावण्णे पुरच्छिमाते भागाते समासादेति ता सूरुणं सद्धिं यथाजोयं जुंजति ता यथाजोयं अणुपरियट्ठति ता जाव विप्पजहति ता विगतजोगी यावि भवति । ८४ । ता णक्खत्तेणं मासेणं चंदे कति मंडलाइं चरति?, ता तेरस मंडलाइं चरति तेरस य सत्तट्ठिभागे मंडलस्स, ता णक्खत्तेणं मासेणं सूरु कति मंडलाइं चरति?, तेरस मंडलाइं चरति चोत्तालीसं च सत्तट्ठिभागे मंडलस्स, ता णक्खत्तेणं मासेणं णक्खत्ते कति मंडलाइं चरति?, ता तेरस मंडलाइं चरति अद्धसीतालीसं च सत्तट्ठिभागे मंडलस्स, ता चंदेणं मासेणं चंदे कति मंडलाइं चरति?, चोइस चउभागाइं मंडलाइं चरति एगं च चउवीससतं भागं मंडलस्स, ता चंदेणं मासेणं सूरु कति मंडलाइं चरति?, ता पण्णरस चउभागूणाइं मंडलाइं चरति एगं च चउवीससयभागं मंडलस्स, ता चंदेणं मासेणं णक्खत्ते कति मंडलाइं चरति?, ता पण्णरस चउभागूणाइं मंडलाइं चरति छच्च चउवीससतभागे मंडलस्स, ता उडुणा मासेणं चंदे कति मंडलाइं चरति?, ता चोइस मंडलाइं चरति तीसं च एगाट्ठिभागे मंडलस्स, ता उडुणा मासेणं सूरु कति मंडलाइं चरति?, ता पण्णरस मंडलाइं चरति, ता उडुणा मासेणं णक्खत्ते कति मंडलाइं चरति?, ता पण्णरस मंडलाइं चरति पंच य बावीससतभागे मंडलस्स, ता आदिच्चेणं मासेणं चंदे कति मंडलाइं चरति?, ता चोइस मंडलाइं चरति एक्कारस य भागे मंडलस्स, ता आदिच्चेणं मासेणं सूरु कति मंडलाइं चरति?, ता पण्णरस चउभागाहिगाइं मंडलाइं चरति, ता आदिच्चेणं मासेणं णक्खत्ते कति मंडलाइं चरति?, ता पण्णरस चउभागाहिगाइं मंडलाइं चरति पंचतीसं च वीससतभागमंडलाइं चरति, ता अभिवड्ढिणं मासेणं चंदे कति मंडलाइं चरति?, ता पण्णरस मंडलाइं तेसीतिं छलसीयसतभागे मंडलस्स, ता अभिवड्ढिणं मासेणं सूरु कति मंडलाइं चरति?, ता सोलस मंडलाइं चरति तीहिं भागेहिं ऊणगाइं दोहिं अडयालेहिं सएहिं मंडलं छित्ता, अभिवड्ढिणं मासेणं णक्खत्ते कति मंडलाइं चरति?,

ता सोलस मंडलाइं चरति सीतालीसाए सएहिं भागेहिं अहियाइं चोइसहिं अट्टासीएहिं सएहिं मंडलं छेत्ता । ८५ । ता एगमेगेणं अहोरत्तेणं चंदे कति मंडलाइं चरति ? ता एगं अद्धमंडलं चरति एकतीसाए भागेहिं ऊणं णवहिं पण्णरसेहिं सएहिं अद्धमंडलं छेत्ता, ता एगमेगेणं अहोरत्तेणं मूरिए कति मंडलाइं चरति ? ता एगं अद्धमंडलं चरति, ता एगमेगेणं अहोरत्तेणं णक्खत्ते कति मंडलाइं चरति ? ता एगं अद्धमंडलं चरति दोहिं भागेहिं अधियं वत्तीसेहिं सएहिं अद्धमंडलं छेत्ता, ता एगमेगं मंडलं चंदे कतिहिं अहोरत्तेहिं चरति ? ता दोहिं अहोरत्तेहिं चरति एकतीसाए भागेहिं अधिनेहिं चउहिं चोतालेहिं सतेहिं राइंदिएहिं छेत्ता, ता एगमेगं मंडलं सूर कतिहिं अहोरत्तेहिं चरति ? ता दोहिं अहोरत्तेहिं चरति, ता एगमेगं मंडलं णक्खत्ते कतिहिं अहोरत्तेहिं चरति ? ता दोहिं अहोरत्तेहिं चरति दोहिं भागेहिं ऊणेहिं तिहिं सत्तसट्टेहिं सतेहिं राइंदिएहिं छेत्ता, ता जुगेणं चंदे कति मंडलाइं चरति ? ता अट्ठचुलसीते मंडलसते चरति, ता जुगेणं सूर कति मंडलाइं चरति ? ता णवपण्णरसे मंडलसते चरति, ता जुगेणं णक्खत्ते कति मंडलाइं चरति ? ता अट्ठारसपण्णतीसे दुभागमंडलसते चरति, इच्चेसा मुहुत्तगती रिक्खानिमासराइंदियजुगमंडलपविभत्ती सिग्घगती वत्थु आहितेत्तिवेमि । ८६ ॥ पन्नरसमं पाहुडं १५ ॥ ता कंहं ते दोसिणालक्खणे आहिं ? ता चंदलेसादी य दोसिणादी य दोसिणाई य चंदलेसादी य के अट्टे किलक्खणे ? ता एकट्टे एगलक्खणे, ता सूरलेस्सादी य आयवेइ य आतवेति य सूरलेस्सादी य के अट्टे किलक्खणे ? ता एगट्टे एगलक्खणे, ता अंधकारेति य छायाइ य छायाति य अंधकारेति य के अट्टे किलक्खणे ? ता एगट्टे एगलक्खणे । ८७ ॥ सोलसं पाहुडं १६ ॥ ता कंहं ते चयणोववाते आहिं ? तत्थ खलु इमाओ पणवीसं पडिवत्तीओ पं०, तत्थ एगे एव०-ता अणुसमयमेव चंदिमसूरिया अण्णे चयंति अण्णे उववज्जंति, एवं जहेव हेट्ठा तहेव जाव एगे पुण एव०-ता अणुओसप्पिणीउस्स-प्पिणीमेव चंदिमसूरिया अण्णे चयंति अण्णे उववज्जंति एगे एव०, वयं पुण एवं वदामो-ता चंदिमसूरिया णं देवा महिइढीआ महाजुतीया महाबला महाजसा महासोक्खा महाणु-भावा वरवत्थधरा वरमल्लधरा वरगन्धधरा वराभरणधरा अब्बोच्छित्तिणयट्ठताए काले अण्णे चयंति अण्णे उववज्जंति आहिं । ८८ ॥ सत्तरसं पाहुडं १७ ॥ ता कंहं ते उच्चत्ते आहिं ? तत्थ खलु इमाओ पणवीसं पडिवत्तीओ पं०, तत्थेगे एव०-ता एगं जोयणसहस्सं सूर उइढं उच्चत्तेणं दिवइढं चंदे एगे एव०, एगे पुण०-ता दो जोयणसहस्साइं सूर उइढं उच्चत्तेणं अइढातिजाइं चंदे एगे एव०, एगे पुण०-ता तिन्नि जोयणसहस्साइं सूर उइढं उच्चत्तेणं अद्धुट्टाइं चंदे०, एगे पुण०-ता चत्तारि जोयणसहस्साइं सूर उइढं उच्चत्तेणं अद्धपंचमाइं चंदे एगे एव०, एगे पुण०-ता पंच जोयणसहस्साइं सूर उइढं उच्चत्तेणं अद्धछट्टाइं चंदे एगे एव०, एगे पुण०-ता छ जोयणसहस्साइं सूर उइढं उच्चत्तेणं अद्धसत्तमाइं चंदे एगे एव०, एगे पुण०-ता सत्त जोयणसहस्साइं सूर उइढं उच्चत्तेणं अद्धट्टमाइं चंदे एगे एव० एगे पुण०-ता अट्ट जोयणसहस्साइं सूर उइढं उच्चत्तेणं अद्धनवमाइं चंदे एगे एव०, एगे पुण०-ता नव जोयणसहस्साइं सूर उइढं उच्चत्तेणं अद्धदसमाइं चंदे एगे एव०, एगे पुण०-ता दस जोयणसहस्साइं सूर उइढं उच्चत्तेणं अद्धएकारस चंदे एगे एव०, एगे पुण०-एकारस जोयणसहस्साइं सूर उइढं उच्चत्तेणं अद्धबारस चंदे०, एतेणं अभिलावेणं णेतव्वं, बारस सूर अद्धतेरस चंदे तेरस सूर अद्धचोइस चंदे चउदस सूर अद्धपण्णरस चंदे पण्णरस सूर अद्धसोलस चंदे सोलस सूर अद्धसत्तरस चंदे सत्तरस सूर अद्धअट्ठारस चंदे अट्ठारस सूर अद्धएकूणवीसं चंदे एकोणवीसं सूर अद्धवीसं चंदे वीसं सूर अद्धएक्कवीसं चंदे एक्कवीसं सूर अद्धवावीसं चंदे वावीसं सूर अद्धतेवीसं चंदे तेवीसं सूर अद्धचउवीसं चंदे चउवीसं सूर अद्धपणवीसं चंदे एगे एव०, एगे पुण०-पणवीसं जोयणसहस्साइं सूर उइढं उच्चत्तेणं अद्धल्लवीसं चंदे एगे एव०, वयं पुण०- एवं वदामो-ता इमीसे रयणप्पभाए पुढवीए बहुसमरमणिजाओ भूमिभागाओ सत्त णउइजोयणसए उइढं उप्पत्तित्ता हेट्ठिल्ले ताराविमाणे चारं चरति अट्ठजोयणसते उइढं उप्प-त्तित्ता सूरविमाणे चारं चरति अट्टअसीए जोयणसए उइढं उप्पत्तित्ता चंदविमाणे चारं चरति णव जोयणसताइं उइढं उप्पत्तित्ता उवरिल्ले ताराविमाणे चारं चरति, हेट्ठिल्लतो ताराविमा-णातो दसजोयणाइं उइढं उप्पत्तित्ता सूरविमाणे चारं चरति नउत्तिं जोयणाइं उइढं उप्पत्तित्ता चंदविमाणे चारं चरति दसोवरिं जोयणसतं उइढं उप्पत्तित्ता उवरिल्ले ताराव्वे चारं चरति, सूरविमाणातो असीतिं जोयणाइं उइढं उप्पत्तित्ता चंदविमाणे चारं चरति जोयणसतं उइढं उप्पत्तित्ता उवरिल्ले ताराव्वे चारं चरति, ता चंदविमाणातो णं वीसं जोयणाइं उइढं उप्प-त्तित्ता उवरिल्लते ताराव्वे चारं चरति, एवामेव सपुद्दावरेणं दसुत्तरजोयणसते बाहल्ले तिरियमसंखेज्जे जोतिसविसए जोतिसं चारं चरति आहिं । ८९ । ता अत्थि णं चंदिमसूरियाणं देवाणं हिट्ठं पि ताराव्वे अणुं पि तुल्लावि समं पि ताराव्वे अणुं पि तुल्लावि उप्पि पि ताराव्वे अणुं पि तुल्लावि ? ता अत्थि, ता कंहं ते चंदिमसूरियाणं देवाणं हिट्ठं पि ताराव्वे अणुं पि तुल्लावि समं पि ताराव्वे अणुं पि तुल्लावि उप्पि पि ताराव्वे अणुं पि तुल्लावि ? ता जहा २ णं तेसिं णं देवाणं तवणियमबंधवेराइं उस्सिताइं भवंति तहा २ णं तेसिं देवाणं एवं भवति, तं०-अणुत्ते वा तुल्लत्ते वा, ता एवं खलु चंदिमसूरियाणं देवाणं हिट्ठं पि ताराव्वे अणुं पि तुल्लावि तहेव । ९० । ता एगमेगस्स णं चंदस्स देवस्स केवतिया गहा परिवारो पं० केवतिया

नक्खत्ता परिवारो पं० केवतिया तारा परिवारो पं०?, ता एगमेगस्स णं चंदस्स देवस्स अट्टासीती गहा परिवारो पं०, ता अट्टावीसं णक्खत्ता परिवारो पं०, 'छावट्टिसहस्साइं णव चेव सताइं पंचसयराइं। एगससीपरिवारो तारागणकोडिकोडीणं ॥ ३१ ॥ परिवारो पं० । ९१। ता मंदरस्स णं पव्वतस्स केवतियं अबाधाए जोइसे चारं चरति?, ता एकारस एक्कवीसे जोयण-सते अबाधाए जोइसे चारं चरति, ता लोअंतातो णं केवतियं अबाधाए जोइसे पं०?, ता एकारस एकारे जोयणसते अबाधाए जोइसे पं० । ९२। ता जंबुहीवे णं दीवे कतरे णक्खत्ते सब्भंतरिहं चारं चरति कतरे णक्खत्ते सब्बाहिरिहं चारं चरति कयरे णक्खत्ते सब्बवरिहं चारं चरति कयरे णक्खत्ते सब्बहिट्टिहं चारं चरइ?, अभीयी णक्खत्ते सब्बिभतरिहं चारं चरति, मूले णक्खत्ते सब्बाहिरिहं चारं चरति, साती णक्खत्ते सब्बवरिहं चारं चरति, भरणी णक्खत्ते सब्बहेट्टिहं चारं चरति । ९३। ता चंदविमाणे णं किंसंठिते पं०?, ता अद्धकवि-ट्टुगसंठाणसंठिते सब्बफालियामए अब्भुग्गयमूसितपहसिते विविधमणिरयणभत्तिचित्ते तथेव जाव पडिरूवे, एवं सूरविमाणे गहविमाणे णक्खत्तविमाणे ताराविमाणेवि, ता चंदविमाणे णं केवतियं आयामविकखंभेणं केवतियं परिकखेवेणं केवतियं बाहल्लेणं पं०?, ता छप्पणं एगट्टिभागे जोयणस्स आयामविकखंभेणं तं तिगुणं सविसेसं परिरयेणं अट्टावीसं एगट्टिभागे जो-यणस्स बाहल्लेणं पं०, ता सूरविमाणे णं केवतियं आयामविकखंभेणं पुच्छा, ता अडयालीसं एगट्टिभागे जोयणस्स आयामविकखंभेणं तं तिगुणं सविसेसं परिरएणं चउव्वीसं एगट्टिभागे जोयणस्स बाहल्लेणं पं०, ता गहविमाणे णं पुच्छा, ता अद्धजोयणं आयामविकखंभेणं तं तिगुणियं सविसेसं परिरएणं कोसं बाहल्लेणं पं०, ता णक्खत्तविमाणे णं केवतियं पुच्छा, ता कोसं आयामविकखंभेणं तं तिगुणं सविसेसं परिरतेणं अद्धकोसं बाहल्लेणं पं०, ता ताराविमाणे णं केवतियं पुच्छा, ता अद्धकोसं आयामविकखंभेणं तं तिगुणं सविसेसं परिरएणं पंचधणुसयाइं बाहल्लेणं पं०, ता चंदविमाणं कति देवसाहस्सीओ परिवहंति?, सोलस देवसाहस्सीओ परिवहंति, तं०-पुरच्छिमेणं सीहरूवधारीणं चत्तारि देवसाहस्सीओ परिवहंति दाहिणेणं गयरू-वधारीणं चत्तारि० पच्चत्थिमेणं वसभरूवधारीणं चत्तारि देव० उत्तरेणं तुरगरूवधारीणं चत्तारि देव०, एवं सूरविमाणंपि, ता गहविमाणे णं कति देवसाहस्सीओ परिवहंति?, ता अट्ठ देवसाहस्सीओ परिवहंति, तं०-पुरच्छिमेणं सिंहरूवधारीणं दो देवसाहस्सीओ परिवहंति एवं जाव उत्तरेणं तुरगरूवधारीणं, ता नक्खत्तविमाणे णं कति देवसाहस्सीओ परिवहंति?, ता चत्तारि देवसाहस्सीओ परिवहंति, तं०-पुरच्छिमेणं सीहरूवधारीणं एक्का देवसाहस्सी परिवहति एवं जाव उत्तरेणं तुरगरूवधारीणं देवाणं, ता ताराविमाणे णं कति०?, ता दो देव-साहस्सीओ परिवहंति, तं०-पुरच्छिमेणं सीहरूवधारीणं पंच देवसता परिवहंति एवं जावुत्तरेणं तुरगरूवधारीणं । ९४। एतेसिं णं चंदिमसूरियगहणक्खत्ततारारूवाणं कयरे२हंतो सि-ग्घगती वा मंदगती वा?, ता चंदेहंतो सूरि सिग्घगती सुरेहंतो गहा सिग्घगती गहेहंतो णक्खत्ता सिग्घगती णक्खत्तेहंतो तारा सिग्घगती, सब्बप्पगती चंदा सब्बसिग्घगती तारा, ता एएसिं णं चंदिमसूरियगहणक्खत्ततारारूवाणं कयरे२हंतो अप्पिड्ढिया वा महिड्ढिया वा?, ताराहंतो महिड्ढिया णक्खत्ता णक्खत्तेहंतो गहा महिड्ढिया गहेहंतो सूरि महि-ड्ढिया सुरेहंतो चंदा महिड्ढिया, सब्बप्पड्ढिया तारा सब्बमहिड्ढिया चंदा । ९५। ता जंबुहीवे णं दीवे तारारूवस्स २ य एस णं केवतियं अबाधाए अंतरे पं०?, दुविहे अंतरे पं० तं०-वाघातिमे य णिवाघातिमे य, तत्थ णं जे से वाघातिमे से जह० दोण्णि छावट्टे जोयणसते उक्को० बारस जोयणसहस्साइं दोण्णि बाताले जोयणसते तारारूवस्स २ य अबाधाए अंतरे पं०, तत्थ जे से निवाघातिमे से जह० पंच धणुसताइं उक्को० अद्धजोयणं तारारूवस्स २ य अबाधाए अंतरे पं० । ९६। ता चंदस्स णं जोतिसिंदस्स जोतिसरण्णो कति अग्गमहिसीओ पं०?, ता चत्तारि अग्गमहिसीओ पं० तं०-चंदप्पभा दोसिणाभा अच्चिमाली पभंकरा, तत्थ णं एगमेगाए देवीए चत्तारि देवीसाहस्सी परिवारो पं०, पभू णं तातो एगमेगा देवी अण्णाइं चत्तारि २ देवीसहस्साइं परिवारं विउच्चिए, एवामेव सपुवावरेणं सोलस देवीसहस्सा, सेत्तं तुडिए, ता पभू णं चंदे जोतिसिंदे जोतिसराया चंदवडिंसए विमाणे सभाए सुधम्माए तुडि-एणं सद्धिं दिवाइं भोगभोगाइं भुंजमाणे विहरित्तए?, णो इणट्टे समट्टे, ता कहं ते णो पभू जोतिसिंदे जोतिसराया चंदवडिंसए विमाणे सभाए सुधम्माए तुडिएणं सद्धिं दिवाइं भोग-भोगाइं भुंजमाणे विहरित्तए?, ता चंदस्स णं जोतिसिंदस्स जोतिसरण्णो चंदवडिंसए विमाणे सभाए सुधम्माए माणवए चेतियस्वंभे वइरामएसु गोलवट्टसमुग्गएसु बहवे जिणस-कधाओ संणिक्खत्ताओ चिट्ठंति, ताओ णं चंदस्स जोतिसिंदस्स जोइसरण्णो अण्णेसिं च बहूणं जोतिसियाणं देवाण य देवीण य अच्चणिजाओ वंदणिजाओ पूयणिजाओ सक्कार-णिजाओ सम्माणणिजाओ कल्लाणं मंगलं देवयं चेतियं पज्जुवासणिजाओ एवं खलु णो पभू चंदे जोतिसिंदे जोतिसराया चंदवडिंसए विमाणे सभाए सुधम्माए तुडिएणं सद्धिं दिवाइं भोगभोगाइं भुंजमाणे विहरित्तए, पभू णं चंदे जोतिसिंदे जोतिसराया चंदवडिंसए विमाणे सभाए सुधम्माए चंदसि सीहासणंसि चउहं सामाणियसाहस्सीहिं चउहं अग्गमहिसीहिं सपरिवाराहिं तीहिं परिसाहिं सत्तहिं अणिएहिं सत्तहिं अणियाहिं वइहिं सोलसहिं आयरक्खदेवसाहस्सीहिं अण्णेहिं य बहूहिं जोतिसिएहिं देवेहिं देवीहिं य सद्धिं संपरिवुडे महताहतण-



दृगीयवाइयतंतीतलतालतुडियघणमुङ्गपडुप्पवाइतरवेणं दिवाइं भोगभोगाइं भुंजमाणे विहरित्ते, केवलं परियारणिइठीए, णो चैव णं मेहुणवत्तियं, ता सूरस्स णं जोइसिंदस्स जोति-  
सरण्णो कति अग्गमहिसीओ पं०?, ता चत्तारि अग्गमहिसीओ पं० तं०-सूरप्पभा आतवा अच्चिमाली पभंकरा, सेसं जहा चंदस्स णवरं सूरवडेंसए विमाणे जाव णो चैव णं मेहुणवत्ति-  
ताए । ९७। जोतिसियाणं देवाणं केवइयं कालं ठिती पं०?, जह० अडभागपलितोवमं उक्को० पलितोवमं वाससयसहस्समब्भहियं, ता जोतिसिणीणं देवीणं केवतियं कालं ठिती  
पं०?, जह० अट्टभागपलितोवमं उक्को० अट्टपलिओवमं पन्नासाए वाससहस्सेहिं अब्भहियं, चंदविमाणे णं देवाणं केवतियं कालं ठिती पं०?, जह० चउब्भागपलितोवमं उक्को० पलि-  
तोवमं वाससयसहस्समब्भहियं, ता चंदविमाणे णं देवीणं केवतियं कालं ठिती पं०?, जह० चउब्भागपलितोवमं उक्को० अट्टपलितोवमं पण्णासाए वाससहस्सेहिं अब्भहियं, सूरविमाणे  
णं देवाणं केवतियं कालं ठिती पं०?, जह० चउब्भागपलितोवमं उक्को० पलिओवमं वाससहस्समब्भहियं, ता सूरविमाणे णं देवीणं केवतियं कालं ठिती पं०?, जह० चउब्भागपलि-  
तोवमं उक्को० अट्टपलितोवमं पंचहिं वाससएहिं अब्भहियं, ता गहविमाणे णं देवाणं केवतियं कालं ठिती पं०?, जह० चउब्भागपलितोवमं उक्को० पलितोवमं, ता गहविमाणे णं  
देवीणं केवतियं कालं ठिती पं०?, जह० चउब्भागपलितोवमं उक्को० अट्टपलितोवमं, ता णक्खत्तविमाणे णं देवाणं केवतियं कालं ठिती पं०?, जह० चउब्भागपलितोवमं उक्को० अट्टप-  
लिओवमं, ता णक्खत्तविमाणे णं देवीणं केवइयं कालं ठिती पं०?, जह० अट्टभागपलितोवमं उक्को० चउब्भागपलितोवमं, ता ताराविमाणे णं देवाणं पुच्छा, जह० अट्टभागपलितो-  
वमं उक्को० चउब्भागपलियोवमं, ता ताराविमाणे णं देवीणं पुच्छा, ता जह० अट्टभागपलितोवमं उक्को० साइरेगअट्टभागपलिओवमं । ९८। ता एएसिं णं चंदिमसूरियंगहणक्खत्तता-  
रारूवाणं कतरे०?, ता चंदा य सूरा य एते णं दोवि तुल्ला सब्बत्थोवा णक्खत्ता संखिज्जगुणा गहा संखिज्जगुणा तारा संखिज्जगुणा । ९९ ॥ अट्टारसमं पाहुडं १८ ॥ ता कति णं चंदिमसू-  
रिया सब्बलोयं ओभासंति उज्जोएंति तवेंति पभासंति आहि०?, तत्थे एव०-ता एगे चंदे एगे सूरै सब्बलोयं ओभासति० एगे एव०, एगे  
पुण०-ता तिण्णि चंदा तिण्णि सूरा सब्बलोयं ओभासंति० एगे एव०, एगे पुण०-ता आहुट्ठिं चंदा आहुट्ठिं सूरा सब्बलोयं ओभासंति० एगे एव०, एगे पुण०-एतेणं अभिलावेणं णेतव्वं  
सत्त चंदा सत्त सूरा दस चंदा दस सूरा बारस चंदा बारस सूरा बातालीसं चंदा० बावत्तरिं चंदा० बातालीसं चंदसतं० बावत्तरं चंदसयं बावत्तरं सूरसयं बायालीसं चंदसहस्सं बातालीसं  
सूरसहस्सं बावत्तरं चन्दसहस्सं बावत्तरं सूरसहस्सं सब्बलोयं ओभासंति० एगे एव०, वयं पुण एवं वदामो-ता अयण्णं जंबुदीवे जाव परिक्खेवेणं, ता जंबुदीवं केवतिया चंदा पभासिंसु  
वा पभासिंति वा पभासिस्संति वा?, केवतिया सूरा तविसु वा० केवतिया णक्खत्ता जोअं जोइंसु०?, केवतिया गहा चारं चरिसु वा०? केवतिया तारागणकोडिकोडीओ सोभं सोभेंसु  
वा०?, ता जंबुदीवे दो चंदा पभासेंसु वा० दो सूरिया तवइंसु वा० छप्पण्णं णक्खत्ता जोयं जोएंसु वा० छावत्तरं गहसतं चारं चरिसु वा० एगं सयसहस्सं तेत्तीसं च सहस्सा णव सया  
पण्णासा तारागणकोडिकोडीणं सोभं सोभेंसु वा० 'दो चंदा दो सूरा णक्खत्ता खलु हवंति छप्पण्णा । छावत्तरं गहसतं जंबुदीवे विचारीणं ॥ ३२ ॥ एगं च सयसहस्सं तित्तीसं खलु भवे  
सहस्साइं । णव य सता पण्णासा तारागणकोडिकोडीणं ॥ ३३ ॥ ता जंबुदीवं णं दीवं लवणे नामं समुदे वट्टे वलयाकारसंठाणसंठिते सब्बतो समंता संपरिक्खित्ताणं चिट्ठति, ता लवणे  
णं समुदे किं समचक्कवालसंठिते विसमचक्कवालसंठिते?, ता लवणे समचक्कवालसंठिते नो विसमचक्कवालसंठिते, ता लवणसमुदे केवइयं चक्कवालविक्खवंभेणं केवतियं परिक्खेवेणं  
आहि०?, ता दो जोयणसतसहस्साइं चक्कवालविक्खवंभेणं पण्णरस जोयणसतसहस्साइं एक्कासीयं च सहस्साइं सतं चऊतालं किंचिविसेसूणं परिक्खेवेणं आहि०, ता लवणसमुदे  
केवतिया चंदा पभासेंसु वा०?, एवं पुच्छा जाव केवतियाउ तारागणकोडिकोडीओ सोभेंसु वा०?, ता लवणे णं समुदे चत्तारि चंदा पभासेंसु वा० चत्तारि सूरिया तवइंसु वा० बारस  
णक्खत्तसतं जोयं जोएंसु वा० तिण्णि बावण्णा महग्गहसता चारं चरिसु वा० दो सतसहस्सा सत्तट्ठिं च सहस्सा णव य सता तारागणकोडीकोडीणं सोभिसु वा०, 'पण्णरस सतसहस्सा  
एक्कासीतं सतं चऊतालं । किंचिविसेसेणुणो लवणोदधिणो परिक्खेवो ॥ ३४ ॥ चत्तारि चैव चंदा चत्तारि य सूरिया लवणतोये । बारस णक्खत्तसयं गहाण तिण्णेव बावण्णा ॥ ३५ ॥  
दोचैव सतसहस्सा सत्तट्ठिं खलु भवे सहस्साइं । णव य सता लवणजले तारागणकोडिकोडीणं ॥ ३६ ॥ ता लवणसमुदं धातईसंडे णामं दीवे वट्टे वलयाकारसंठिते तहेव जाव णो विस-  
मचक्कवालसंठिते, धातईसंडे णं दीवे केवतियं चक्कवालविक्खवंभेणं केवतियं परिक्खेवेणं आहि०?, ता चत्तारि जोयणसतसहस्साइं चक्कवालविक्खवंभेणं ईतालीसं जोयणसतसहस्साइं  
दस य सहस्साइं णव य एकट्टे जोयणसते किंचिविसेसूणे परिक्खेवेणं आहि०, धातईसंडे दीवे केवतिया चंदा पभासेंसु वा० पुच्छा, ता धातईसंडे णं दीवे बारस चंदा पभासेंसु वा० बारस  
सूरिया तवेंसु वा० तिण्णि छत्तीसा णक्खत्तसता जोअं जोएंसु वा० एगं छप्पण्णं महग्गहसहस्सं चारं चरिसु वा०-अट्टेव सतसहस्सा तिण्णि सहस्साइं सत्त य सयाइं । एगससीपरिवारो  
तारागणकोडिकोडीओ ॥ ३७ ॥ सोभं सोभेंसु वा०, 'धातईसंडपरिरओ ईताल दसुत्तरा सतसहस्सा । णव य सता एगट्टा किंचिविसेसेण परिहीणा ॥ ३८ ॥ चउवीसं ससिरविणो (२०२)

णक्खत्तसता य तिण्णि छत्तीसा । एगं च गहसहस्सं छप्पणं घातईसंहे ॥ ३९ ॥ अट्टेव सतसहस्सा तिण्णि सहस्साइं सत्त य सताइं । धायइसंडे दीवे तारागणकोडिकोडीणं ॥ ४० ॥ ता  
 धायइसंडं णं दीवं कालोए णामं समुहे वट्टे वलयागारसंठाणसंठिते जाव णो विसमचक्कवालसंठाणसंठिते, ता कालोए णं समुहे केवतियं चक्कवालविक्खंभेणं केवतियं परिक्खेवेणं आहि०?,  
 ता कालोए णं समुहे अट्ट जोयणसतसहस्साइं चक्कवालविक्खंभेणं पं० एक्काणउतिं जोयणसयसहस्साइं सत्तरिं च सहस्साइं छच्च पंचुत्तरे जोयणसते किंचिविसेसाधिए परिक्खेवेणं  
 आहि०, ता कालोये णं समुहे केवतिया चंदा पभासेंसु वा० पुच्छा, ता कालोए समुहे बातालीसं चंदा पभासेंसु वा० बायालीसं सुरिया तवेंसु वा० एक्कारस छावत्तरा णक्खत्तसता  
 जोयं जोइंसु वा० तिभि सहस्सा छच्च छन्नउया महगहसया चारं चरिंसु वा० अट्टावीसं च सयसहस्साइं बारस सहस्साइं नव य सयाइं पण्णासा तारागणकोडिकोडीओ सोभं सोभेंसु  
 वा०, 'एक्काणउई सतराइं सतसहस्साइं परिरतो तस्स । अहियाइं छच्च पंचुत्तराइं कालोदधिवरस्स ॥ ४१ ॥ बातालीसं चंदा बातालीसं च दिणकरा दित्ता । कालोदधिंमि एते चरंति  
 संबद्धेसागा ॥ ४२ ॥ णक्खत्तसहस्सं एगमेव छावत्तरं च सतमण्णं । छच्च सया छण्णउया महग्गहा तिण्णि य सहस्सा ॥ ४३ ॥ अट्टावीसं कालोदधिंमि बारस य सयसहस्साइं । णव य  
 सया पण्णासा तारागणकोडिकोडीणं ॥ ४४ ॥ ता कालोयं णं समुहं पुक्खवररे णामं दीवे वट्टे वलयाकारसंठाणसंठिते सबतो समंता संपरिक्खवित्ताणं चिट्ठति, ता पुक्खवररे णं दीवे किं  
 समचक्कवालसंठिए विसमचक्कवालसंठिए?, ता समचक्कवालसंठिए नो विसमचक्कवालसंठिए, ता पुक्खवररे णं दीवे केवइयं चक्कवालविक्खंभेणं केवइअं परिक्खेवेणं?, ता सोल्लस  
 जोयणसयसहस्साइं चक्कवालविक्खंभेणं एगा जोयणकोडी बाणउतिं च सतसहस्साइं अउणाणवइं च सहस्साइं अट्टचउणउते जोअणसते परिक्खेवेणं आहि०, ता पुक्खवररे णं दीवे  
 केवतिया चंदा पभासेंसु वा पुच्छा तथेव, ता चोत्तालं चंदसदं पभासेंसु वा० चोत्तालं सुरियाणं सतं तवइंसु वा० चत्तारि सहस्साइं बत्तीसं च नक्खत्ता जोअं जोएंसु वा० बारस सहस्साइं  
 छच्च बावत्तरा महग्गहसता चारं चरिंसु वा, छण्णउतिसयसहस्साइं चोयालीसं सहस्साइं चत्तारि य सयाइं तारागणकोडिकोडीणं सोभं सोभेंसु वा० 'कोडी बाणउती खलु अउणाणउतिं  
 भवे सहस्साइं । अट्टसता चउणउता य परिरओ पोक्खवररस्स ॥ ४५ ॥ चोत्तालं चंदसतं चोत्तालं चेव सुरियाण सतं । पोक्खवररस्सि दीवे चरंति एते पभासंता ॥ ४६ ॥ चत्तारि सहस्साइं  
 बत्तीसं चेव हुंति णक्खत्ता । छच्च सता बावत्तर महग्गहा बारसहस्सा ॥ ४७ ॥ छण्णउति सयसहस्सा चोत्तालीसं खलु भवे सहस्साइं । चत्तारि तह सयाइं तारागणकोडिकोडीणं ॥ ४८ ॥  
 ता पुक्खवररस्स णं दीवस्स बहुमज्झदेसभाए माणुसुत्तरे णामं पइए पं० वट्टे वलयाकारसंठाणसंठिते जे णं पुक्खवररं दीवं दुधा विभयमाणे २ चिट्ठति, तं०-अब्भितरपुक्खरद्धं च  
 बाहिरपुक्खरद्धं च, ता अब्भितरपुक्खरद्धे णं किं समचक्कवालसंठिए विसमचक्कवालसंठिए?, ता समचक्कवालसंठिए णो विसमचक्कवालसंठिते, ता अब्भितरपुक्खरद्धे णं केवतियं चक्क-  
 वालविक्खंभेणं केवतियं परिक्खेवेणं आहि०?, ता अट्ट जोयणसयसहस्साइं चक्कवालविक्खंभेणं एक्का जोयणकोडी बायालीसं च सयसहस्साइं तीसं च सहस्साइं दो अउणापण्णे  
 जोयणसते परिक्खेवेणं आहि०, ता अब्भितरपुरक्खरद्धे णं केवतिया चंदा पभासेंसु वा० पुच्छा, बावत्तरिं चंदा पभासेंसु वा० बावत्तरिं सुरिया तवइंसु वा० दोण्णि सोला णक्खत्तस-  
 हस्सा जोअं जोएंसु वा० छ महग्गहसहस्सा तिभि सया छत्तीसा चारं चरेंसु वा० अडतालीससतसहस्सा बावीसं च सहस्सा दोण्णि य सता तारागणकोडिकोडीणं सोभं सोभेंसु वा०,  
 ता समयक्खेत्ते णं केवतियं आयामविक्खंभेणं केवइयं परिक्खेवेणं आहि०?, ता पणतालीसं जोयणसतसहस्साइं आयामविक्खंभेणं एक्का जोयणकोडी बायालीसं च सतसहस्साइं  
 तीसं च सहस्साइं दोण्णि य अउणापण्णे जोयणसते परिक्खेवेणं आहि०, ता समयक्खेत्ते णं केवतिया चंदा पभासेंसु वा० पुच्छा तथेव, ता बत्तीसं चंदसतं पभासेंसु वा० बत्तीसं सुरि-  
 याण सतं तवइंसु वा० तिण्णि सहस्सा छच्च छण्णउता णक्खत्तसता जोयं जोएंसु वा० एक्कारस सहस्सा छच्च सोल्लस महग्गहसता चारं चरिंसु वा० अट्टासीतिं सतसहस्साइं चत्तालीसं  
 च सहस्सा सत्त य सया तारागणकोडीकोडीणं सोभं सोभेंसु वा० 'अट्टेव सतसहस्सा अब्भितरपुक्खरद्धे विक्खंभो । पणतालसयसहस्सा माणुसखेत्तस्स विक्खंभो ॥ ४९ ॥ कोडी  
 बातालीसा तीसं सहसा दो सया अउणपण्णा । माणुसखेत्तपरिरओ एसेव य पुक्खरद्धस्स ॥ ५० ॥ बावत्तरिं च चंदा बावत्तरिमेव दिणकरा दित्ता । पुक्खवरदीवइडे चरंति एते पभासेंता  
 ॥ ५१ ॥ तिण्णि सता छत्तीसा छच्च सहस्सा महग्गहाणं तु । णक्खत्ताणं तु भवे सोलाइं दुवे सहस्साइं ॥ ५२ ॥ अडयालसयसहस्सा बावीसं खलु भवे सहस्साइं । दो त सया पुक्खरद्धे  
 तारागणकोडिकोडीणं ॥ ५३ ॥ बत्तीसं चंदसतं बत्तीसं चेव सुरियाण सतं । सयलं माणुसलोअं चरंति एते पभासेंता ॥ ५४ ॥ एक्कारस य सहस्सा छप्पिय सोला महग्गहाणं तु । छच्च सता  
 छण्णउया णक्खत्ता तिण्णि य सहस्सा ॥ ५५ ॥ अट्टासीइं चत्ताइं सतसहस्साइं मणुयलोगंमि । सत्त य सता अणुणा तारागणकोडिकोडीणं ॥ ५६ ॥ एसो तारापिंडो सबसमासेण मणु-  
 यलयंमि । बहिता पुण ताराओ जिणेहिं भणिया असंखेज्जा ॥ ५७ ॥ एवतियं तारगं जं भणियं माणुसंमि लोगंमि । चारं कलंबुयापुप्फसंठितं जोतिसं चरति ॥ ५८ ॥ रविससिगहण-

कृत्वा एवतिया आहिता मणुयलोए । जेसिं णामा गोत्तं न पागता पण्णवेहिंति ॥५९॥ छावट्टिं पिडगाइं चंदादिच्चाण मणुयलयंमि । दो चंदा दो सुरा य हुंति एकेए पिडए ॥ ६० ॥  
 छावट्टिं पिडगाइं णकृत्वाणं तु मणुयलयंमि । छप्पणं णकृत्वा हुंति ॥ ६१ ॥ छावट्टिं पिडगाइं महागहाणं तु मणुयलयंमि । छावत्तरं गहसतं होइ ॥ ६२ ॥ चत्तारि य पंतीओ  
 चंदाइच्चाण मणुयलयंमि । छावट्टिं २ च होइ एक्किक्किया पन्ती ॥ ६३ ॥ छप्पणं पंतीओ णकृत्वाणं तु मणुयलयंमि । छावट्टिं ० ॥ ६४ ॥ छावत्तरं गहाणं पंतिसयं हवति मणुयलो-  
 यंमि । छावट्टिं ० ॥ ६५ ॥ ते मेरुमणुचरंता पदाहिणावत्तमंडला सबे । अणवट्टियजोगेहिं चंदा सुरा गहगणा य ॥ ६६ ॥ णकृत्वाणं अवट्टिता मंडला मुणेयवा । तेऽविय पदाहिणा-  
 वत्तमेव मेरुं अणुचरंति ॥ ६७ ॥ रयणिकरदिणकरणं उद्धं च अहे व संकमो नत्थि । मंडलसंकमणं पुण सञ्चंतरवाहिरं तिरिए ॥ ६८ ॥ रयणिकरदिणकरणं णकृत्वाणं महग्गहाणं च ।  
 चारविसेसेण भवे सुहदुकृत्वाविधी मणुस्साणं ॥ ६९ ॥ तेसिं पविसंताणं तावकृत्वाणं तु वड्ढते णिययं । तेणेव कमेण पुणो परिहायति निकृत्वाणं ॥ ७० ॥ तेसिं कलंबुयापुप्फसंठिता  
 हुंति तावक्खेत्तपहा । अंतो य संकुडा बाहि वित्थडा चंदसूराणं ॥ ७१ ॥ केणं वड्ढति चंदो ? परिहाणी केण हुंति चंदस्स ? । कालो वा जुण्हा वा केणऽणुभावेण चंदस्स ॥ ७२ ॥ किण्हं  
 राहुविमाणं णिच्चं चंदेण होइ अविरहितं । चतुरंगुलमप्पत्तं हिट्ठा चंदस्स तं चरति ॥ ७३ ॥ बावट्टिं २ दिवसे २ तु सुक्कपकृत्वाणं । जं परिवड्ढति चंदो खवेइ तं चेव कालेणं ॥ ७४ ॥  
 पण्णरसइभागेण य चंदं पण्णरसमेव तं वरति । पण्णरसतिभागेण य पुणोवि तं चेव वक्कमति ॥ ७५ ॥ एवं वड्ढति चंदो परिहाणी एव होइ चंदस्स । कालो वा जुण्हा वा एवऽणुभावेण  
 चंदस्स ॥ ७६ ॥ अंतो मणुस्सखेत्ते हवंति चारोवगा तु उववण्णा । पंचविहा जोतिसिया चंदा सुरा गहगणा य ॥ ७७ ॥ तेण परं जे सेसा चंदादिच्चगहतारणक्खत्ता । णत्थि गती णवि  
 चारो अवट्टिता ते मुणेयवा ॥ ७८ ॥ एवं जंबुहीवे दुगुणा लवणे चउग्गुणा हुंति । लावणगा य तिगुणिता ससिसूरा धायईसंडे ॥ ७९ ॥ दो चंदा इह दीवे चत्तारि य सायरे लवणतोए ।  
 धायईसंडे दीवे बारस चंदा य सुरा य ॥ ८० ॥ धातइसंडप्पभितिसु उदिट्ठा तिगुणिता भवे चंदा । आदिच्छचंदसहिता अणंतराणंतरे खेत्ते ॥ ८१ ॥ रिक्खग्गहतारगं दीवसमुहे जहि-  
 च्छसी णाउं । तस्स ससीहिं गुणितं रिक्खग्गहतारगं तु ॥ ८२ ॥ बहिता तु माणुसनगस्स चंदसूराणऽवट्टिता जोण्हा । चंदा अभीयीजुत्ता सुरा पुण हुंति पुस्सेहिं ॥ ८३ ॥ चंदातो सुरस्स  
 य सुरा चंदस्स अंतरं होइ । पण्णाससहस्साइं तु जोयणाणं अणूणाइं ॥ ८४ ॥ सुरस्स य सुरस्स य ससिणो ससिणो य अंतरं होइ । बाहिं तु माणुसनगस्स जोयणाणं सतसहस्सं ॥ ८५ ॥  
 सूरंतरिया चंदा चंदंतरिया य दिणयरा दित्ता । चित्तंतरलेसागा सुहलेसा मंदलेसा य ॥ ८६ ॥ अट्ठासीतिं च गहा अट्ठावीसं च हुंति नकृत्वा । एगससीपरिवारो एत्तो ताराण वोच्छामि  
 ॥ ८७ ॥ छावट्टि सहस्साइं णव चेव सताइं पंचसतराइं । एगससीपरिवारो तारागणकोडिकोडीणं ॥ ८८ ॥ अंतो मणुस्सखेत्ते जे चंदिमसूरियगहगणणकृत्वाणं ताराणं ते णं देवा किं उड्ढो-  
 ववण्णागा कप्पोव ० विमाणोव ० चारोव ० चारट्टितीया गतिरतिया गतिसमावण्णागा ? , ता ते णं देवा णो उड्ढो ० नो कप्पो ० विमाणो ० चारो ० नो चारट्टितीया गइरइया गतिसमावण्णागा  
 उड्ढामुहकलंबुआपुप्फसंठाणसंठितेहिं जोअणसाहस्सिएहिं तावक्खेत्तेहिं साहस्सिएहिं बाहिराहि य वेउवियाहिं परिसाहिं महताहतणट्टीयवाइयतंतीतलतालतुडियघणमुइंगपडुप्प-  
 वाइयरवेणं महता उक्कट्टिसीहणादबोलकलकलरवेणं अच्छं पच्चतरायं पदाहिणावत्तमंडलचारं मेरुं अणुपरियट्टंति, ता तेसिं णं देवाणं जाधे इंदे चयति से कथमिदाणिं पकरंति ? , ता  
 चत्तारिपंच सामाणिया देवा तं ठाणं उवसंपज्जित्ताणं विहरंति जाव अण्णे इंदे उववण्णे भवति, ता इंदेठेणं णं केवइएणं कालेणं विरहियं उववाएणं पं ० ? , ता जह ० इक्कं समयं उक्को ०  
 छम्मासे, ता बहिता णं माणुस्सखेत्तस्स जे चंदिमसूरियगहजावतारारूवा ते णं देवा किं उड्ढोववण्णागा कप्पो ० विमाणो ० चारोव ० चारट्टितीया गतिरतीया गतिसमावण्णागा ? , ता  
 ते णं देवा णो उड्ढोव ० नो कप्पो ० विमाणो ० णो चारोव ० चारट्टितीया नो गइरइया णो गतिसमावण्णागा पक्किट्टगसंठाणसंठितेहिं जोयणसयसाहस्सिएहिं तावक्खेत्तेहिं सयसाह-  
 स्सियाहिं बाहिराहिं वेउवियाहिं परिसाहिं महताहतनट्टीयवाइयजाववेणं दिवाइं भोगभोगाइं भुंजमाणा विहरंति, सुहलेसा मंदलेसा प्रंदायवलेसा चित्तंतरलेसा अण्णोऽण्णसमोगाढाहिं  
 लेसाहिं कूडा इव ठाणठित्ता ते पदेसे सबतो समंता ओभासंति उज्जोवेति तवेति पभासेति, ता तेसिं णं देवाणं जाहे इंदे चयति से कहमिदाणिं पकरंति ? , ता जाव चत्तारिपंच सामा-  
 णिया देवा तं ठाणं तहेव जाव छम्मासे । १०० । ता पुक्खरवरं णं दीवं पुक्खरोदे णामं समुहे वट्टे वलयाकारसंठाणसंठिते सब जाव चिट्ठति, ता पुक्खरोदे णं समुहे किं समचक्खवालसंठिते  
 जाव णो विसमचक्खवालसंठिते, ता पुक्खरोदे णं समुहे केवतियं चक्खवालविकृत्वाणं केवइयं परिकृत्वाणं आहि ०, ता संखेज्जाइं जोयणसहस्साइं आयामविकृत्वाणं संखेज्जाइं जोय-  
 णसहस्साइं परिकृत्वाणं आहि ०, ता पुक्खरवरोदे णं समुहे केवतिया चंदा पभासेसु वा ० पुच्छा तहेव, ता पुक्खरोदे णं समुहे संखेज्जा चंदा पभासेसु वा ० जाव संखेज्जाओ तारागणको-  
 डाकोडीओ सोभं सोभेसु वा ०, एतेणं अभिलावेणं वरुणवरे दीवे वरुणोदे समुहे खीरवरे दीवे खीरवरे समुहे घतवरे दीवे घतोदे समुहे खोतवरे दीवे खोतोदे समुहे णंदिस्सरवरे दीवे

णंदिस्सवरे समुहे अरुणे दीवे अरुणोदे समुहे अरुणवरे दीवे अरुणवरोदे समुहे अरुणवरोभासे दीवे अरुणवरोभासे समुहे कुंडले दीवे कुंडलोदे समुहे कुंडलवरे दीवे कुंडलवरोदे समुहे कुंडलवरोभासे दीवे कुंडलवरोभासे समुहे १४ सब्बेसिं विक्खंभपरिक्खेवो जोतिसाइं पुक्खरोदसागरसरिसाइं । ता कुंडलवरोभासणं समुहं रुयए दीवे वट्टे वलयाकारसंठाणसंठिए सब्बतो जाव चिट्ठति, ता रुयए णं दीवे किं समचक्कवाल जाव णो विसमचक्कवालसंठिते, ता रुयए णं दीवे केवइयं समचक्कवालविक्खंभेणं केवतियं परिक्खेवेणं आहि०?, ता असंखेजाइं जोयणसहस्साइं चक्कवालविक्खंभेणं असंखेजाइं जोयणसहस्साइं परिक्खेवेणं आहि०, ता रुयगे णं दीवे केवतिया चंदा पभासेसु वा पुच्छा, ता रुयगे णं दीवे असंखेजा चंदा पभासेसु वा० जाव असंखेजाओ तारागणकोडिकोडीओ सोभं सोभेसु वा०, एवं रुयगे समुहे रुयगवरे दीवे रुयगवरोदे समुहे रुयगवरोभासे दीवे रुयगवरोभासे समुहे, एवं तिपडोयारा णेतवा जाव सुरे दीवे सूरुदे समुहे सूरवरे दीवे सूरवरे समुहे सूरवरोभासे दीवे सूरवरोभासे समुहे, सब्बेसिं विक्खंभपरिक्खेवजोतिसाइं रुयगवरदीवसरिसाइं, ता सूरवरोभासोदणं समुहं देवे णामं दीवे वट्टे वलयाकारसंठाणसंठिते सब्बतो समंता संपरिक्खित्ताणं चिट्ठति जाव णो विसमचक्कवालसंठिते, ता देवे णं दीवे केवतियं चक्कवालविक्खंभेणं केवतियं परिक्खेवेणं आहि०?, ता असंखेजाइं जोयणसहस्साइं चक्कवालविक्खंभेणं असंखेजाइं जोयणसहस्साइं परिक्खेवेणं आहि०, ता देवे णं दीवे केवतिया चंदा पभासेसु वा पुच्छा, तथेव, ता देवे णं दीवे असंखेजा चंदा पभासेसु वा जाव असंखेजाओ तारागणकोडिकोडीओ सोभेसु वा०, एवं देवोदे समुहे णागे दीवे णागोदे समुहे जक्खे दीवे जक्खोदे समुहे भूते दीवे भूतोदे समुहे सयंभूरमणे दीवे सयंभूरमणे समुहे, सब्बे देवदीवसरिसा । १०१ ॥ एकूणवीसतिमं पाहुडं १९ ॥ ता कहं ते अणुभावे आहि०?, तत्थ खलु इमाओ दो पडिवत्तीओ पं०, तत्थेगे एव०-ता चंदिमसूरिया णं णो जीवा अजीवा णो घणा झुसिरा णो बादरबुंदिधरा कलेवरा, नत्थि णं तेसिं उट्टाणेति वा कम्मेति वा बलेति वा वीरिएति वा पुरिसकारपरक्कमेति वा, ते णो विज्जु लवंति णो असणिं लवंति णो थणितं लवंति, अहे य णं बादरे वाउकाए संमुच्छति ता विज्जुं पि लवंति असणिं पि लवंति थणितं पि लवंति एगे एव०, एगे पुण एव०-ता चंदिमसूरिया णं जीवा णो अजीवा घणा णो झुसिरा बादरबुंदिधरा नो कलेवरा अत्थि णं तेसिं उट्टाणेति वा० ते विज्जुं पि लवंति० एगे एव०, वयं पुण एवं वदामो-ता चंदिमसूरिया णं देवा महिडिढया जाव महाणुभागा (प० वा) वरवत्थधरा वरमल्लधरा वराभरणधारी अवोच्छित्तिणयट्टताए अन्ने चयंति अण्णे उववजंति । १०२ । ता कहं ते राहुकम्मे आहि०?, तत्थ खलु इमाओ दो पडिवत्तीओ पं०, तत्थेगे एव०-अत्थि णं से राहु देवे जे णं चंदं वा सूरं वा गिण्हति एगे एव०, एगे पुण०-नत्थि णं से राहु देवे जे णं चंदं वा सूरं वा गिण्हइ, तत्थ जे ते एव०-ता अत्थि णं से राहु देवे जे णं चंदं वा सूरं वा गिण्हति से एव०-ता राहु णं देवे चंदं वा सूरं वा गेण्हमाणे बुद्धंतेणं गिण्हित्ता बुद्धंतेणं मुयति बुद्धंतेणं गिण्हित्ता मुद्धंतेणं मुयइ मुद्धंतेणं गिण्हित्ता मुद्धंतेणं मुयति वामभुयन्तेणं गिण्हित्ता वामभुयंतेणं मुयति वामभुयंतेणं गिण्हित्ता दाहिणभुयंतेणं मुयति दाहिणभुयंतेणं गिण्हित्ता वामभुयंतेणं मुयति दाहिणभुयंतेणं गिण्हित्ता दाहिणभुयंतेणं मुयति, तत्थ जे ते एव०-ता नत्थि णं से राहु देवे जे णं चंदं वा सूरं वा गेण्हति ते एव०-तत्थ णं इमे पण्णरस कसिणा पोग्गला पं० तं०-सिंघाणए जडिलए खरए खत्तए अंजणे खंजणे सीतले हिमसीयले केलासे अरुणाभे परिज्जए णभसूरए कविलिए पिंगलए राहु, ता जया णं एते पण्णरस कसिणा २ पोग्गला सदा चंदस्स वा सूरस्स वा लेसाणुबद्धचारिणो भवंति तता णं माणुसलोयंमि माणुसा एवं वदंति-एवं खलु राहु चंदं वा सूरं वा गेण्हति एवं खलु०, ता जता णं एते पण्णरस कसिणा २ पोग्गला सदा चंदस्स वा सूरस्स वा णो लेसाणुबद्धचारिणो भवंति णो खलु तदा माणुसलोयंमि मणुस्सा एवं वदंति-एवं खलु राहु चंदं वा सूरं वा गेण्हति एगे एव०, वयं पुण एवं वदामो-ता राहु णं देवे महिड्ढीए महाणुभावे वरवत्थधरे वरमल्लधरे वराभरणधारी, राहुस्स णं देवस्स णव णामधेजा पं० तं०-सिंघाडए जडिलए खरए खत्तए ढड्ढ(ददु)रे मगरे मच्छे कच्छभे कण्हसप्पे, ता राहुस्स णं देवस्स विमाणा पंचवण्णा पं० तं०-किण्हा नीला लोहिता हालिदा सुक्खिळा, अत्थि कालए राहुविमाणे खंजणवण्णाभे पं० अत्थि नीलए राहुविमाणे लाउयव-ण्णाभे पं० अत्थि लोहिए राहुविमाणे मंजिट्ठावण्णाभे पं० अत्थि हालिदए राहुविमाणे हलिदावण्णाभे पं० अत्थि सुक्खिळए राहुविमाणे भासरासिवण्णाभे पं०, ता जया णं राहुदेवे आगच्छमाणे वा गच्छमाणे वा विउव्वेमाणे वा परियारेमाणे वा चंदस्स वा सूरस्स वा लेस्सं पुरच्छिमेणं आवरित्ता पच्चत्थिमेणं वीतीवतति तथा णं पुरच्छिमेणं चंदे वा सूरु वा उवदंसेति पच्चत्थिमेणं राहु, जदा णं राहुदेवे आगच्छमाणे वा० चंदस्स वा सूरस्स वा लेस्सं दाहिणेणं आवरित्ता उत्तरेणं वीतीवतति तदा णं दाहिणेणं चंदे वा सूरु वा उवदंसेति उत्तरेणं राहु, एतेणं अभिल्लवेणं पच्चत्थिमेणं आवरित्ता पुरच्छिमेणं वीतीवतति उत्तरेणं आवरित्ता दाहिणेणं वीतिवतति, जया णं राहु देवे आगच्छमाणे वा० चंदस्स वा सूरस्स वा लेस्सं दाहिणपुरच्छिमेणं आवरित्ता उत्तरपच्चत्थिमेणं वीईवयइ तथा णं दाहिणपुरच्छिमेणं चंदे वा सूरु वा उवदंसेइ उत्तरपच्चत्थिमेणं राहु, जया णं राहु देवे आगच्छमाणे वा० चंदस्स वा सूरस्स वा लेस्सं दाहि-

८११ सूर्यप्रज्ञप्ति: ५१५५-९०

मुनि दीपरत्तसागर

णपञ्चत्थिमेण आवरित्ता उत्तरपुरच्छिमेण वीतीवतति तदा णं दाहिणपञ्चत्थिमेण चंदे वा सूर वा उवदंसेति उत्तरपुरच्छिमेण राहू, एतेणं अभिलावेणं उत्तरपञ्चत्थिमेण आवरेत्ता दाहि-  
 णपुरच्छिमेण वीतीवतति उत्तरपुरच्छिमेण आवरेत्ता दाहिणपञ्चत्थिमेण वीतीवयइ, ता जता णं राहू देवे आगच्छमाणे वा० चंदस्स वा सूरस्स वा लेसं आवरेत्ता वीतीव० तदा णं  
 मणुस्सलोए मणुस्सा वदंति-राहुणा चंदे वा सूर वा गहिते, ता जया णं राहू देवे आगच्छमाणे वा० चंदस्स वा सूरस्स वा लेसं आवरेत्ता पासेणं वीतीवतति तता णं मणुस्सलोअंमि  
 मणुस्सा वदंति-चंदेण वा सूरुण वा राहुस्स कुच्छी भिण्णा, ता जता णं राहू देवे आगच्छमाणे वा० चंदस्स वा सूरस्स वा लेसं आवरेत्ता पच्चोसकति तता णं मणुस्सलोए मणुस्सा एवं  
 वदंति-राहुणा चंदे वा सूर वा वंते राहुणा०, ता जता णं राहू देवे आगच्छमाणे वा० चंदस्स वा सूरस्स वा लेसं आवरेत्ता मज्झमज्झेणं वीतिवतति तता णं मणुस्सलोअंसि मणुस्सा  
 वदंति-राहुणा चंदे वा सूर वा विइयरिए राहुणा० २, ता जता णं राहू देवे आगच्छमाणे० चंदस्स वा सूरस्स वा लेसं आवरेत्ताणं अघे सपक्खिं सपडिदिसिं चिट्ठति तता णं मणुस्स-  
 लोअंसि मणुस्सा वदंति-राहुणा चंदे वा सूर वा घत्थे राहुणा० २। कतिविधे णं राहू पं०?, दुविहे पं० तं०-ता धुवराहू य पव्वराहू य, तत्थ णं जे से धुवराहू से णं बहुलपक्खस्स  
 पाडिवए पण्णरसइभागेणं पण्णरसइभागं चंदस्स लेसं आवरेमाणे २ चिट्ठति, तं०-पढमाए पढमं भागं जाव पन्नरसमं भागं, चरमे समए चंदे रत्ते भवति अवसेसे समए चंदे रत्ते य  
 विरत्ते य भवइ, तमेव सुक्कपक्खे उवदंसेमाणे २ चिट्ठति, तं० पढमाए पढमं भागं जाव चंदे विरत्ते य भवइ, अवसेसे समए चंदे रत्ते य विरत्ते य भवति, तत्थ णं जे ते पव्वराहू से  
 जहण्णेणं छण्हं मासाणं, उक्कोसेणं बायालीसाए मासाणं चंदस्स अडतालीसाए संवच्छराणं सूरस्स । १०३। ता कहं ते चंदे ससी २ आहि०?, ता चंदस्स णं जोतिसिंदस्स जोतिसरण्णो  
 कंते मियंके विमाणे कंता देवा कंताओ देवीओ कंताइं आसणसयणखंभभंडमत्तोवगरणाइं अप्पणावि णं चंदे देवे जोतिसिंदे जोतिसराया सोमे कंते सुभे पियदंसणे सुरूवे ता एवं खलु चंदे  
 ससी २ आहि०, ता कहं ते सूरिए आदिच्चे २ आहि०?, ता सूरुदिया समयति वा आवलियाति वा आणापाणूति वा थोवेति वा जाव उस्सप्पिणीओसप्पिणीति वा एवं खलु सूरु  
 आदिच्चे २ आहि० । १०४। ता चंदस्स णं जोतिसिंदस्स जोतिसरण्णो कति अग्गमहिंसीओ पं०?, ता चत्तारि अग्गमहिंसीओ पं० तं०-चंदप्पभा दोसिणाभा अच्चिमाली पभंकरा जहा  
 हेट्टा तं चेव जाव णो चेव णं मेहुणवत्तियं, एवं सूरस्सवि भाणितव्वं, ता चंदिमसूरिया जोतिसिंदा जोतिसरायाणो केरिसे कामभोगे पच्चणुभवमाणा विहरंति?, ता से जहाणामते केई  
 पुरिसे पढमजोव्वणुट्टाणबलसमत्थे पढमजोव्वणुट्टाणबलसमत्थाए भारियाए सद्धिं अचिरवत्तवीवाहे अत्थत्थी अत्थगवेसणताए सोलसवासविप्पवसिते से णं ततो लद्धट्टे कतकज्जे अणह-  
 समग्गे पुणरवि णियगघरं हव्वमागते ण्हाते कतबलिकम्मे कयकोउयमंगलपायच्छित्ते सुद्धप्पावेसाइं मंगल्लाइं वत्थाइं पवरपरिहिते अप्पमहग्घाभरणालंकियसरीरे मणुण्णं थालीपा-  
 कसुद्धं अट्टारसवंजणाउलं भोयणं भुत्ते समाणे तंसि तारिसगंसि वासघरंसि अंतो सचित्तकम्मे बाहिरतो दूमितघट्टमट्टे विचित्तउल्लोअचिल्लियतले बहुसमसुविभत्तभूमिभाए मणिरयण-  
 पणासितंधयारे कालागुरुपवरकुंदुरुक्कतुरुक्कधूवमघमघंतगंधुद्धुयाभिरामे सुगंधवरगंधिए गंधवट्टिभूते तंसि तारिसगंसि सयणिज्जंसि दुहतो उण्णते मज्झेणतगंभीरे सालिंणवट्टिए उभओ  
 (पण्णत्तगंड पा०) बिब्बोयणे सुरम्मे गंगापुलिणवालुयाउद्दालसालिसए सुविरइयरयत्ताणे वियवियखोमियखोमदुगूलपट्टपडिच्छायणे रत्तंसुयसंबुडे सुरम्मे आईणगरूतबूरणवणीत-  
 तूलफासे सुगंधवरकुसुमचुण्णसयणोवयारकलिते ताए तारिसाए भारियाए सद्धिं सिंगारागारचारुवेसाए संगतगतहसितभणितचिट्ठितसंलावविलासणिउणजुत्तोवयारकुसलाए अणुरत्ता-  
 विरत्ताए मणोणुकूलाए एगंतरतिपसत्ते अण्णत्थ कत्थई मणं अकुव्वमाणे इट्टे सद्धफरिसरसरूवगंधे पंचविधे माणुस्सए कामभोगे पच्चणुभवमाणे विहरिज्जा, ता से णं पुरिसे विउसमण-  
 कालस्समयंसि केरिसए सातासोक्खं पच्चणुभवमाणे विहरति?, उरालं समाणाउसो!, ता तस्स णं पुरिसस्स कामभोगेहिंतो एत्तो अणंतगुणविसिट्ठतराए चेव वाणमंतराणं देवाणं काम-  
 भोगा, वाणमंतराणं देवाणं कामभोगेहिंतो अणंतगुणविसिट्ठतराए चेव असुरिंदवज्जियाणं भवणवासीणं देवाणं कामभोगा, असुरिंद० देवाणं० अणंतगुणविसिट्ठतरा चेव असुर० इंदभू-  
 याणं देवाणं कामभोगा, असुरकुमारणं देवाणं कामभोगेहिंतो० गहणक्खत्ततारारूवापं कामभोगा, गहणक्खत्ततारारूवाणं कामभोगेहिंतो अणंतगुणविसिट्ठतरा चेव चंदिमसूरियाणं  
 देवाणं कामभोगा, ता एरिसए णं चंदिमसूरिया जोइसिंदा जोइसरायाणो कामभोगे पच्चणुभवमाणा विहरंति । १०५। तत्थ खलु इमे अट्टासीती महग्गहा पं० तं०-इंगालए वियालए  
 लोहितंके सणिच्छरे आहुणिए पाहुणिए कणे कणए कणकणए कणविताणए १० कणगसंताणे सोमे सहिते अस्सासणो कज्जोवए कव्व(प्र०च्छ)ए अयकरए दुंदुभए संखे संखणाभे  
 २० संखवण्णाभे कंसे कंसणाभे कंसवण्णाभे णीले णीलोभासे रूपे रूपोभासे भासे भासरासी ३० तिले तिलपुप्फवण्णे दगे दगवण्णे काये वंधे इंदग्गी धूमकेतू हरी पिंगलए ४० बुधे  
 सुक्के बहस्सती राहू अगत्थी माणवए कामफासे धुरे पमुहे वियडे ५० विसंधिकप्पेहए पइल्ले जडियालए अरुणे अग्गिल्लए काले महाकाले सोत्थिए सोवत्थिए वद्धमाणगे ६० पलंबे  
 णिच्चालोए णिच्चुज्जोते सयंपभे ओभासे सेयंकरे खेमंकरे आभंकरे पभंकरे अरए ७० विरए असोगे वीतसोगे य (प्र०विमले)विवत्ते विवत्थे विसाले साले सुव्वते अणियट्टी (२०३)

एगजडी ८० दुजडी कर करिए रायऽगले पुष्फकेतू भावे केतू, संगहणी- 'इंगालए वियालए लोहितंके सणिच्छरे चैव । आहुणिए पाहुणिए कणकसणामावि पंचेव ॥ ८९ ॥ सोमे सहिते  
 अस्सासणे य कज्जोवए य कव्वरए । अयकरए दुंदुभए संखसणामावि तिण्णेव ॥ ९० ॥ तिन्नेव कंसणामा णीले रूपी य हुंति चत्तारि । भास तिलपुष्फवण्णे दगवण्णे काय वंधे य ॥ ९१ ॥  
 इंदगी धूमकेतू हरि पिंगलए बुधे य सुक्के य । बहसति राहु अगत्थी माणवए कामफासे य ॥ ९२ ॥ धुरए पमुहे वियडे विसंधिकप्पे नियडि पयले य । जडियालए य अरुणे अग्गिल  
 काले महाकाले ॥ ९३ ॥ सोत्थिये सोवत्थिये वद्धमाणग तथा पलंबे य । णिच्चालोए णिच्चुजोए सयंपभे चैव ओभासे ॥ ९४ ॥ सेयंकर खेमंकर आभंकर पभंकरे य बोद्धवे । अरए विरए  
 य तथा असोग तह वीतसोगे य ॥ ९५ ॥ विमले वितत विवत्थे विसाल तह साल सुव्वते चैव । अणियट्टी एगजडी य होइ विजडी य बोद्धवो ॥ ९६ ॥ कर करिए रायऽगल बोद्धवे पुष्फ  
 भाव केतू य । अट्टासीति गहा खलु णेयव्वा आणुपुब्बीए ॥ ९७ ॥ १०६ ॥ २० पाहुडं ॥ इति एस पाहुडत्था अभवजणहिययदुल्लहा इणमो । उच्चित्तिता भगवती जोतिसरायस्स पन्नत्ती ॥ ९८ ॥ एस  
 गहितावि संती थद्धे गारवियमाणिपडिणीए । अबहुस्सुए ण देया तव्विवरीते भवे देया ॥ ९९ ॥ सद्धाधितिउट्टाणुच्छाहकम्मबलविरियपुरिसकारेहिं । जो सिक्खिओवि संतो अभायणे  
 परिकहे(प्र० विक्खवे)ज्जाहि ॥ १०० ॥ सो पवयणकुलगणसंघवाहिरो णाणविणयपरिहीणो । अरहंतथेरगणहरमेरं किर होति वोलीणो ॥ १०१ ॥ तम्हा धितिउट्टाणुच्छाहकम्मबलविरिय-  
 सिक्खिअं णाणं । धारेयव्वं णियमा ण य अविणएसु दायव्वं ॥ १०२ ॥ वीरवरस्स भगवतो जरमरणकिलेसदोसरहियस्स । वंदामि विणयपणतो सोक्खुप्पाए सया पाए ॥ १०३ ॥ १०७ ।  
 इति श्रीसूर्यप्रज्ञप्त्युपांगं, शिलोत्कीर्णसकलागमोपेतश्रीसिद्धाचलोपेत्यकागतश्रीवर्धमानजैनागममंदिरे शिलोत्कीर्णं कृतं वीरम्य २४६८ श्रीविक्रमस्य १९९८ आषाढकृष्णदशम्यां